


Ayta Ambala NT Portions



Ayta, Ambala: Ayta Ambala NT Portions (New Testament)

Ayta Ambala NT Portions

Ayta, Ambala: Ayta Ambala NT Portions (New Testament)

copyright © 2024 Wycliffe Bible Translators, Inc.

Language: Ambala Ayta (Ayta, Ambala)

Translation by: Translators Association of the Philippines

Contributor: Wycliffe Bible Translators, Inc.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word.

See Revelation 22:18-19.

2025-04-25

PDF generated using Haiola and XeLaTeX on 25 Apr 2025 from source files dated 25 Apr 2025

25e5b3f5-87cd-528c-9f5a-992309004773

Contents

Marcos	1
Efeso	32
Filipos	39
Colosas	45
Tito	50
Filemon	53

Mahampata' Balita tungkul kan Apu Jesu Cristo ibat kan MARCOS

*Hay Pangangaral Juan ya Tagapag-bawtismu
(Mateo 3:1-12; Lucas 3:1-18; Juan 1:19-28)*

¹⁻² Atiya' Mahampata' Balita tungkul kan Apu Jesu Cristo*, Anak Apu Diyus. Nag'umpisay ati hin natupada' insulat tagapannunghung Apu Diyus ya hi Isaias. Hinlagi, insulat Isaias ya innunghung Apu Diyus kan Apu Jesus. Atiya' ambala na, "Ipagtan kuy minsahiru ku. Mauna ya kamu, takay inunghung na ha tawtawung ihanda lay sarili la ha paglatêng mu.

³ Malêngê yuy bung'u na ha kalinangan, ya mannunghung,
'Pakahampatén yuy pusu yu para ha paglatêng Panginuun,
Dapay ha paghandan danan para ha maalagan tawu! "

⁴⁻⁵ Buy natupada' ati hin nakalatêng hi Juan ya Tagapagbawtismu istu ha kalinangan. Madlan tawtawung naku kana, ibat ha Jerusalem buy iba iban banwa ha Judea. Nangaral ya ha tawtawu, "Magsisi kawuy na ha kayung kawkasalan ta magpabawtismu kawu takay'êmên patawarén kawun Apu Diyus." Impagtapat lay kanlan kawkasalan buy binawtismuan hilan Juan ha Ilug Jordan.

⁶ Hay barun Juan gawa ha labuk kamilyu[†] buy hay babat na, gawa ha balat ayêp. Hay kikinan na balanga insiku buy pulut panilan.

⁷ Ambala na, "Mayin pun gihay lumatêng'a mas makapangyarian pun kangku. Ah ku man, karapat dapata' maglingkud kana dapay gihay alipê."

⁸ Bawtismuwan katawu ha lanêm, nuwa bawtismuwan na kawu ha Ispiritun Apu Diyus."

Hay Pagbawtismu buy Pagtuksu kan Apu Jesus

(Mateo 3:13-4:11; Lucas 3:21-22; 4:1-13)

⁹ Hin panawêñ bantu, inlumatêng hi Apu Jesus ibat ha Nazaret, sakup prubinsiyan Galilea, buy nagpabawtismu kan Juan ha Ilug Jordan.

¹⁰ Pagkalakat Apu Jesus ha lanêm, nagêanga' langit. Naakit nay nagtabuy kanay Ispiritun Apu Diyus dapay gihay kalapati.

¹¹ Buy mayin busisa' nalêngê ibat ha langit ya nannunghung, "Hakay minamaal kun Anak, ya lubus kun kinatutul'an."

¹² Nakun, agad yan pinalakun Ispiritun Apu Diyus ha kalinangan.

¹³ Namirmi ya istun apatnapuy allêw buy tinuksu yan Satanas. Mayin mangatapaga' ayêp istu. Dilag mêt istuy aw'anghil Apu Diyus ta pinagsilbiyan hi Apu Jesus.

*Binawêg Apu Jesus ya Apata' Mangingisda
(Mateo 4:12-22; Lucas 4:14-15; 5:1-11)*

¹⁴ Hin nakulung hi Juan ya tagapagbawtismu, naku hi Apu Jesus ha prubinsiyan Galilea. Buy impangaral na baistuy Mahampata' Balitan ibat kan Apu Diyus.

¹⁵ Ambala na, "Lumatênganay takdan panawun! Madaniyanay paghaharin Apu Diyus. Pagsisiyan yuy nay kayung kasalanan buy maniwala kawu ha Mahampata' Balita!"

¹⁶ Gihay allêw, kaban nalliyaliyaku hi Apu Jesus ha pingit Dagat Galilea [‡] naakit nay mipatêla' mangingisda hilan Simon buy Andres. Mamitambuk hilan lambat.

¹⁷ Ambalan Apu Jesus kanla, "Humunul kawu kangku ta gaw'ên katawun mami-danin tawu kan Apu Diyus nambuh ha pandakêp yu ha isda."

¹⁸ Intayak la agada' kanlan lawlambat buy hinumunul kana.

* **1:1-2 Cristo:** Hay kauligan ha salitan Griego, Tagapagligtas. Ha salitan Hebreoy naman, Mesias. † **1:6 kamilyu:** Mamhaka' kahana' ayêp, mas mamhak pun ha kabayu buy baka. Dapay yan bakan mayin mêt bukul ha bukut. Makadanga' bitih na buy bêng. [‡] **1:16 Dagat Galilea:** Binabawêg mêt Lawan Galilea. Hay Lawan Galilea, mas mamhak buy malalê ha ilug. Matininga' ati nuwa maalun nu mayin malakasa' bagyu.

19 Nagpatuluy hi Apu Jesus ha paliyaliyaku. Ha alwan kadayuan naakit nay namêta' luway anak Zebedeo, hilan Santiago buy Juan. Impapakahampat lay lambat la ha kanlan bangka.

20 Agad hilan binawêg Apu Jesus, "Humunul kawu kangku." Buy intayak lay kanlan bapan hi Zebedeo ha kanlan bangka, awyuna' kanlan tawtauhan. Ta hinumunul hila kan Apu Jesus.

*Hay Tawung Sinuklutan Anitu
(Lucas 4:31-37)*

21 Naku hilan Apu Jesus ha Capernaum. Hin nalatêng'a Allêw Pamamahinga, naku hila ha biyag pamititipunan Hawjudio ta istun nanudu hi Apu Jesus.

22 Namanghay tawtawu ha libun tudu na ta nanudu yan mayin kapangyarian, alwan katbuh tawtagapanudun kautuhan.

23 Mayin gihay tawu baistu, sinuklutan anituy biglan nagpahuk buy nagbubung'u,

24 "Jesus ya taga Nazaret, hita pakialam mu kanyan? Naku ka kayti taêmén lipuhun kami? Kilala kita. Hakay Banala' impagtan Apu Diyus!"

25 Nuwa binawalan Apu Jesus ya anitu, "Tênggên ka buy mag'alih ka kana!"

26 Pinamêgpêg anituy tawu buy nagbung'u kaban nag'aaliha' ati.

27 Namanghay laata' dilag istu, ta ninununghung hila ha gihat giha, "Hita ati? Gihay bayun tudu, mayin kapangyarian! Hay anitu, nauutuhan na buy napapahunul na!"

28 Kinumalat agada' balita tungkul kan Apu Jesus ha buun prubinsyan Galilea.

*Madlan Pinagaling hi Apu Jesus
(Mateo 8:14-17; Lucas 4:38-41)*

29 Ibat ha biyag pamititipunan Hawjudio, naku hi Apu Jesus ha biyag lan Simon buy Andres, awyun na hilan Santiago buy Juan.

30 Nalatêng la, pakaundaga' ampun Simona' babaying inlalagnat. Agad lan innunghunga' ati kan Apu Jesus.

31 Dinaninan Apu Jesus ya mayin hakit, dinukpan nay gamêt ati buy impaibangun na. Naalih agada' kanan lagnat bayu pinagsilbiyan na hilan Apu Jesus.

32 Panlumbug allêw, gintan tawtawu kan Apu Jesus ya laat mayin hakit buy libun sinusuklutan anitu.

33 Buung banway nangapititipun ha luwahan.

34 Madlan mayin hakita' pinagaling Apu Jesus hitamana' kanlan karamdaman. Buy pinaalih na mêtâ' madlan anitu. Nuwa ah na pinaulayan mipannunghung libun anitu ta tanda lan hiyay Anak Apu Diyus.

*Nangaral hi Apu Jesus ha Galilea
(Lucas 4:42-44)*

35 Kinadatunan, nibangun hi Apu Jesus, naku ha kalinangan ta baistun nanalangan.

36 Tingkap yan Simon buy kanan kawkaawayun.

37 Hin naakit la hi Apu Jesus, ambala la, "Titingkap kawun laat."

38 Nuwa innunghung Apu Jesus kanla, "Maku kitamuy na ha kadanin banwa taêmén makapangaralaku mêt baistu. Ta atiya' dahilan kaya ku naku kayti."

39 Buy inlibut Apu Jesus ya buung Galilea, nangaral ya ha libun biyag pamititipunan Hawjudio. Buy nagpaalih yan anitu ha tawtawung sinuklutan anitu.

*Pinagaling Apu Jesus ya Liyaking Mayin Hakit ha Balat
(Mateo 8:1-4; Lucas 5:12-16)*

40 Nagdani kan Apu Jesus ya gihay liyaking mayin hakit ha balat. Nagluhuda' ati kana buy nagmakaingalun pagalingin na. Ambala na, "Nu labay yu, pagalingin yu ku takay luminisaku."

41 Kinaingalwan yan Apu Jesus ta dinukpan ya. Buy ambala kana, "Labay kun, luminis kay na!"

42 Ginumaling agada' hakit.

43-44 Pinaalih ya agad Apu Jesus buy imbilin, "Andi mu nunhunguna' ati ha kanayun. Ha halip, maku ka ha pari buy ipaakit muy balat mu ya ala kay nan hakit. Pagkayari, maghandug kan dapay ha in'utuh Moises, patunaya' malinis kay na."

45 Nuwa pagkaalih na, impagnununghung nay nangyari kana. Ta kinumalata' balitan ati, kaya ah yay na basta makalaku ha bawbanwa ta pagkagulwan yan tawtawu.

Buy istu ya tanan namirmi ha kalinangan. Nuwa naku pun kanay tawtawu, ibat ha iba iban rugal.

2

Pinagaling Apu Jesus ya Gihay Lumpu (Mateo 9:1-8; Lucas 5:17-26)

¹⁻² Pagkalibah umnuy allêw, nagbalik hi Apu Jesus ha Capernaum. Imbalitan tawtawu, "Nakalatêngana' hi Apu Jesus ha tinutuluyan na!" Kaya ban dêlan tawuy nititipun ha tinutuluyan na. Napnuy biyag angga ha mahawang. Kaban nangangaral hi Apu Jesus nunghung Apu Diyus,

³ mayin umnuy tawung naku baistu. Hay apat kanla, pigitana' lumpu takay'êmén idani hana kan Apu Jesus.

⁴ Nuwa ha kadlan tawu, ah hila makadani kan Apu Jesus, kaya naghampa hila palaku ha uhbung. Buy inlubka lay uhbung ta in'uguh lay lumpu ha tapat Apu Jesus.

⁵ Hin naakit Apu Jesus ya kanlan pananampalataya kana, ambala na ha lumpu, "Anak, pinatawadanay kamung kawkasalanan."

⁶ Mayin tagapanudun kautuhan, nangkaitnu baistu. Nalêngê lay habatu buy ambala la ha kanlan ihip,

⁷ "Angkaya ya nannunghung habatu? Alwa yay naman hi Apu Diyus! Pinangungunahan nay Apu Diyus! Alan makakapagpatawed kasalanan nu alwan hi Apu Diyus dili!"

⁸ Agada' naman natandan Apu Jesus ya kanlan iniihip. Kaya ambala na, "Angkaya kawu nag'ihip habatu?

⁹ Iniihip yu, mas madali nu sabin ku ha lumpu, 'Pinatawadanay kawkasalanan mu' kisa ha sabin kun, 'Mêdêng ka, buwatêñ moy amak mu buy maliyaku ka.' Ta ah yu nanakita' pagpatawed.

¹⁰ Nuwa hapaêg, pagalingin kuy tawung ati takay patunayan ku kayu, hakuy nangibat ha langita' In'anak Tawuy mayin kapangyarian kayti ha lutang magpatawed kasalanan." Buy ambala na ha lumpu,

¹¹ "Mêdêng ka, buwatêñ moy kamung amak ta muli kay na."

¹² Nêdêng baya' lumpu. Binwat agada' kanan amak. Buy naghalwang ya kaban nakabalaya' laat. Talagan nagtakay laat buy pinuri lay Apu Diyus. Ambala la, "Hapaêg kamin dilin nakaakit dapay ati."

Hay Pagbawêg kan Levi (Mateo 9:9-13; Lucas 5:27-32)

¹³ Nakun uman hi Apu Jesus ha pingit Dagat Galilea. Inlaku yan dêlan tawu buy tinudwanan na hila.

¹⁴ Kaban nalyalyaku ya, naakit nay anak Alfeus ya hi Levi, manyinyingil buwis gibirnun Romano. Nakaitnu ya ha panyigilan buwis. Ambalan Apu Jesus kana, "Humunul ka kangku." Nêdêng hi Levi buy hinumunul kan Apu Jesus.

¹⁵ Hin naku hi Apu Jesus buy tagahunul na ha biyag Levi, nangan hilan awyuna' manyinyingil buwis buy kanayuna' intuturing lan makasalanan ta dêla kanlay hinuhumunul kan Apu Jesus.

¹⁶ Mayin tagapanudun kautuhana' dilag baistu, kagiha hila ha Pawpariseo. Hin naakit lan nanangan hi Apu Jesus kaawyuna' libun manyinyingil buwis buy kanayun puna' makasalanan, ambala la ha kanan tagahunul, "Angkaya ya nanangan, kaawyun nay tawtawung ban in?"

¹⁷ Nalêngê Apu Jesus ya habatu, kaya tinumbay ya, "Alwan hay alan hakita' nangangaylangan duktur, nu alwan hay mayin hakit. Nakuwaku kayti taêmén bawgêna' mawmakasalanan alwan hay libun matuynung."

Hay Tanung Tungkul ha Pagtatalagan Ahê Mangan takay Makanunghung Ma-hampata' Panginuin (Mateo 9:14-17; Lucas 5:33-39)

¹⁸ Hin nagtalagan ahê mangana' tagahunul Juan ya Tagapagbawtismu buy Pawpariseo takay makanunghung mahampata' Panginuin, nagdaniya' umnuy tawu kan Apu Jesus buy nagtanung, "Angkaya hay libun tagahunul Juan buy libun Pariseo nagtalagan ahê mangan nuwa hay kayung tagahunul, alwa?"

¹⁹ Tinumbay hi Apu Jesus, "Maari kayan magtalagan ahê mangana' libun awyun ha kasalan kaban awyun la puna' liyaking ikasal? Simpri, ahê!

20 Nuwa lumatêng mêtâ' allêw, kuwên kanlay liyaking ingkasal, baistu pun hilan magtalagan ahê mangan."

21 Innunghung na pun ha pag'iitbuh, "Ala pun nanagpin bayun tila ha lumay baru ta nu mangulêtén, kumamhaka' gihi.

22 Ala mêt namisalin bayun alak ha daan balata' pamiantiyan, pagal, paputukun alaka' balat, mitambuka' alak buy mahiray balata' pamiantiyan. Ha halip, isalina' bayuy alak ha bayun balata' pamiantiyan."*

Hay Tanung Tungkul ha Allêw Pamamahinga

(Mateo 12:1-8; Lucas 6:1-5)

23 Ghay Allêw Pamamahinga, kaban nalyalyaku hilan Apu Jesus, napadan hila ha triguan, nipantén triguy kanan tagahunul buy kinan la.

24 Naakit Pawpariseo kaya ambala la, "Balayén tuy tawtagahunul mu! Ah la tanday impapagbawala' habatu ha Allêw Pamamahinga?"

25 Tinumbay hi Apu Jesus kanla, "Ah yu nabasa ha kasulatana' ginawan ninunu tamung hi Haring David? Hin binitil hila buy kanan libun kaawyun buy ala hilan maêkan,

26 nagpahuk hi Haring David ha Biyag Apu Diyus ta kinan nay tinapaya' in'alay pari kan Apu Diyus. Bayu binyan na puna' libun awyun na maski ayun pun ha kaukuhan, hay libun pari diliya' mayin karapatan mangan habatu. Nangyariya' ati hin puun pari pun hi Abiatar."

27 Buy sinabin Apu Jesus kanla, "Ginaway Allêw Pamamahinga para ha tawu, alwan ginaway tawu para ha Allêw Pamamahinga.

28 Ta hakun nangibat ha langita' In'anak Tawuy mayin kapangyarian mannunghung nu hita dapat gaw'en ha Allêw Pamamahinga."

3

Hay Liyaking Paralisaduy Gihay Gamêt

(Mateo 12:9-14; Lucas 6:6-11)

* **2:22** Innunghung Apu Jesus ya libun pag'iitbuha' ati ta itudu kanlay ahê puwidin pihaluuna' libun intudu na buy hay daana' intudun Hawjudio.

1 Nagpahuk uman hi Apu Jesus ha biyag pamititipunan Hawjudio. Mayin gihay liyaki istu, paralisaduy gihay gamêt.

2 Allêw Pamamahingan habatu, kaya binantayan mahampat hi Apu Jesus Pawpariseo, takay'êmén mayin hilan maibintang laban kana. Ta nu pagalingin nay liyakin bantu ha Allêw Pamamahinga, pan bawal ha kautuhan la.

3 Ambalan Apu Jesus ha liyaking paralisaduy gihay gamêt, "Kalika kayti kangku."

4 Pagkayari, tinanung nay Pawpariseo, "Hita kaya impapahintulut kautuhan ha Allêw Pamamahinga, hay manggawan mahampat u manggawan malaêt? Hay maglitas biyay u mamati?" Nuwa alwa hilan tinumbay.

5 Matigasa' u la kaya puut yan namalay kanla nuwa lungkuta' natanam na. Binatalay nay liyaki ta innunghung na, "Ituynung tuy gamêt mu!" Ginumalinga' gamêt na buy naituynung nay ati.

6 Nag'aliha' Pawpariseo. Nakipagkagiha agad ha tawtawung Haring Herodes nu pakapakun lan ipapati hi Apu Jesus.

Hinunul Madlan Tawu hi Apu Jesus ha Pingit Dagat

7-8 Naku hi Apu Jesus buy tawtagahunul na ha pingit Dagat Galilea. Hinumunul kanay kadlan tawu ibat ha prubinsiyan Galilea, Judea buy Idumea. Mayin mêt ha banwan Jerusalem, ha kalagpak Ilug Jordan, buy ha palibut bawbanwan Tiro buy Sidon. Ta nabalit'an tawtawuy ginagawa na.

9 Ta ha kadlan tawu, ambalan Apu Jesus ha tawtagahunul na, "Mamihanda kawu paraw gihay bangka taêmén mayinakun mapagtukluwan nu mandalêhêkhêkana' dêlan tawu."

10 Madlan pinagaling hi Apu Jesus, kaya dinalêhêkhêk yan laat mayin hakit takay'êmén madukpan yan dili.

11 Nu nanakit yan libun tawung sinusuklutan anitu, naglulukub hila kana buy naggubung'u, "Hakay Anak Apu Diyus!"

12 Nuwa mahigpit hilan binawalan Apu Jesus, “Ah yu sabin ha kanayun nu hitalagyuwaku.”

Namili hi Apu Jesus Labinluway Tagahunul Na
(Mateo 10:1-4; Lucas 6:12-16)

13 Pagkayari, hinumukpa hi Apu Jesus ha bung'uy. Nakun, binawēg nay labinluway tawung labay nan pilin, ambala na, “Kali kawu kayti.” Nagdani hila kana.

14 “Hakawun labinluway napili ku, bawgēn kun alagad takay makaawayun ku buy mautuhan kun mangaral.

15 Biyan katawun kapangyarihana' mamaalih anitu.”

16 Ati ya labinluway pinili na, hi Simona' binawēg Pedro,

17 hilan Santiago buy Juan ya aw'anak Zebedeo ya binawēg nan Boanerges hay labay sabin aw'anak kilat.

18 Hay kanayun, hi Andres, hi Filipe, hi Bartolome, hi Mateo, hi Tomas, hi Santiago ya anak Alfeus, hi Tadeus, buy hi Simon ya makabanwa,

19 buy hi Judas Iscariote ya naypakabili kan Apu Jesus hin bandan huli.

Hi Apu Jesus buy hi Beelzebul
(Mateo 12:22-32; Lucas 11:14-23; 12:10)

20 Pangulin Apu Jesus buy tawtagahunul na ha biyaga' pamirmiyan na, ah lay na maarap mangan, ta nanguman nipanlumatēng dēlan tawu.

21 Hin nabalit'an pamilyan Apu Jesus ya, ginagawa nan ati, sinundu yay na, ta ambalan tawtawu, “Nag'iibay nay kanan panghiipan.”

22 Mayinanamêt nalatēng kanan tagapanudun kautuhan ibat ha Jerusalem, buy ambala la, “Sinusuklutan yan Beelzebul*, pinakamatag'ay ha aw'anitu. Buy ati ya nanam'in kapangyarian kanan mamaalih aw'anitu.”

23 Kaya, binawēg Apu Jesus ya libun tawu buy nakinunghung ya kanla ha pamimighitan pag'iitbuh, “Magawa kayan Satanas ya paalihina' kaparihu na? Simpri, ahê.

* **3:22 Beelzebul:** Hi Satanas ya ati.

24 Nu hay gihay puun, mipapati buy mimihiyay kanan nasasakupan, bumagsaka' pamumunu na.

25 Habatu mēta' nangyayari nu nipapatiya' mitatalanak ha gihay biyag.

26 Kaya nu hi Satanas buy kanan kawkaparihu mipapati buy mimihiyay, bumagsak ya mēt buy ahêy na makaibangun pun.

27 Nuwa, hi Satanas maarin maitbuh ha malakasa' tawu. Ah maarin pahukun magnanakawa' biyag na nu ah ya pun gapuhun. Nu maigapuh yay na, maari yay nan matakawan.”

28 “Pakalēng'ên yuy inunghung ku kayu, hay laat kasalanan buy hitalagyumana' mannunghung malaêt laban kan Apu Diyus, maarin mapatawad.

29 Nuwa, hitalagyumana' mannunghung malaêt laban ha Ispiritun Apu Diyus, alway nan mapatawad. Hay dapay atiya' kasalanan, ahêy na mapatawad makanuman.”

30 Habatuy ambalan Apu Jesus ta ambalan tawtagapanudun kautuhan, “Naanitu hi Apu Jesus.”

Hay Indu buy Pawpatêl Apu Jesus
(Mateo 12:46-50; Lucas 8:19-21)

31 Buy inlumatēng'a indu buy pawpatêl Apu Jesus. Nakaêdēng hila ha mahawang buy impabawēg ya.

32 Dēlan tawuy nangakaitnu ha paligid Apu Jesus. Mayin nannunghung kana, “Dilag ha mahawanga' indu yu buy pawpatêl yu, impapabawēg kawu.”

33 Tinumbay hi Apu Jesus, “Tanda yu, nu hita indu ku buy pawpatêl ku?”

34 Binalay nay tawtawu ha paligid na, buy ambala, “Hakawuy indu ku buy pawpatêl ku!

35 Ta hitalagyumana' hinuhumunul ha kaluuban Apu Diyus, habatuy indu ku buy pawpatêl ku.”

4

Hay Paghaharin Apu Diyus Maitbuh ha Mamibulaglag Bini
(Mateo 13:1-9; Lucas 8:4-8)

¹ Nanudun uman hi Apu Jesus ha pingit Dagat Galilea. Ta ha kadlan tawung naka-paikut kana, naghakay ya ha gihay bangka buy baistu yan nitnu. Pan hay tawtawuy naman natayak ha pingit dagat.

² Dêla yan intudun pag'iitbuh kanla. Ambala na,

³ "Manlêngê kawu! Mayin gihay man-anêm namibulaglag bini.

⁴ Ha kanan pamibulaglag, mayin baw-binin nanabu ha diyan. Inlumatênga' aw'ibun ta tinuktuka' binin bantu.

⁵ Mayin mêt nanabuy bini ha kabatuwana' mayin makayêka' luta. Agad tinumubuy bini, ta manipisa' luta.

⁶ Nuwa hin nasikatan allêwa' ati buy naumutan, nayanguy ati ta alwan malalêy yamut.

⁷ Mayinanaman binin nanabu ha lamuna' madiwi. Inlumbunga' lamun, pinagkêhkêhana' tinumubuy bini kaya ah ya nanagêy.

⁸ Hay kanayuna' naman nanabu ha matabay luta. Tinumubuy ati, inlumagu buy nanagêy. Mayin katamtaman diliya' tagêy, hay kanayuna' naman dêla, hay kanayuna' naman matagêy."*

⁹ Pagkayari, innunghung Apu Jesus, "Hakawun libun nanlêlêngê, dapat yun pakaihipina' innunghung kun ati."

Angkaya Ginagamita' Pag'iitbuh?

(Mateo 13:10-17; Lucas 8:9-10)

¹⁰ Hin nakaulyayanay tawtawu, nag-tanunga' labinluway tagahunul na buy umnuy awyun la, nu hita labay tutulun pag'iitbuh bantu.

¹¹ Ambalan Apu Jesus kanla, "Impatanda kuy na kayuy lihim ha paghaharin Apu Diyus, nuwa ha kanayun, impahayaga' ati ha pag'iitbuh.

¹² Ginagawa kuy ati takay matupada' dilag ha kasulatan Apu Diyus,

'Mamatay man hilan mamalay, ah hila makaakit.

Manlêngê man hilan manlêngê, ah hila makatêbék.

Ta nu matêbék la, dat magsisi hila ha kan-lan kawsalanan

Buy patawarên hilan Apu Diyus.' "

Hay Kaulugan Pag'iitbuh Mamibulaglag Bini

(Mateo 13:18-23; Lucas 8:11-15)

¹³ Pagkayari, ambalan Apu Jesus kanla, "Nu ah yu matêbêka' pag'iitbuha' ati, pakapakun yun matêbêka' kanayun pun pag'iitbuh?

¹⁴ Hay binin imbulaglag, in'itbuh ha nunghung Apu Diyus.

¹⁵ Hay diyana' kinanabwan bini, in'iitbuh ha libun tawung nanlêlêngê nunghung Apu Diyus nuwa agad nalatêng hi Satanas, inagawa' nunghung Apu Diyus ya nalêngê la.

¹⁶ Hay mabatuy rugala' namana' kinan-abwan bini, in'iitbuh ha libun tawung hin nalêngê nunghung Apu Diyus, natulan tinanggap la agad.

¹⁷ Nuwa alwan mataimtim ha pusu lay pagtanggap haati. Kaya ah nagtagala' kan-lan pananampalataya. Paglatêng kairapan u pag'uusig ta ha pananampalataya la ha nunghung Apu Diyus, agad hilan nagpatalibukut ha kanlan pananampalataya."

¹⁸ "Hay lutang mayin lamuna' madiwi ya kinanabwan bini, in'iitbuh ha libun tawung nanlêlêngê nunghung Apu Diyus.

¹⁹ Nuwa ha libun alalahinan ha biyay, paghahangad yumaman buy paghahangad ha bawbagaya' nanakit ha mundu, naliliwan lay nunghung Apu Diyus. Kaya ah nananagêya' nunghung Apu Diyus ha biyay la.

²⁰ Nuwa hay matabay lutang pinay-bulaglagan bini, in'iitbuh ha tawtawung nanlêlêngê nunghung Apu Diyus buy nanananggap ati. Kaya nananagêya' ati. Mayin kanayun, katamtaman diliya' tagêy, hay kanayuna' naman dêla, hay kanayuna' naman matagêy."

Hay Pag'iitbuh ha Dêkêt

(Lucas 8:16-18)

²¹ Ambalan Apu Jesus kanla, "Alan magsindin dêkêt buy pagkayariy ihanip ha pamiantiyan u ha hilung pag'undagan.

* **4:8 Mayin katamtaman diliya' tagêy, hay kanayuna' naman dêla, hay kanayuna' naman matagêy.** Ha Griego, "Masaganay tagêy, mayin tig tatlumpu, mayin animnapu buy gihan daan."

Alwa nan ipaluntuy dêkêt ha paypaluntuwan?

²² Habatu mêtâ' naman, alan nakatagung ahê malantad, buy alan lihima' ahê mabunyag ha mahawang.

²³ Hakawun nanlêlêngê, dapat yun pakaihipina' innunuhung kun ati."[†]

²⁴ Ambala na pun, "Unawaén yun ma-hampata' kayung nalêlêngê kangku. Hay panyukata' ginamit yu ha kanayun, habatu mêtâ' gamitin kayu buy higit pun istu."[‡]

²⁵ Ta hay tawung hinuhumunul ha nalêlêngê nan kapêtêgan, biyan pun pagkatêbêk. Nuwa hay tawung ahê hinuhumunul ha kapêtêgan, maski hay makayêka' natêbêk na, kêwên pun kana."

Hay Pag'iitbuh ha Binin Tinutumubu

²⁶ Ambalan Apu Jesus, "Hay paghaharin Apu Diyus, maiitbuh ha tawung namibulaglag bini ha gahak na.

²⁷ Kaban magtarabahu ya ha allêw buy natutuluy ya ha yabi, hay binin imbulaglag nay tinutumubu, maski ah na tanda nu pakapakun.

²⁸ Hay lutay nagpapatubu buy nagpapatagêy ha tanêm. Sinumibula' bini bayu nagkauhay.

²⁹ Buy pagnawtuy na, agad aniin ta panawunanan anian."

Hay Pag'iitbuh ha But'un Mustasa

(Mateo 13:31-32, 34; Lucas 13:18-19)

³⁰ Ambala pun Apu Jesus, "Haantu tamu pun kayan maitbuha' paghaharin Apu Diyus? Hita pag'iitbuha' gamitin tamu haati?

³¹ Dapay mêt atin but'un mustasa§, pinakamakayêk ha laata' but'u.

³² Nuwa nu maitanêmana buy tumubu, tumag'aya' ati, higit pun ha kanayun tanêm. Maski aw'ibun, makapaghala'y ha lêpêt ati."

³³ Impangaral Apu Jesus ya nunghung Apu Diyus ha dêlan pag'iitbuha' dapay ati, nuwa ha kaya lan matêbêk.

[†] 4:23 **Hakawun nanlêlêngê, dapat yun pakaihipina' innunuhung kun ati.** Ha Griego, "Hay mayin têka' nakakalêngê, dapat manlêngê." [‡] 4:24 **Hay panyukata' ginamit yu ha kanayun, habatu mêtâ' gamitin kayu buy higit pun istu.** Hay ibig sabin, biyan kawun Apu Diyus pagkatêbêk ayun ha kayung panlêlêngê buy lalu na pun dagdagana' pagkatêbêk yu. [§] 4:31 **mustasa:** Hay mustasan intatanêm ha bansan Israel mamhak, alwan dapay mustasa ha Pilipinas. Mayin tag'ay labinluway talampakana' puun ati.

³⁴ Alwa yan nangangaral ha libun tawu nu alwa yan ginugumamit pag'iitbuh, nuwa impapaliwanag nay naman ha libun tagahunul na, nu kakapad la.

Pinatgên Apu Jesus ya Daluh

(Mateo 8:23-27; Lucas 8:22-25)

³⁵ Kinayabinan, ambala na ha tawtagahunul na, "Magbatah kitamu ha lipay dagat."

³⁶ Kaya inibuwanan tawtagahunul nay tawtawu buy naghakay mêt hila ha bangkan hinahakyen Apu Jesus. Mayin pun bawbangkan hinuhumunul kanla.

³⁷ Biglan inlumatêng' malakasa' dawêp. Sinabungkay mangamhaka' aluna' bangkang hinahakyen la, halus mapnun lanêma' ati.

³⁸ Hi Apu Jesus, dilag ha bukutan, natutuluy yan nakaunan. Buy pinukaw yan libun tagahunul na, "Mistru, lumbug kitamuy na! Ala ha ihip yuy ati?"

³⁹ Kaya napukaw ya buy ambala na ha dawêp, "Tênggên ka!" Buy ambala na ha dagat, "Tumingin ka!" Ta tinênggên baya' dawêp buy tinumininga' dagat.

⁴⁰ Ambala na ha tagahunul na, "Angkaya kawu nalilimu? Awta, ala kawun pananampalataya kangku?"

⁴¹ Nikalimu hila, buy ninununuhung, "Hitalagyay kayay ati? Maski dawêp buy dagat, hinuhumunul ha utuh na."

5

Pinagaling Apu Jesus ya Tawung Sinuklutan Anitu

(Mateo 8:28-34; Lucas 8:26-39)

¹ Inlumatêng hilan Apu Jesus buy tawtagahunul na ha lipay dagat ha lutang libun Geraseno.

² Pagtabuy Apu Jesus ha bangka, hinatalubung yan gihay liyaking sinuklutan anitu ibat ha liyanga' lêbêngan.

³ Buy istu yay nan namimirmi ha lêbêngan. Alan makagapuh kana maski pun kadinay gamitin la.

⁴ Umnuy bisis yay nan kinadinaan ha gamêt buy bitih. Nuwa pinagbubuytu nay kadina buy pinaghîhira nay tanikala ha gamêt na. Alay nan makabênbêk kana.

⁵ Allêw ta yabi, dilag ya ha lêbêngan buy kabung'uyanan, nagbubung'u buy pinaghuhugat nan bawbatuy nawini na.

⁶ Hin natamulaw hi Apu Jesus liyaki, in-lumukhu yan nagdani kana ta nagluhud.

⁷⁻⁸ Ambalan Apu Jesus ha anitu, "Haka anitu, mag'alih ka ha tawung in!" Malakasa' imbung'un liyaki, "Hita pakialam mu kangku, Apu Jesus ya Anak Katag'ay tag'ayan Apu Diyus. Mangaku ka kangku, ha lagyun Apu Diyus, ah mu ku pairapan."

⁹ Tinanung yan Apu Jesus, "Hita lagyu mu?"

Tinumbay ya, "Hakuy kawan ta dêla kami."

¹⁰ Nagmamakaingaluy anitu kan Apu Jesus, "Andi yu kami paalihin ha lutan ti."

¹¹ Ha alwan kadayuan, mayin nanangana mamhaka' kawan babuy, ha dalisdis bud.

¹² Nagmakaingalu hila, "Nu puwidi paulayan yu kami yanan magpahuk ha libun babuya' tu."

¹³ Kaya pinaulayan hilan Apu Jesus. Nag'alih hila ha liyaki ta nagpahuk ha libun babuy. Nipanlumukhuy luwan libuy babuy palunghun ha bud, patabuy ha dagat buy nangalêmeh.

¹⁴ Hay mangalagan babuya' naman, nipanlumukhu buy imbalitay nangyari angga ha banwa. Kaya naku istuy tawtawu taêmén matandana' nangyari.

¹⁵ Pangalatêng la kan Apu Jesus, naakit lay liyaking ibat sinuklutan anitu ya pakaitnu. Nakabaru yay na buy matinuy nay ihip. Buy nalimuy tawtawu ha kapangyarian Apu Jesus ya nakapagpaalih anitu.

¹⁶ Hay nangyari ha tawung sinuklutan anitu buy ha bawbabuy, ingkuwintun nakaakit ha tawtawung kapilatêng.

¹⁷ Kaya pinakinunghungan la hi Apu Jesus, "Mag'alih kawuy na kayti kanyan."

¹⁸ Hin maghakayana hi Apu Jesus ha bangka, nakinunghung kanay liyaking ginumaling, "Makiawyun hakuy na kayu."

¹⁹ Nuwa alwan nalabay hi Apu Jesus. Nakun, ambala na ha liyaki, "Muli ka tana kayu, ta ibalita mu kanlay laata' ginawa kamun Panginuun buy nu pakapakun kan kinaingalwan."

²⁰ Kaya nag'aliha' liyaki, impamalita na ha sampung banwa nu bawgêni' Decapolis, hay laata' ginawa kanan Apu Jesus. Nalganga' laata' nakalêngêng nangyari.

Hay Anak Jairo buy hay Babaying Dina-daya

(Mateo 9:18-26; Lucas 8:40-56)

²¹ Hin nagbalik hi Apu Jesus ha lipay dagat, pinibubuntunan yan kadlan tawu ha pingit dagat.

²² Hi Jairong namumunu ha biyag pamititipunan Hawjudio, naku mêt istu. Pagkaakit na kan Apu Jesus, nagluhud ya ha bitihan ati.

²³ Nagmakaingalu ya kana, "Apu Jesus, naghihingaluy anak kun dalagita'. Nu maari hana, maku kawu kanyan ta ipatung yuy gamêt yu kana takay'êmén gumaling ya buy mabyay ya."

²⁴ Hin nakilaku ya kana, hinunul yan kadlan tawu buy dinalêhêkhêkan ya.

²⁵ Mayin gihay babayi istuy labinluwan tawunanan dinadaya.

²⁶ Maski nagpapagamut ya ha iba iban duktur, nag'iirap ya pun. Naubuha' laat ari arian na ha pagpapagamut na. Nuwa, ha halipa gumaling ya, lalu pun inlumalay hakit na.

²⁷ Nabalit'an nay libun himalan ginawan Apu Jesus. Kaya nakipag-dalêhêkhêkan ya ha tawtawu. Naku ya ha bukutan Apu Jesus taêmén madukpana' baru na.

²⁸ Ta naihip babayi, "Nu madukpan kun diliya' baru na, gumalingakuy na."

²⁹ Hin nadukpan na ba barun Apu Jesus, biglan tinênggêna' kanan pagdadaya buy natanam nan ginumaling yay na.

³⁰ Agadanaman natanam Apu Jesus ya mayin inlumabas kanay kapangyarian. Kaya namalingay ya buy nagtanung, "Hita nandukpa ha baru ku?"

³¹ Ambala kanan tawtagahunul na, "Ha kadlan nakipagdalêhêkhêk kayu, angkaya

kaw pun magtanung nu hita nandukpan
baru yu?"

³² Nuwa inêlêw'êlêw nay paligid, nu hita
nandukpan baru na.

³³ Nuwa hay babayi, ta tanda nay
nangyayari kana, nagdani yan nalilimu
buy ginagagal. Nagluhud ya kana, bayu
innunghung kanay pêtêg.

³⁴ Pagkayari, ambala kanan Apu Jesus,
"Anak, pinagaling kay nan kamung
pananampalataya. Muli kay na. Ah kay na
mag'alala ta ala kay nan hakit."

³⁵ Kaban kanunghung pun Apu Jesus
ya babayi, nalatêngâ' tawtawung ibat ha
biyag Jairo. Ambala la kan Jairo, "Ah yuy
na abalaêna' Mistru ta natianay anak yu!"

³⁶ Nuwa hin nalêngê Apu Jesus ya
innunghung la, ambala na kan Jairo, "Ah ka
malimu, manampalataya kan dili."

³⁷ Ah na pinaulayan manghunul kanay
kanayun ha biyag Jairo, nu alwan hilan
Pedro, mipatêla' Santiago buy Juan.

³⁸ Paglatêng la istu ha biyag Jairo, naakit
Apu Jesus ya libun tawung nagkakaingay,
mayin nananangih buy nanyêyêngêyêng.

³⁹ Pagpahuk na ha biyag, innunghung
na ha libun tawu, "Kaya kawu nagkakain-
gay buy nananangih? Alwan natiya' anak,
natutuluy dili."

⁴⁰ Pinagkakayliyan yan tawtawu. Hin
pinalabas na hilan laat, in'awyin na
diliya' bapa buy indun anak buy tatluy
tagahunul na bayu hila nagpahuk ha
pag'undagan anak.

⁴¹ Dinukpan nay gamêt anak, ambala na,
"Talitha kum." Hay labay tutulun habatu,
"Anak, mibangun ka."

⁴² Agad, nibanguna' anak buy nallyaku'.
Kaya labis nalganga' tawtawu ha nang-
yari. (Hay habatuy anak, labinluway
tawun.)

⁴³ Nuwa mahigpit in'utuh kanlan Apu Jesus
ya, "Andi yu sabin maski ha hitalagyuma-
na'nangyari." Pagkayari, ambalan Apu
Jesus kanla, "Pakanêna yu nay anak."

6

*Ahê Tinanggap hi Apu Jesus ha Nazaret
(Mateo 13:53-58; Lucas 4:16-30)*

¹ Nuli hi Apu Jesus ha kanan sariling
banwa. Hinumunul kanay tawtagahunul
na.

² Paglatêng Allêw Pamamahinga, naku
ya ha biyag pamititipunan Hawjudio buy
nanudu ya istu. Nalganga' tawtawung
nanlêngê kana buy ambala, "Haantu na
kayan nakuway katalinuwanan in?
Buy hita katalinuwana' atiya' in'ibi kana?
Pakapakun ya nanggagawan makapagtaka?

³ Alwa nan hiyay karpintirun anak
Maria, pawpatêl na hilan Santiago, Jose,
Judas buy Simon? Alwa nan kayti mêt
namimirmiya' pawpatêl nan babayi?"
Kaya ah ya pinanlêlêng'an.

⁴ Ambalan Apu Jesus kanla, "Hay gi-
hay tagapannunghung Apu Diyus, ingga-
galang maski haantu. Nuwa ha sarili nan
banwa buy ha kanan kamag'anak buy ha
pamilya, ah ya inggagalang."

⁵ Habatuy dahilan kaya uumnuv na-
gawa nan himala istu. Ta hay ginawa na
tana, impatung nay gamêt na ha umnuv
mayin hakit taêmên mapagaling hila.

⁶ Nagtaka ya ha kawal'an lan pananam-
palataya.

Inutuhan Apu Jesus ya Labin Luway Tagahunul

(Mateo 10:5-15; Lucas 9:1-6)

Inlibut Apu Jesus ya bawbaryu ta nan-
garal ya ha tawtawu.

⁷ Binawêg nay labinluwa' nan tagahunul
ta inutuhan nan luwa luwa. Binyan hilan
kapangyarihana' magpaalih anitu.

⁸ Buy inbilin kanla, "Ah kawu mantan
hitalagyuman ha kayung paliyaliyaku,
maski hitalagyumana' maêkan, pira u bag.
Mantan kawu tanan tukud."

⁹ Maari kawun magsuut sandalyas,
nuwa ah kawu mantan pagpalita' baru.

¹⁰ Nu pinatuluy kawu ha gihay biyag,
baistu kawu tanan mamirmi' angga ha
mag'alih kawu ha rugala' tu.

¹¹ Nu ah kawu tanggapen u panlêng'an
ha gihay rugal, mag'alih kawu istu buy
ipagpag yuy abu ha bitih yu bilang babala
laban kanla."

¹² Kaya nag'alih hila takay mangaral ha
tawtawu. Innunghung la, "Magsisi kawu
ha kawkasalanay yu."

¹³ Buy pinaalih lay madlan anitu ya sinumuklut ha tawtawu. Pinuyukan lan langisa' dêlan mayin hakit buy ginumaling.

Hay Pagkamatin Juana' Tagapagbawtismu
(Mateo 14:1-12; Lucas 9:7-9)

¹⁴ Nabalit'an Herodes ya tungkul kan Apu Jesus ta kilalan kilala yay na maski haantu. Mayin umnuy nannununghung, "Hiya hi Juan, nabyay yan uman. Kaya nakakagawa yan hawhimala."

¹⁵ Ambalay naman kanayun, "Hiya hi Elias' tagapannunghung Apu Diyus hinlagi."

Mayin nannununghung kanayun, "Giha ya ha tagapannunghung Apu Diyus, dapay tawtagapannunghung na hinlagi."

¹⁶ Nuwa hin nabalit'an Haring Herodesa habatuy innununghung tawtawu, ambala na, "Hi Juana' habayin, ya pinutuhan kun u nabyay uman."

¹⁷ Hinhatu kasi, pinupunan Juana' pakikitakpin Haring Herodes kan Herodias ya bayaw na, ya ahawan Felipe.

¹⁸ Panay yan pinannununghungan Juan, "Alwan tamay kuwén moy ahawan paté mu." Kaya impadakép Haring Herodes hi Juan buy impakulung na.

¹⁹ Nangimkim puut hi Herodias kan Juan, ta labay nan ipapati. Nuwa ah na magawa. Ta ahê malabay hi Haring Herodes.

²⁰ Nalilimu hi Haring Herodes kan Juan. Tanda nan matuynung buy banala' tawung ati, kaya impagtatanggul na. Maski naguguluy nakém na ha tinutul Juan, natutula ya pun manlêngê kana.

²¹ Nuwa inlumatêng mēta' pagkakatawuna inéêtêng Herodias. Kaalléwan hinhatun Haring Herodes kaya nagdaus yan mamhaka' ukasyun. Kinumbida nay libun nanunungulan ha Galilea, libun matag'ay ha sawsundalung Romano, buy kanayun puna' kilalan tawu istu.

²² Hin urasanan kasiyaan, nagpahuka' anaka' dalagan Herodias ta naghayaw. Labisa' tulan Haring Herodes buy bawbisita na, kaya ambalan Haring Herodes ha dalaga, "Mikikuwa ka kangkun maski hitalagy, ibi ku kamu."

²³ Buy impangaku na kana, "Hitamana' ipikikuwa mu kangku, ibi ku, maski kalahati pun kayamanan kaharian ku."

²⁴ Kaya naglabas puna' dalaga, nagtannung ha indu na, "Hita ipikikuwa ku kana?"

Buy ambalan indu na, "Hay un Juan ya Tagapagbawtismu."

²⁵ Kaya nagmadalin nagbalika' dalaga kan Haring Herodes, "Labay ku hapaëg mét, ipaluntu yu ha bandihaduy un Juan ya Tagapagbawtismu buy ibi yu kangku."

²⁶ Labisa' atin ingkalungkut Haring Herodes, nuwa ah ya makatanggi ha dalaga ta nangaku ya ha mangalêngê bawbisita.

²⁷ Kaya agad nan impalakuy gihay sundalu ha bilangguan takay kuwéna' un Juan. Nakuy sundalu istu ta tinupadanay in'utuh Haring Herodes kana.

²⁸ Impaluntu nay un Juan ha bandihadu. In'abut na ha dalaga ta in'ibi nay naman ha indu na.

²⁹ Hin nabalit'an libun tagahunul Juan ya nangyari, kinwa lay nawinin ati buy in'êlbêng.

Pinakan Apu Jesus ya Higit Liman Libuy Tawu

(Mateo 14:13-21; Lucas 9:10-17; Juan 6:1-14)

³⁰ Nagbalika' libun inutuhan Apu Jesus ya mangaral, ta ingkuwintu la kanay laata' ginawa buy impangaral la.

³¹ Ha kadlan tawung inlumatêng buy nag'aalih, alay na hilan uras mangan man. Kaya ambalan Apu Jesus ha tawtagahunul na, "Ibwatan tamu puna' libun tawung ati. Maku kitamu ha kalinangan taêmên makapaghinga kawun sandali."

³² Kaya naghakay hila ha gihay bangka ta naku hila ha kalinangan.

³³ Nuwa hin nag'alih hila, dêlan nakaakit buy nakakilala kanla. Kaya mabilisa naman naliyakuy tawtawu ibat ha iba iban banwa, palaku ha rugala' lakwun lan Apu Jesus. Buy nauna pun hilan inlumatêng istu.

³⁴ Kaya hin nagtabuy hi Apu Jesus ha bangka, naakit nay kadlan tawu. Kinaingalwan na hila, ta dapay hilan tupan alan pastul. Buy tinudwanan hilan dêlan bagay.

³⁵ Hin bandan hapunana, nagdani kan Apu Jesus ya libun tagahunul na. Buy ambala la, "Mistru, kalinangananay ati buy inyuyumabiyana.

³⁶ Paliyakunun yuy na hila ha kalagpak baryu taêmén makahaliw hilan maêkan."

³⁷ Nuwa ambalan Apu Jesus kanla, "Hakawuy mamakan kanla."

Tinumbay hila, "Mistru, manyaliw kami pun ipakan kanla? Pan abut walun buyana' alagan sahuda' panyaliw maêkan la!"

³⁸ Tinanung hilan Apu Jesus, "Umnuy tinapaya' dilag kayu? Bâlayên yu paraw."

Hin binalay la, ambala kan Apu Jesus, "Lilimay tinapay buy luluway isda."

³⁹ Pagkayari, inutuhan na hila, "Paitnun yu hilan guru gurupu ha kalamunan."

⁴⁰ Kaya nitnu hilan guru gurupu tig lilmampu buy tig gigihandaan.

⁴¹ Kinwan Apu Jesus ya limay tinapay buy luway isda, bayu naningal ya ha langit ta nagpasalamat kan Apu Diyus. Kaban pinagbih'il bih'il nay tinapay, kinumadlay ati, in'ibi na ha tawtagahunul na takay iibi ha libun tawu. Habatu mëta' ginawa na ha luway isda.

⁴² Nangan hilan laat buy nangabhuy.

⁴³ Pagkayari lan nangan, tinipun lay nitlay tinapay buy isda ta nakapnu hilan labinluway baskit.

⁴⁴ Hay nakapangan tawtinapay, liman libuy kaliyakiyan.*

Nalliyaku hi Apu Jesus ha Babun Lanêm (Mateo 14:22-33; Juan 6:15-21)

⁴⁵ Pagkayari, pinahakay agad Apu Jesus ya tawtagahunul na ha bangka ta pinanay na hila ha banwan Betsaida, ha lipay dagat. Kaban hay libun tawuy naman, pinauli nay na.

⁴⁶ Hin nakapagpatanda yay na ha libun tawu, hinumukpa yay na ha bung'uy takay manalangin.

⁴⁷ Hin yabiyan, gigihan nanalangin hi Apu Jesus. Dilaga' naman ha gitnan daga't bangkang tawtagahunul na.

⁴⁸ Naakit nay tawtagahunul nan irap manyagwan, ta nakasalungat hila ha

dawêp. Hin hawang hawangana', nanghunul kanla hi Apu Jesus ya nalliyaliyaku ha babun lanêm. Lampasan na hana hila.

⁴⁹⁻⁵⁰ Nuwa, hin naakit tawtagahunul nan nalliyaliyaku ya ha babun lanêm, indap la anitu kaya nalimu hila buy nagbubung'u. Nuwa nannunghung agad hi Apu Jesus, "Hakuy ati, ah kawu malimu. Lakasan yuy luub yu."

⁵¹ Naghakay hi Apu Jesus ha bangka buy biglan tinênggêna' dawêp. Kaya nalgang hila.

⁵² Maski naakit la puna' himalan ginawan Apu Jesus ha tinapay, alwa la pun natêtêbêka' kapangyarian na, ta matigasa' pusu la.

Pinagaling Apu Jesus ya Libun Mayin Hakit ha Genesaret (Mateo 14:34-36)

⁵³ Hin nakabatahana hila ha dagat, nalatêng hila ha lutang Genesaret. Baistu lan insadsada' bangka.

⁵⁴ Pagtabuy la, agad nakilala hi Apu Jesus libun tawu istu.

⁵⁵ Kaya nag'aapura hilan naku ha palibut rugal. Haantu la man mabalit'an dilag hi Apu Jesus, gigintan la kanay libun mayin hakita' dilag ha kalapayan.

⁵⁶ Nu haantu ya man maku, ha baryu, banwa u bukid, gigintan tawtawuy mayin hakit ha pinagtutipunan tawtawu. Nagmamakaingalu hila kan Apu Jesus, ambala la, "Mistru, nu maari madukpan yan hanay tampuh kayung baru." Buy hay laat nakadukpa kana, ginumaling.

7

Hay Kawkaugaliyan (Mateo 15:1-9)

¹ Mayin nagdani kan Apu Jesus ya Pawpariseo buy libun tagapanudun kau-tuhana' ibat ha Jerusalem.

² Naakit lay umnuy tagahunul Apu Jesus, ah hila hinuhumunul ha nakaugaliyan ninunu la ta nanangan hilan ahê nag'uuyah gamêt.

³ Hay Hawjudio laluy nay libun Pariseo, ahê pun mangan nu ahê pun mag'uuyah

* ^{6:44} Ha Judio hinhatu, kalyakan diliya' binibilang. Nuwa pinakan mëta' babayi buy anak.

gamêt, bilang paghunul ha kaugaliyan kanlan ninunu.

⁴ Alwa pun hilan nanangan hitalagyumanâ' hinaliw la ha palingki anggan ah la pun ginagaway rituwal ha paglilinis*. Madla pun hilan kaugaliyana' nambuh ati, pag'uuyah tawtasa, pag'uuyah pawpitsil buy pag'uuyah pamiantiyana' tansu.

⁵ Kaya tinanung yan Pawpariseo buy libun tagapanudun kautuhan, "Angkaya, ahê hinuhunul tawtagahunul muy libun kaugaliyan ninunu, ahê hila nag'uuyah gamêt bayu mangan."

⁶ Tinumbay hi Apu Jesus kanla, "Pêtêga' impasulat Apu Diyus kan Isaias tungkul kayung pakitan tawun dili, 'Inggagalangakun tawtawung ati ha bêbêy la dili,

nuwa hay pusu la, madayu kangku.

⁷ Alan alagay pagsamba la kangku, ta hay intutudu lay aw'utuh dilin tawtawu.'

⁸ Pinaulayan yuy utuh Apu Diyus ta hay hinuhunul yuy kaugaliyan tawtawu."

⁹ Ambalan Apu Jesus, "Mahampat kawun mamaulay libun utuh Apu Diyus takay'êmén mahunul yuy libun kaugaliyan yu.

¹⁰ Nambuh hin tinutul Moises, 'Igalang yuy kayung mangatuwa' buy 'Hay man-nunghung malaêt ha kanan mangatuwa, dapat patin!'

¹¹ Nuwa intutudu yuy namana' hay ibi hana ha mangatuwa yu, ibi tana kan Apu Diyus.

¹² Ah yuy na hila pinapaulayana' makatulung ha kanlan mangatuwa.

¹³ Ta ha paghunul yu ha kaugaliyana' minana' yu ha kayung ninunu, napaulayan yuy nay utuh Apu Diyus. Buy madla kaw pun ginagawan dapay ati."

Hay Nagpaparumi ha Tawu (Mateo 15:10-20)

¹⁴ Binawêg uman Apu Jesus ya tawtawu buy ambala kanla, "Manlêngê kawun laat buy pakaihipin yun mahampata' nunghungun ku kayu.

¹⁵ Alwan hay nagpapahuk ha bêbêy tawuy nagpaparumi kana ha pamalayan

Apu Diyus nu alwan hay inlulumabas ha bêbêy na."

¹⁶ Hakawung libun nanlêlêngê pakai-hipin yuy ati!

¹⁷ Hin inibwatan nay dêlan tawu, naga-pahuk ya ha biyag ta nagtanung kanay tawtagahunul na, "Hita labay tutulun pag'iitbuh bantu?"

¹⁸ Ambalan Apu Jesus kanla, "Awta, kaya ah yu mét natêbêk? Ta ah yu tanday hitalagyumana' kanê tawuy alwan habatuy makapagparumi kana?

¹⁹ Ta hitalagyumana' kanêna, alwan ha pusu nan nanaku nu alwan ha bituka na. Buy ilabas nay habatu." Hin innunghunga' atin Apu Jesus, impahayag na, "Puwidin kanêna' laata' maêkan."

²⁰ Ambala na pun, "Hay nangingibat ha pusun tawu, habatuy nagpaparumi kana ha pamalayan Apu Diyus.

²¹ Ta ha pusun tawu nangingibata' mangalaéta' pag'ihip, nag'uudyuk kanan mak-itakêh ha alwa nan ahawa, manakaw, matati,

²² mamitêtêpêl, manyakim buy mang-gawan laata' kamalaêtan nambuh pandaraya, kabastusan, pagkainggit, panghi-hira ha kaparihu, pagyayabang buy kamulaaan.

²³ Hay laat mangalaéta' ati, nangingibat ha pusun tawu buy nagpaparumi kana."

Hay Pambahirang Pananampalatayan Babaying Alwan Judio (Mateo 15:21-28)

²⁴ Hin nag'alih hi Apu Jesus, naku ya ha rugal madani ha banwan Tiro. Paglatêng na istu, nakituluy ya ha gihay biyag. Ahê na hana labay ipatanda ha tawtawung dilag ya istu, kayan dili nabalit'an mét.

²⁵⁻²⁶ Nakun, mayin gihay babaying alwan Judio. Taga Fenicia ya, sakup Syria. Buy mayin anaka' babayi, sinuklutan anitu. Hin matandan nan dilag hi Apu Jesus, agad nan inlaku. Ta naglukub ya ha bitihan na, bayu nagmaikaingalu, "Apu Jesus, paalihin yuy anitu ha anak ku."

²⁷ Nuwa, tinumbay hi Apu Jesus ha gihay pag'iitbuh, "Dapat pun pakanêna' anak ta

* **7:4 rituwal ha paglilinis:** Maarin hay paglilinis, ha nangaliw u ha hinaliw.

alwan taman kuwêna' maêkan anak ta itambuk ha dawdêwêng."†

28 Nuwa tinumbaya' babayi, "Tama kawuy, Apu Jesus. Kayan dili, maski dawdêwêng ha hilung panganan, nanangan mumun nananabun anak."

29 Kaya ambalan Apu Jesus kana, "Ha innunghung mun in, muli kay na ta nag'alihanay anitu ha anak mu."

30 Nuli yay na, natalêng nay anak na ha undagan, inibwatan yay nan anitu.

Pinagaling Apu Jesus ya Gihay Pipyiana Bingi Pun

31 Pagbalik Apu Jesus ibat ha banwan Tiro, dinuman ya ha banwan Sidon buy ha Decapolis‡. Pagkayari, nagtuluy ya ha Dagat Galilea.

32 Baistu, gintan kanan tawtawuy gihay liyaking pipiyana bingi pun. Nakinunghung hila kan Apu Jesus, "Apu Jesus, ipatung yuy gamêt yu ha liyaki takay'êmên gumaling ya."

33 Indayu pun Apu Jesus ya liyaki ha tawtawu. Ta impahuk nay dawdaliri na ha luway têk liyaki. Bayu tinupayan nay daliri na ta impuyuk ha dilan ati.

34 Naningal hi Apu Jesus ha langit, buy nakatipuhung inawanêñ buy ambala ha liyaki, "Effata!" Hay labay tutulun, "Mabuksan!"

35 Nakalêngê agada' liyaki buy nakapanunghung yan mahampat.

36 Pinagbilinan nay tawtawu, "Andi yu ipamalitay nangyari." Nuwa maski innunghung na, lalu la pun ingkalata' ati.

37 Nalgangana' libun tawu, buy ambala la, "Mahampata' namana' laata' ginagawa na! Nakapannunghunganay pawpipi, nakalêngê nay bawbingi."

8

Hay Pamamakan ha Apata' Libun Tawu (Mateo 15:32-39)

1 Pagkayarin umnuy allêw, nititipun umana' tawtawu kan Apu Jesus. Hin alay na hilan maêkan, binawêg nay tawtagahunul na, ambala na,

† 7:27 Innunghung Apu Jesus ya ati takay'êmên ipaihip ha babayi, kaylangan na pun manulung ha Hawjudio buyu ha alwan Judio. ‡ 7:31 **Decapolis:** Ibig sabin sampung banwa.

2 "Naiingaluwaku ha tawtawung ati. Ta tatluy allêw kuy na hilan awyun, alay na hilan maêkan.

3 Nu paulin kuy naman hilan bitilin, dat mahilu hila ha diyan ta madayu puna' ibatan kanayun kanla."

4 Tinumbaya' tawtagahunul na, "Haantu kitamun mangwan maêkan kayti ha kalinnangan, maiibi ha kadlan tawtawung in?"

5 Tinanung hilan Apu Jesus, "Umnuy tinapaya' dilag bahêñ kayu?"

Ambala la, "Pitu."

6 Pinaitnun Apu Jesus ya tawtawu ha luta. Kinwa nay pituy tinapay bayu nagsalamat kan Apu Diyus. Pagkayari, binih'il bih'il nay ati buy kinumadla. Bayu in'ibi na ha tawtagahunul na buy impag'iibi ha tawtawu.

7 Mayin mêt hilan umnuy mangkayêka' isda. Pinasalamatan mêt Apu Jesus ya habatu buy in'utuh nan ipag'iibi mêt ha tawtawu.

8 Nangan hila buy nabhuy. Pagkayari, tinipun lay nitla ta nakapnu hilan pituy baskit.

9 Apatalibun tawuy nakapangan. Pagkayari, pinauli hilay nan Apu Jesus.

10 Ta agad yan naghakay ha bangka awyuna' tawtagahunul na. Bayu naku hila ha banwan Dalmanuta.

Nakikuwan Himalay Pawpariseo (Mateo 16:1-4)

11 Paglatêng la baistu, mayin nipanlumatêngâ' Pawpariseo ta nakipagtalu kan Apu Jesus. Labay yan subukan, kaya hiniling lan magpaakit yan himala ibat kan Apu Diyus takay mapapêtgana' sugu yan Apu Diyus.

12 Nuwa, nakatipuhung malalê hi Apu Jesus. Ambala na, "Angkaya nanangkap himalay tawtawu ha panawuna' ati? Pakalêng'en yuy inunghung ku kayu, alan hitalagyumana' himalan ipaakit kayu."

13 Pagkayari, inibwatan nay na hila. Naghakay ya ha bangka buy nagbatah ha lipay dagat.

Hay Pampaalsan Pawpariseo buy Haring Herodes

(Mateo 16:5-12)

¹⁴ Naliwan tawtagahunul Apu Jesus ya mantan dêlan tinapay. Gigihay baun lan tinapay ha bangka.

¹⁵ Nagbilin hi Apu Jesus kanla, "Mag'ingat kawu ha pampaalsan Pawpariseo buy Haring Herodes."

¹⁶ Ninununghunga' tawtagahunul Apu Jesus, "Innunghung nay habatu ta ala kitamun gintana' tinapay."

¹⁷ Tandan Apu Jesus nu hitalagyuy pinununghungan la, kaya innunghung na kanla, "Angkaya yu pinununghungan' ala kawun gintana' tinapay? Ah yu pun natataandan u natêtêbék? Matigas puna' pusu yu?

¹⁸⁻¹⁹ Mayin kawun mata, nuwa ah yu nanaakit. Mayin kawun têk, nuwa ah yu nalêlêngê. Naliwan yuy na hin pinagbih'il bih'il kuy limay tinapay para ha liman libuy tawu? Umnyu baskita' napnu yu ha nitlay tinapay?"

Tinumbay hila, "Labinluway baskit!"

²⁰ "Hin pinagbih'il bih'il kuy pituy tinapay para ha apatalibuy tawu, umnyu baskita' napnu yu ha nitlay tinapay?"

Tinumbay hila, "Pituy baskit!"

²¹ Buy ambalan Apu Jesus kanla, "Ah yu pun natêtêbêka' labay kun tutulun kayu?"

Pinagaling Apu Jesus ya Liyaking Bulag ha Betsaida

²² Paglatêng la ha banwan Betsaida, mayin nantan gihay liyaking bulag kan Apu Jesus. Nagmakaingalu hila, "Apu Jesus ipatung yuy gamêt yu kana takay'êmên gumaling ya."

²³ Kaya tinambay Apu Jesus ya liyaki palabas Betsaida. Paglatêng la ha mahawang, tinupayan nay gamêt na buy impuyuk na ha matan liyaki. Bayu impatung nay gamêt na ha liyaki buy nannunghung, "Mayin kay nan nanaakit?"

²⁴ Naningala liyaki buy ambala, "Nakakaakitakuy nan tawtawu, kayan dili dapay hilan pawpuun kayung nallyalyaku."

²⁵ Kaya impatung uman Apu Jesus ya gamêt na ha matan liyaki. Pagkayari,

namalay mahampata' liyaki buy hinumawanganay kanan pamalayan.

²⁶ Pinauli yay nan Apu Jesus nuwa binilinan ya, "Ah kay na magbalik ha Betsaida."

Hay Pahayag Pedro Tungkul kan Apu Jesus

(Mateo 16:13-20; Lucas 9:18-21)

²⁷ Naku hi Apu Jesus buy kanan tagahunul ha bawbaryun sakup banwan Cesarea ha Filipos. Kaban nalliyaliyaku hila, tinanung Apu Jesus ya kanan tawtagahunul, "Hitalagyuwaku kanuh ambalan tawtawu?"

²⁸ Tinumbay hila, "Mayin nanununghung, hakawu kanuh hi Juan ya Tagapagbawtismu. Mayin mêt nanununghung, hakawu kanuh hi Elias ya tagapannunghung Apu Diyus hinlagi. Hay kanayunanaman nannununghung, giha kaw mêt kanuh ha tawgapannunghung Apu Diyus."

²⁹ Tinanung hilan Apu Jesus, "Nuwa para kayu, hitalagyuwaku?"

Tinumbay hi Pedro, "Hakawuy Criston impangakun Tagapagligtas."

³⁰ Ambalan Apu Jesus kanla, "Ah yu ipatanda maski ha hitalagyumana' hakuy Cristo."

Hay Unan Pagpapahayag Apu Jesus Tungkul ha Kanan Kamatiyan

(Mateo 16:21-28; Lucas 9:22-27)

³¹ Nag'umpisan mangaral hi Apu Jesus ha tawtagahunul na, "Hakuy nangibat ha langita' In'anak Tawuy kaylangan magdanas madlan pag'iirap. Itakwilakun pawpuun Judio, libun namamaalan pari buy tawtagapanudun kautuhan. Ipapatiyaku, nuwa ha ikatlun allêw, mabyay uman."

³² Impaliwanag nay laata' ati kanla. Hin malêngêng Pedroy habatu, tinambay na hi Apu Jesus ha gihay pingit buy pinannunghungan.

³³ Nuwa inumarap hi Apu Jesus ha kanan tawtagahunul buy ambala kan Pedro, "Mag'alih ka kayti! Tinutuksu mu kun dapay kan hi Satanas! Hay iniihip muy alwan ha labay Apu Diyus nu alwan ha labay tawu!"

³⁴ Pagkayari, binawêg nay tawtawu buy tawtagahunul na. Ambala na kanla, "Hitalagyumana' labay humunul kangku, dapt liwanan nay kanan sariling labay. Buy handa nan arapêna' maski kamatiyan dapay pamamasan krus alang alang ha paghunul na kangku.

³⁵ Ta hay tawung naghahangad magligtas kanan biyay, mawal'an ati. Nuwa hay tawung naghahangad mag'alay kanan biyay alang alang kangku buy ha Mahampata' Balita, magkarun biyay ya alan anggan.

³⁶ Hita mapalan gihay tawu nu mapakana mana' laata' bagay ha mundu, nuwa ah nay naman makuway biyay ya alan anggan?

³⁷ Ta alan maiibiya' tawu takay makuwa nay biyay ya alan anggan.

³⁸ Nu haku buy tawtudu kuy ikadêng'êy hitalagyuman, ha panawuna' atin makasalanana' tawtawu buy alwan tapat kan Apu Diyus, ikadêng'êy ku ya mét nu hakuy nangibat ha langita' In'anak Tawuy mapakayti, taglaya' kapangyarian kangkun Bapa buy awyuna' bawbanala' anghil."

9

¹ Ambalan Apu Jesus kanla, "Pakalêng'ên yuy inunghung ku kayu. Mayin umnu kayuy ahê mati anggan ah la pun maakita' paghaharin Apu Diyus ya mayin kapangyarian."

Hay Pagbabayun Anyun Apu Jesus (Mateo 17:1-13; Lucas 9:28-36)

² Pagkalibah anima' allêw, in'awyin Apu Jesus hilan Pedro, Santiago buy Juan ha gihay matag'aya' bung'uy, kakapad la istu. Kaban nakabalay hila kan Apu Jesus nagbayuy kanan anyu.

³ Nagin puting putiya' baru na, makasilaw balayêñ. Alan hitalagyuman kayti ha munduy makapagpaputin dapay habatu.

⁴ Baistuy nagpakit kanla hi Elias buy hi Moises. Buy nakinunghung hila kan Apu Jesus.

⁵ Innunghung Pedro kan Apu Jesus, "Mistru, mahampata' dilag kitamu kayti! Manggawa kamin tatluy atêp. Giha para

kayu, gihay para kan Moises, gihay para kan Elias!"

⁶ Nanunghung nay ati ta ha subran limula, ah na tanday kanan sabin.

⁷ Pagkayari, tinakpan hilan ulap. Buy mayin hilan nalêngêy busisa' nangibat ha ulapa' nannunghung. "Atiya' minamaal kun anak. Panlêng'an yu ya!"

⁸ Agad hilan namalay ha paligid nuwa alay na hilan naakit nu alwan hi Apu Jesus.

⁹ Hin palunghunana' hila ha bung'uy, kinanunghung hilan Apu Jesus, "Ah yu sabina' naakit yu ha hitalagyuman anggan hakuy nangibat ha langita' In'anak Tawuy ahê pun nabyay uman."

¹⁰ Kaya ah la innunghung ha hitalagyuman' pangyayarin ban tu. Hin kakapad lay na, ninununghung mét hila nu hita labay nan nunghungun ha pagkabyay uman.

¹¹ Nagtanung hila kan Apu Jesus, "Angkaya innunghung tawtagapanudun kautuhana' magbalik pun hi Elias bayu lumatêng'a Criston impangakun Apu Diyus."

¹²⁻¹³ Tinumbay ya kanla, "Pêtêga' habayin, kaylangan pun makalatêng'a dapay kan Elias takay'êmê ihanday laata' bagay. Nuwa sabin ku kayu, 'Pêtêga' inlumatêngana hi Elias buy ginawan tawtawuy labay lan gaw'ên kana, dapay mét ha nakasulat tungkul kana ha kasulatan.' Nuwa, antakaya nasusulat mét, hakuy nangibat ha langita' In'anak Tawuy magtiis dêlan irap buy itakwil tawtawu?"

Pinagaling Apu Jesus ya Anaka' Sinuklutan Anitu (Mateo 17:14-21; Lucas 9:37-43)

¹⁴ Paglatêng lan Apu Jesus ha kanayun nan tawtagahunul, naakit lan dêlan tawuy nititipun baistu. Dilag mét baistuy umnuv tawtagapanudun kautuhan, nakikiribati ha tawtagahunul Apu Jesus.

¹⁵ Hin naakit la hi Apu Jesus, nalganga' tawtawu buy palukhung nagdani ta namati kana.

¹⁶ Tinanung Apu Jesus ya tawtagahunul na, "Hita pinagriribatian yu?"

¹⁷ Mayin gihay liyaking tinumbay, "Mistru, gintan ku kayti ya anak kun liyaki ta pinapipi yan anitu.

18 Nu sinusuklutan yan anitu, natutumba ya, nagbubulay bêbêy na, nangêngértékêta' ngêpêñ na buy naninigasa' buun nawini na. Nakinunghungaku ha tagahunul yun paalihin lay anitu nuwa ah la kaya."

19 Ambalan Apu Jesus kanla, "Hakawung lawlahin alan pananampalataya! Anggan makanuwaku pun magtiis kayu? Gitan yu kaytiya anak."

20 Kaya gintan lay anak kan Apu Jesus. Nuwa, hin naakit anitu hi Apu Jesus, pinamêgpêg nay anak buy binumagsak ha luta, pinagulung gulung buy binubumulay bêbêy.

21 Tinanung Apu Jesus ya bapan anak, "Nakanu ya pun nagkapakun?"

Tinumbaya' bapa, "Ibat pun hin makayêk ya.

22 Ma dasas yan intutumban anitu ha apuy buy ha lanêm takay'êmên mapati ya. Nuwa nu mayin kawun magawa, kainggalwan yu kami!"

23 Tinumbay kana hi Apu Jesus, "Antakaya mu innunghung, nu mayin nakun magawa? Hay laata' bagay magawa ha tawung mayin pananampalataya kangku."

24 Tinumbay agada' bapan anak, "Nananampalataya haku kayu, nuwa kulang pun. Dagdagan yu puna'pananampalataya ku kayu!"

25 Hin maakit Apu Jesus ya kinukumadlay nay tawung inlulumatêng, pinannunghungan nay anitu buy ambala, "Hakan anituy nagpapapipi buy nagpabbingi ha anaka' ati, inuutuhan katan mag'alih kana. Ah kay na magbalik kana!"

26 Nagbung'uy anitu, pinamêgpêga' anak bayu nag'alih. Nambuh natiya' anak. Kaya ambalan kadlan, "Nati yay na!"

27 Nuwa dinukpan Apu Jesus ya gamêt anak buy impaêdêng na. Nêdênga' anak.

28 Hin nagpahuk hilan Apu Jesus ha biyaga' inuulian la, tinanung yan tawtagahunul na, hin kakapadlay na, "Angkaya ah yan mapaaliga' anitu?"

29 Tinumbay kanla hi Apu Jesus, "Hay habatuy kalasin anitu, panalangin diliya' makapagpaalih kana."

*Hay Ikalawan Pagpapahayag Apu Jesus Tungkul ha Kanan Kamatiyan
(Mateo 17:22-23; Lucas 9:43b-45)*

30 Nag'alih hila ha rugal bantu buy dinuman ha prubinsiyan Galilea. Ahê labay Apu Jesus ya matandan tawtawung dilag ya istu

31 ta tinutuduwanan nay tawtagahunul na. Ambala na kanla, "Hakuy nangibat ha langita' In'anak Tawuy ipakabili ha tawtawu. Patin la ku nuwa mabiyayakun uman pagkalibah tatluy allêw."

32 Nuwa alwa lan natêbêka' ambala na buy nalimu hilan magtanung kana.

*Hitalagyuy Pinakadakila?
(Mateo 18:1-5; Lucas 9:46-48)*

33 Nakalatêng hila ha banwan Caper-naum. Buy hin dilagana hila ha biyag, tinanung hilan Apu Jesus, "Hitalagyuman pinagriribatian yu nangun ha diyan?"

34 Alwa hilan sinumagut ta hay pinagriribatian la nu hitalagyuy pinakadakila kanla.

35 Kaya nitnu hi Apu Jesus ta binawêga' labinluway tagahunul buy ambala kanla, "Hitalagyuman kayuy labay magin pinakadakila ha laat, dapat mag-pakayêpa buy magin lingkud laat."

36 Nangwa hi Apu Jesus gihay makayêka' anak buy pinaêdêng ha gitna la. Inampun nay ati ta innunghung na kanla,

37 "Nu hitamana' mananggap ha anaka' dapay ati ha pananampalataya na kangku, dapay hakuy nay tinanggap na. Buy hitamana' mananggap kangku, alwan hakun diliya' tinanggap na nu alwan hay naysugu mêt kangku."

*Kagampi Tamuy Alwan Laban Kantamu
(Lucas 9:49-50)*

38 Ambalan Juan kan Apu Jesus, "Mistru, nakaakit kamin tawung namamaalih anitu ha lagyu yu. Binawalan yan hiya ta alwa tamu yan kaawayu."

39 Nuwa ambalan Apu Jesus, "Ah yu ya bawalan ta alan nanggagawan himala ha lagyu ku bayu mannungung malaêt tungkul kangku."

40 Hay alwan laban kantamu, kagampi tamu.

41 Pakalêng'ên yuy inunghung ku kayu, hitamana' mam'in gihay basun lanêm kayu ta hakuy Criston hinuhunul yu, siguradun makakuwan gantimpala."

*Libun Dahilan Pagkakasala'
(Mateo 18:6-9; Lucas 17:1-2)*

42 "Nuwa hitalagyuma' pinangibatan pagkakasalan gihay makayêka' anak'a nanampalataya kangku, mangêd puna' itagkêh ha bêng nay mamhaka' batu* ta itambuk ya ha dagat.

43-44 Nu gamêta' pinangibatan kamung pagkakasala', putuhun mu! Mangêd puna' gigihay gamêt mun magpahuk ha langita' mayin biyay ya alan anggan kisira ha luway gamêt mu nuwa maku kay naman ha impirnu, nu haantuy alan kamatiyana' apuy."

45-46 "Nu bitih tuy namana' pinangibatan pagkakasala', putuhun mu! Mangêd puna' gigihay bitih mun magpahuk ha langita' mayin biyay ya alan anggan kisira ha luway bitih mu nuwa itambuk kay naman ha impirnu."

47 "Nu hay mata tuy pinangibatan pagkakasala', dukutun mu! Mangêd puna' gigihay mata mun magpahuk ha langita' mayin biyay ya alan anggan kisira ha luway mata mu nuwa itambuk kay naman ha impirnu.

48 Baistu ha impirnu, hay libun êwêl ahê nanati buy hay apuy ahê napapalêng."

49 Ta balan gihay tawu, makaranas pag'iirap dapay kênan ahinan buy êwêkên ha apuy.

50 Mangêd puna' ahin ta malaha, nuwa nu tumab'anga' namana' ati, hita pamalahayun uman? Iitbuu yuy sarili yu ha ahina' pamalahayun sangkatauhan takay magkarun kawun kapayapaan ha gihat giha."

10

*Hay Tudun Apu Jesus Tungkul ha Pamihiyay Miahawa
(Mateo 19:1-12; Lucas 16:18)*

1 Nag'alih hi Apu Jesus ha Capernaum, naku ha prubinsiyan Judea buy nagbatah

ya ha Ilug Jordan. Buy baistu, inlaku yan madlan tawu. Dapay mêt daan, nanudu ya kanla.

2 Mayin umnuuy Pariseong naku kana taêmên subukan ya. Kaya nagtanung hila, "Pinauulayan kayan kautuhan Moises ya mikihiyaya' liyaki ha kanan ahawa?"

3 Tinanung mêt hilan Apu Jesus, "Hitalagyuy in'uutuh kayung Moises?"

4 Tinumbaya' Pawpariseo, "Pinaulayan Moises ya bayu mikihiyaya' liyaki ha kanan ahawa, manggawa ya pun kasulan pamikihiyay."

5 Innunghung kanlan Apu Jesus, "In'ibin Moises kayuy kautuhan ban in gawan mangatigasa' u yu.

6 Nuwa ha umpisa puna' inlikhan Apu Diyusa' mundu, ginaway nay liyaki buy babayi.

7 Gawan kayti, ibwatan liyakiya' kanan mangatuwa ta makiawyin ya ha kanan ahawa.

8 Buy hilan luway magin giha. Kaya alway na hilan luwa nu alwan giha tana.

9 Kaya hay piniawyin Apu Diyus, alwan dapat pihyayen tawu."

10 Paglatêng la ha biyag, tinanung hi Apu Jesus tawtagahunul na tungkul ha pamihiyay miahawa.

11 Ambala na kanla, "Nu hiyayan liyakiy kanan ahawa ta mag'ahawan kanayun, nakikitakpi ya buy nagkasala ya ha una nan ahawa.

12 Habatu mêtea' babayi, nu mikihiyay ya ha kanan ahawa ta mag'ahawan kanayun, nakikitakpi ya mêt."

*Pinagpalan Apu Jesus ya Mangkayêka' Anak
(Mateo 19:13-15; Lucas 18:15-17)*

13 Gintan tawtawuy mangkayêka' anak kan Apu Jesus taêmên ipamanuy anak kana buy pagpalaen. Kayan dili, pinagbawalan hilan tawtagahunul na.

14 Hin naakit Apu Jesus ya nangyari, napuut ya ha tawtagahunul na. Ambala na, "Paulayan yun magdani kangkuy aw'anak. Andi yu hila pagbawalan ta dapay kanlay pagharian Apu Diyus."

* **9:42 mamhaka' batu:** Ha Griego, gilingan batu.

¹⁵ Pakalêng'ên yuy inunghung ku kayu, "Hay ahê mananggap ha paghaharin Apu Diyus dapay pagtanggap ha anaka' makayêk, ahê pagharian Apu Diyus."

¹⁶ Pagkayari, inampun nay aw'anak, pinamanu buy pinagpala hila.

Hay Mayamana' Liyaki

(Mateo 19:16-30; Lucas 18:18-30)

¹⁷ Hin paalihana hi Apu Jesus, mayin gi-hay liyaking palukhung nagdani kana buy nagluhud. Nagtanung ya, "Mahampata' Mistru, hitalagyuy gaw'ên ku takay'êmén magkarunakun biyay ya alan anggan?"

¹⁸ Tinumbay hi Apu Jesus, "Angkaya mu tinutula mahampataku? Hi Apu Diyus diliya' mahampat.

¹⁹ Tungkul ha tanung mu, tanda muy innunghung kautuhan. 'Andi ka mamati. Andi ka makitakpi. Andi ka manakaw. Ah mu papêtégana' alwan pêtég. Andi ka mandaya. Igalang muy kamung bapa buy indu.'"

²⁰ Sinumaguta' liyaki, "Mistru, ibat hin anakaku pun, hinunul kuy nay laat ban in."

²¹ Binalay yan Apu Jesus ya mayin pag-mamaal buy ambala, "Gihay bagay puna' kulang kamu. Muli ka buy ipaghaliw muy laata' kayamanan mu buy ibi muy pira ha mangairap taêmén mab'iyan kan kayamanan ha langit. Pagkayari humunul ka kangku."

²² Katangih tangiha' liyaki hin nalêngê nay ati. Buy nag'alih yan malungkut ta napakayaman na.

²³ Namalay hi Apu Jesus ha paligid buy ambala ha tawtagahunul na, "Napakairap ha mayamana' magpasakup ha paghaharin Apu Diyus."

²⁴ Nagtaka hila ha innunghung Apu Jesus. Nuwa innunghung uman Apu Jesus, "Aw'anak, napakairap talagan magpasakup ha paghaharin Apu Diyus.

²⁵ Mas madali pun magpahuka' gihay kamilyu ha lubut karayum kisira ha magpasakup'a mayaman ha paghaharin Apu Diyus."

²⁶ Lalu pun nagtakay tawtagahunul na kaya nagtanung hila, "Nu habatu, hita pun aluda' miligtas?"

²⁷ Binalay hilan Apu Jesus buy ambala, "Ahê kayan iligtas tawuy kanan sarili nuwa kayan gaw'ên Apu Diyus ta hitalagyuman, kaya nan gaw'ên."

²⁸ Ambala kanan Pedro, "Magpakan kamiya' naman? Inibwatan yananay laat buy hinumunul kami kayu."

²⁹ Tinumbay hi Apu Jesus, "Pakalêng'ên yuy inunghung ku kayu. Hay tawung nangibwat biyag, pawpatêl, mangatuwa, aw'anak u luta dahilan kangku buy ha Mahampata' Balita,

³⁰ gihandaan bisis nan matanggapa' inibwatan na, kaawyuna' pag'iirap, kaban dilag ya pun kayti. Nuwa ha lumatêng'a panawun, mab'iyan yan biyay ya alan anggan.

³¹ Nuwa hay tawung nagpapakatag'ay hapaêg, lumatêng'a allêw mipakayêpa. Buy hay tawung nipakayêpa hapaêg, hiyay mitag'ay paglatêng allêw."

Hay Ikatlun Pannununghung Apu Jesus ha Kanan Kamatiyan

(Mateo 20:17-19; Lucas 18:31-34)

³² Kaban pahukpa hila palakun Jerusalem, nauuna kanla hi Apu Jesus. Nagtakay tawtagahunul na buy nalimuy naman ya kanayuna' hinuhumunul kana. Impaalibun Apu Jesus ya labinluway tagahunul na, ta innunghung nan umana' mangyari kana.

³³ "Manlêngê kawu! Pahukpa kitamuy nan Jerusalem. Ta hakuy nangibat ha lantita' In'anak Tawuy iibi istu ha libun mamaalan pari buy ha tawtagapanudun kautuhan. Hatulan nakun kamatiyan buy iibi ha alwan Judio.

³⁴ Insultuun la ku, tupayan, paghahampasen buy patin. Nuwa ha ikatluy allêw, mabiayakun uman."

Hay Kahilingan Santiago buy Juan

(Mateo 20:20-28)

³⁵ Nagdani kan Apu Jesus hilan Santiago buy Juana' anak Zebedeo. Nannunghung hila, "Mistru, mayin kami hanan kayêk labay."

³⁶ Ambalan Apu Jesus, "Hita labay yu?"

³⁷ Sinumagut hila, "Hana, nu maghari kawuy na, makaitnu kami mêt ha dani yu, giha ha kanan buy giha ha kaliwa."

³⁸ Nuwa innunghung kanlan Apu Jesus, “Ah Yu tanda nu hita impipikikuwa Yu. Kaya Yu kayan tiisina' pagdurusan tiisin ku? Kaya Yu kayay irapa' danasen ku?”

³⁹ Sinumagut hila, “Awu, kaya yan.”

Ambalan Apu Jesus, “Pete'ga' matiis yuy laata' ati.

⁴⁰ Kayan dili, alwan hakuy mamili nu hita mitnu ha kanan ku buy ha kaliwa ku. Hay aw'itnuwana' ati, para dili ha pinaglaanan kangkun Bapa.”

⁴¹ Hin natandan sampuy tagahunul nu hita impipikikuwan mipatêl, napuut hila kan Santiago buy Juan.

⁴² Kaya binawêg Apu Jesus ya laata' tagahunul na, ta innunghung, “Tanda Yu, hay intuturing pawpinunun alwan Judio, impapaakit lay kapangyarihan la ha libun tawtawung nasasakupan la. Buy maski hitalagyin labay la, nahuhunul nasasakupan la.”

⁴³ Nuwa alwa kawun dapat habatu. Ha halip, hitalagyin labay magin dakila, dapat magin lingkud Yu.

⁴⁴ Buy hitalagyuman kayuy labay magin pinunu, dapat magin alipen laat.

⁴⁵ Haku baya' nangibat ha langita' In'anak Tawuy naku kayti ha luta, alwan hakuy pinaglilingkuran nu alwan hakuy naglingkud kayu. Buy ibi kuy biyay ku takay'êmén mahagêp kuy madlan tawu ha kaparusaan.”

Nakaakit Agada' Bulaga' hi Bartimeo (Mateo 20:29-34; Lucas 18:35-43)

⁴⁶ Inlumatêng hilan Apu Jesus ha banwan Jerico. Buy hin paalih yay na istu, kaawyun nay kanan tawtagahunul buy madla pun kanayun, nadanan lay gihay bulaga', hi Bartimeo, anak Temeo. Nakaitnu ya ha pingit diyan buy namamalimus.

⁴⁷ Hin nalêngê nay dinuduman hi Apu Jesus ya tiga Nazaret, nagbubung'u ya, “Apu Jesus, lahin Haring David, kaingalwan Yu ku!”

⁴⁸ Binawalan yan tawtawu, “Tênggên kay na.”

Nuwa lalu pun inlumakasa' bung'u na, “Apun Haring David, kaingalwan Yu ku!”

⁴⁹ Tinênggên hi Apu Jesus ta innunghung, “Bawgênu ya.”

Kaya binawêg la hi Bartimeo buy innunghung, “Matula ka. Mêdêng ka ta im-papabawêg kan Apu Jesus.”

⁵⁰ Imbalag Bartimeyoy kanan balabal ta agad nagdani kan Apu Jesus.

⁵¹ Tinanung yan Apu Jesus, “Hita labay mun gaw'en ku kamu?” Tinumbay ya, “Mistru, labay kun makaakit.”

⁵² Innunghung Apu Jesus kana, “Pinagaling kay nan kamung pananampalataya, muli kay na.” Nakaakit ya agad bayu hinumunul ya kan Apu Jesus ha diyan.

11

Hay Matagumpaya' Pagpahuk Apu Jesus ha Jerusalem

(Mateo 21:1-11; Lucas 19:28-40; Juan 12:12-19)

¹ Hin palaku hilan Apu Jesus ha banwan Jerusalem, tinênggên hila ha Bung'uy Aw'ulib*, madani ha bawbaryun Betfage buy Betania. Pinaunan Apu Jesus ya luway tagahunul na.

² Ambala na kanla, “Maku kawu ha humunula' baryu. Paglatêng Yu istu, maakit yuy gihay bisirun asnu, nakatagkêh, ahê pun nahakyen hitalagyuman. Kalagênu yuy ati ta gitan Yu kayti.

³ Nu mayin magtanung nu angkaya Yu kalagêna' asnu, sabin Yu kanla, ‘Kaylangan Panginuun ta ibalik yan agad.’”

⁴ Kaya, naliyakuy luwa, buy naakit la baya' asnu ha danin diyana' nakatagkêh ha luwahan biyag. Hin kinalagan lay ati,

⁵ tinanung hilan tawtawung nakaédêng istu, “Antakaya Yu kinakalaga asnu ban in?”

⁶ Innunghung lay ambalan Apu Jesus, kaya pinaulayan hilan tawtawu.

⁷ Gintan lay asnu kan Apu Jesus, buy sinapinan lan balabala' bukut asnu bayu naghakay hi Apu Jesus.

⁸ Madlan tawuy nay'amak kanlan balabal ha diyan. Hay kanayuna' naman, nay'amak mêt hawhangan pinutuh la ha bukid.

* **11:1 Bung'uy Aw'ulib:** bung'uya' dêlan puun ulibu u ulibu

⁹ Hay libun nauuna kan Apu Jesus buy hay libun hinuhumunul kanay nagbubung'u, "Purihin hi Apu Diyus! Pagpalaen nay impagtan Panginuun!"

¹⁰ Buy pagpalaen Apu Diyusa' inlumatenga'hari, dapay ha nunu tamung hi Haring David. Purihin tamu hi Apu Diyus ya dilag ha langit!"

¹¹ Paglateng Apu Jesus ha Jerusalem, naku ya ha timplu. Tinatamulaw nan mahampata' laata' bagay istu. Gawan payabiyana, naku ya ha Betania, kaawyun nay labinluwa' nan tagahunul.

Insumpa Apu Jesus ya Puun Igus (Mateo 21:18-19)

¹² Kinaybukanan, hin nag'alih hila ha Betania, binitil hi Apu Jesus.

¹³ Mayin yan naakita' malabunga' puun igus. Kaya dinaninan na buy binalay nu mayin tagey. Nuwa ala yan naakit nu alwan puru dawen, ta ahê pun panawun igus.

¹⁴ Innunghung Apu Jesus ha puun, "Ibat hapaeg, alay nan makaekan tagey mu." Nalengen tawtagahunul nay habatu.

Hay Pagemalasakit Apu Jesus ha Timplu

(Mateo 21:12-17; Lucas 19:45-48; Juan 2:13-22)

¹⁵ Paglateng la ha Jerusalem, naku hi Apu Jesus ha timplu. Naakit nay nagtitinda buy nanyayaliw istu. Kaya intabuy na hila. Impagpapalukub nay lawlamisan mamalit pawpirang alwan tiga istu buy itnuwan nagtitindan kawkalapating in-hahandug ha timplu.

¹⁶ Binawalan nay tawtawung nanantan paninda ha timplu.

¹⁷ Pagkayari, tinudwanan nay tawtawu istu. Ambala na, "Alwa nan innunghung Apu Diyus ha kasulatan, 'Hay kangkun biyag, magin biyag dalanginan laata' bansa.' Nuwa ginawa yun punduan manakaw."

¹⁸ Nabalist'an libun namamaalan pari buy tawtagapanudun kautuhana' ginawan Apu Jesus, kaya nangkap hilan paraan nu pakapakun yan patin. Nuwa nalilimu hila kana ta hinuhumangay libun tawu ha tudu na.

¹⁹ Kinayabinan nag'alih hi Apu Jesus ha Jerusalem awyun nay tawtagahunul na.

Hay Aral Ibat ha Nayanguy Puun Igus (Mateo 21:20-22)

²⁰ Kinadatunan, hin pabalikana' hila ibat ha Jerusalem, nadanan lay puun igus ta naakit lay nayanguy nay ati.

²¹ Naihipan Pedroy nangyari. Kaya innunghung na, "Mistru, balayen yuy puun igusa' insumpa yu. Nayanguy na!"

²² Innunghung Apu Jesus kanla, "Manalig kawu kan Apu Diyus!

²³ Pakaleng'en yuy innunghung ku kayu, nu mayin kawun pananalig, maarin nunghungun yu ha bung'uya' ati, 'Maglipat ka ha dagat!' Nu ah kawu magluway ihip buy manalig kawun mangyariya' habatu, mangyari baya' innunghung yu.

²⁴ Tandaan yuy ati. Hitalagyumana' ipikikuwa yu ha panalangan, manalig kawun matanggap yuy nay ati ta matanggap yuy na bay.

²⁵ Nu manalangan kawu, patawaran yu puna' nagkasala kayu takay'êmén patawaran kaw mêt kayung Bapan hi Apu Diyus ha kayung kawkasalanan.

²⁶ [Ta nu ah kawu magpatawad, ah kaw mêt patawaran kayung Bapan hi Apu Diyus.]

Hay Tanung ha Kapangyarihan Apu Jesus (Mateo 21:23-27; Lucas 20:1-8)

²⁷ Paglateng la ha Jerusalem, nagbalik hi Apu Jesus ha timplu. Kaban nalliyaliyaku ya istu, nagdani kanay namamaalan pawpari, tawtagapanudun kautuhan buy pawpuun Judio.

²⁸ Innunghung la kan Apu Jesus, "Hita karapatan mun gaw'êna' ati ha timplu? Hita nam'i kamun karapatana' in?"

²⁹ Tinumbay hi Apu Jesus kanla, "Tanungun kitaw mêt. Nu sagutun yu ku, nunghungun ku mêt kayu nu hita karapatan kun manggawan ati.

³⁰ Haantun ibata' karapatan Juana' magbawtismu? Sagutun yu ku, kan Apu Diyus u ha tawu?"

³¹ Niriribati hila, "Nu sabin tamun ibata' karapatan na kan Apu Diyus, sabin nay

naman kantamu, ‘Kaya ah kawu naniwala kan Juan?’

³² Nuwa nu sabin tamung ibat ha tawu, mapuut kantamuy tawtawu.” (Nalilimu hila ha tawtawu ta naniniwalay laata’ hi Juana’ tagapannunghung Apu Diyus.)

³³ Kaya tinumbay hila, “Alwa yan tanda.” Innunghung Apu Jesus kanla, “Nu habatu, ah ku mêt sabin kayu nu haantun nangibata’ karapatan kun manggawan ati.”

12

Hay Pag'iitbuh ha Mangalaêta' Manggahak

(Mateo 21:33-46; Lucas 20:9-19)

¹ Nangaral hi Apu Jesus ha tawtawu ha gihay pag'iitbuh. Ambala na, “Mayin gihay tawung nagtanêm ubas. Pinabakuran nay habatu buy nagpagawa yan panggêékan ubas. Nagtayu yan matag'aya' biyag pamantayan. Buy pagkayari pinaupahan nay kanan ubasan ha libun manggagahak. Bayu, naku ya ha madayun rugal.

² Hin panawunanan pamiputin ubas, impalaku nay kanan utuhan ha libun manggagahaka' nangungupaan ha kanan ubasan, takay'êmên kuwêñ nay dakay na.

³ Nuwa kinuyug libun manggagahaka' utuhan na, binugbug, buy pinaalih lan alan pigtan.

⁴ Namagtan yan uman gihay utuhan, nuwa impakadêng'êy lay ati bayu pinatuka' u.

⁵ Namagtan yay namêt giha puna' utuhan. Nuwa pinati lay ati. Madla ya pun impagtan, nuwa binugbug mëta' kanayun buy pinagpapati mëta' kanayun.”

⁶ “Hin kahuli hulianana, ala yay nan maipagtan, kaya impagtan nay pinakama-maal nan anak. Inihip na, ‘Igalang lay anak ku.’”

⁷ “Nuwa hin naakit libun manggagahaka' anak na, ambala la, ‘Dilaganay anaka’ tagapagmana. Kali kawu patin tamu ya, taêmên mapalaku kantamuy lutang manaên na.”

⁸ Kaya kinuyug lay anak, pinati buy intambuk ha labas bakuran ubasan.”

⁹ Pagkayari, nagtanung hi Apu Jesus, “Hi-talagyuy kayan gaw'ên mayin arin ubasan? Tiyaka' lakwun nay libun manggagahak, ta patin. Pagkayari paupaan nay kanan ubasan ha kanayun.

¹⁰ Ah Yu nabasay talatan ati ha kasulan?

‘Hay batun tinanggiyan tagapagpaêdêng biyag,
Hiya aluda' batun nigin pundasyun.

¹¹ Panginuun ya mayin gawan ati,
Buy hinuhumanga' kitamu ha ginawa na.’

¹² Hin nakaêhêba' pawpuun Judion hilay mahawun Apu Jesus ya naypaêdêng biyag ha pag'iitbuh, labay lan hiyay dakpêñ nuwa nalimu hila ha tawtawu. Kaya pinaulayan la tana hi Apu Jesus buy nag'alih hila.

Hay Tanung Tungkul ha Pagbabayad Buwis

(Mateo 22:15-22; Lucas 20:20-26)

¹³ Impalakun pawpuun Hawjudio kan Apu Jesus ya umnuy Pawpariseo buy umnuy tauhan Herodes, ta lêng'ên la hiya takay'êmên madakêp ha sabin na.

¹⁴ Nagdani hila buy ambala kana, “Mistru, tanda yana pêtêga' libun innunghung yu buy ala kawun kinakampian ta ah kawu namamatay ha katayuan gihay tawu nu alwan hay intutudu yuy nu hitalagyuy kapêtêgan tungkul ha kaluuban Apu Diyus. Hapaëg, tama kayan hakitamun Hawjudioy magbayad buwis ha Haring Roma? Dapat kitamu kayan magbayad u ahê?”

¹⁵ Nuwa tandan Apu Jesus ya nagkakanwari hila, kaya innunghung na, “Kaya yu ku sinusubukan ha tanung yun in? Mantan kawu paraw pira* haati ta balayêñ ku.”

¹⁶ Nantan hilan pira kan Apu Jesus. Nagtanung hi Apu Jesus, “Hita nagdampal buy naglagyun nanaakit yu ha pirang ti?”

Tinumbay hila, “Ha Haring Roma!”

¹⁷ Kaya ambalan Apu Jesus kanla, “Ibi yu ha Haring Romay kana, buy ibi yu kan Apu Diyus ya kana.” Hinumanga' hila ha kanan sagut.

* **12:15 pira:** Ha Griego, dinaryu. Hay dinaryu, pirang Romano. Hay alagan habatu katumbas walun buyana' suwilda.

Hay Tanung Tungkul ha Pagkabiyay Uman
(Mateo 22:23-33; Lucas 20:27-40)

¹⁸ Mayin gihay grupun Hawjudio nu bawgêni' Saduceo. Nagdani kan Apu Jesus buy nagtanung. (Hay libun tawung ati, ahê naniniwala ha pagkabiyay uman.)

¹⁹ Ambala la, "Mistru, ha batas insulat Moises, nu mati ya gihay liyaking alan anak ha kanan ahawa, hay nabal'u dapat pakasalan bayaw na, taêmên magkaanak hilan para ha ahawa nan nati."

²⁰ "Hapaêg, mayin pitun mipapatêla' kaliyakiyan. Nag'ahaway panganay buy nati yan alan anak.

²¹ Kaya hay bal'u napag'ahawan kabuhwan, nuwa nati mêtâ' kabuhwan alan anak. Habatu mêtâ' nangyari ha ikatlun patêl

²² angga ha ikapitu. Naubuh hilan natting ala hilan anak ha babayi. Buy ha kahuli hulian, nati mêtâ' babayi.

²³ Hapaêg, ha allêw pagkabiyay uman nangamamatî, hitalagyuy magin tunaya' ahawa na ha pituy kaliyakiyanâ' mipapatêl?"

²⁴ Tinumbay hi Apu Jesus, "Maling mali kawu. Ta ah Yu natêtêbêka' kasulatan Apu Diyus.

²⁵ Ta ha pagkabiyay uman, alay nan pag'aahawa. Dapay mêt hilan aw'anghil ha langita' alwan mag'ahawa.

²⁶ Tungkula' naman ha pagkabiyay uman, ah Yu nabasay insulat Moises? Hin dilag hi Moises ha nagliliyaba' mayêpang puun kayu, ambala kanan Apu Diyus, 'Hakuy Apu Diyus lan Abraham, Isaac buy Jacob.'

²⁷ Hay labay nunghungun, nanabiyay pun hila. Ta alwa yan Apu Diyus nawnati nu alwan Apu Diyus yan bawbiyay. Kaya maling mali kawu."

Hay Pinakamaalagan Utuh
(Mateo 22:34-40; Lucas 10:25-28)

²⁸ Mayin gihay tagapanudun kautuhan baistu, nanlêlêngén pagriribatian la. Nalêngé nan mahampata' sagut Apu Jesus, kaya nagdani ya ta nagtanung mêt, "Hitalagyuy kayay pinakamaalagan utuh?"

† 12:36 Salmo 110:1

²⁹ Tinumbay hi Apu Jesus, "Ati ya pinaka-maalagan utuh. 'Lêng'ên yuy ati, libun taga Israel. Hay Panginuun tamun Diyus, kagiha gihay Panginuun, ala yan katbuh.

³⁰ Kaya maalêñ moy kamun Panginuun Diyus, buung pusu, buung kalulwa, buung ihip, buy buung lakas.'

³¹ Buy pangalaway ati, 'Maalêñ moy kaparihu mu dapay pagmamaal mu ha sarili mu.' Alay nan kanayuna' utuh higit pun maalaga kisa ha luwan ti.'

³² Ambalan tagapanudun kautuhan, "Mistru, pêtêga' innunghung yu. Gigihan diliya' Apu Diyus buy maliban kana, alay nan kanayun.

³³ Buy kaylangan, maalêñ yan buung pusu, buung ihip buy buung lakas. Kaylangan tamu mêt maalêna' kantamun kaparihu dapay pagmamaal tamu ha kantamun sarili. Higita' maalagay ati kisa ha laat kalasin handuga' inêêwêk buy kanayun pun libun handug."

³⁴ Hin nalêngén Apu Jesus ya mayin katalinuana' libun sagut na, ambala kana, "Madani kay nan mipasakup ha pagharin Apu Diyus." Ibat hin hatu, alay nan naglakas luuba' magtanung kan Apu Jesus.

Hay Tanung Tungkul ha Cristo
(Mateo 22:41-46; Lucas 20:41-44)

³⁵ Hin nanunudu hi Apu Jesus ha timplu, tinanung nay tawtawu, "Angkaya innununghung tawtagapanudun kautuhana' hay Criston impangakun tagapaglitgas, lahin dili kanun Haring David?

³⁶ Pan hi Haring David mêtâ' nanunghung ha patnubay Ispiritun Apu Diyus, 'Ambalan Apu Diyus kan Criston Panginuun ku,

"Mitnu ka ha kanan ku,
 Angga ha mapasuku ku kamuy kamun
 kawkapati!" †

³⁷ Hapaêg, nu binawêg Haring David Panginuun ya Cristo, pakapakun yan naging lahi dilin Haring David?" Naliliway libun tawu ha panlêlêngé kan Apu Jesus.

Babala Tungkul ha Tawtagapanudun Kautuhan
(Mateo 23:1-36; Lucas 20:45-47)

38 Ambala pun Apu Jesus ha kanan panunudu, "Mag'ingat kawu ha tawtagapanudun kautuhan. Labaya' labay lan mamasyala' nakasuut barun panudu. Buy labaya' labay lan batiin hila ta igalang ha matawung rugal.

39 Labay lan mitnu ha itnuwan pandangan ha biyag pamititipunan Hawjudio buy ha libun handaan.

40 Inluluku lay bawbal'u takay makuwa lay ari arian libun ati. Buy kinakadangan lay panalangin la ta impapaakit lan mampat hila. Kaya mas mabiyata' parusan tanggapen la."

*Hay Alay Bal'u
(Lucas 21:1-4)*

41 Nitnu hi Apu Jesus ha danin pami-antiyan alay baistu ha timplu buy binabalay nay tawtawung naynanabun alay. Madlan mangayamana' naynabun mangamhaka' alaga.

42 Mayin gihay mairapa' bal'u baistun nagdani buy naynabun luway barya.

43 Binawé Apu Jesus ya tawtagahunul na ta innunghung, "Pakaléng'en yuy inunghung ku kayu, mas mamhaka' in'ibin bal'u kisa ha in'ibi lan laat.

44 Ta hilan laat nam'in dilin subran pira la. Nuwa hay bal'u, in'ibi nan laata' panyaliw nan maékan na."

13

Innunghung Apu Jesus ya Pagkahidan Timplu

(Mateo 24:1-2; Lucas 21:5-6)

1 Hin paalihana hilan Apu Jesus ha timplu, ambalan giha ha tawtagahunul na, "Mistru, balayén yuy pagkagawan bawbiyaga' nakapagitnay timplu! Mangamhaka' batu buy mangamhaka' bawbiyag."

2 Ambalan Apu Jesus kana, "Nanakit yuy mangamhaka' biyaga' in. Nuwa lumaténg'a panawun, matibaga' laata' ati, alan mitlay magkapatunga' batu!"

Libun Pag'iirap buy Pag'uusiga Lumaténg

(Mateo 24:3-14; Lucas 21:7-19)

3 Kaban nakaitnu hi Apu Jesus ha Bung'uy Aw'ulibu, nakaarap ya ha timplu,

tinanung yan lihim lan Pedro, Santiago, Juan buy Andres,

4 "Sabin yu paraw kanyan nu makannun mangyariya' innunghung yu buy hita palatandaana'madani yanan mangyariya' laata' ati?"

5 Kaya ambalan Apu Jesus kanla, "Mag'ingat kawu taémén ah kawu mailêtêp hitalagyuman.

6 Ta madlan lumaténg buy manunghunga', 'Hakuy Cristo!' Buy madla hilan mailêtêp.

7 Nu makaléngé kawun gira ha madani kayu buy makabalita kawun gira ha madayu, ah kawu malimu. Dapat dilin mangyariya' habayin, nuwa alwa pun habatiya' katapusan mundu.

8 Ta milalabana' bawbansa buy milalaban mēta' kawkaharian. Magdayun ha iba iban rugal buy lumaténg'a tagbitil. Hay libun ati, pasimulan dilin kairapana' lumaténg."

9 "Mag'ingat kawu, ta ha paghunul yu kangku, dakpēn kawu, gitan kawu ha hukuman buy pagpapaluhun kawu ha biyag pamititipunan Hawjudio. Iarap kawu ha gawgubirnadur buy hawhari ta pagtatanungun kawu. Pagkakatawun yuy nay ati taémén mapapétgan yuy tungkul kangku.

10 Bayu lumaténg'a katapusan, dapat pun maipangaral ha laat bansay Mahampata' Balita tungkul kangku."

11 "Nu dakpēn kawu ta iarap kawu ha hukuman, ah kawu malimu nu hitalagyun nunghungun yu. Basta sabin yun diliy inunghung Ispiritun Apu Diyus ha uras bantu. Ta alwan hakawuy manunghung nu alwan hay Ispiritun Apu Diyus.

12 Ha panawuna' tu, ibin patêla' sarili lan patêl ta ipapati. Habatu mēta' bawbapa ha kanlan aw'anak buy hay aw'anak ha kanlan mangatuwa.

13 Kapuutan kawun laat gawan ha paghunul yu kangku. Nuwa hay manatili kangkun tapat angga ha katapusan, habatuy miligtas."

*Hay Kasuklam Suklama' Lumaténg
(Mateo 24:15-28; Lucas 21:20-24)*

¹⁴ Ambala pun Apu Jesus, “Maakit yuy kasuklam’suklama’ lumatêng, kaya intayak lay timplu. Impaêdêng lay ati ha rugala’ alwan dapat pinaypaêdêngan. (Hakawung namamasa, pakaihipin yuy ati!) Nu mangyari yanay ati, dapat magtakahay tawtaga Judea ha kabung’uyanan.

¹⁵ Hay dilag ha uhbung biyag andiyana magpahuk mangwan hitalagyuman.

¹⁶ Hay dilag ha gahak andiyana mulin mangwan baru.

¹⁷ Makaingaluy mangabuktut buy kawkulawan ha allêwa’ tu ta mairapan hilan magtakah.

¹⁸ Ipanalangin yuy andi hana mangyariya’ ati ha panawun taglay’êp.

¹⁹ Kasi ha panawun bantu, makadanas pag’iirapa’tawtawung alwa pun nadadanasa’ ibat hin inlikhan Apu Diyus ya mundu angga hapaêg. Buy alay nan madanasa’ habatun pag’iirap makanuman.

²⁰ Nu alwan paêpêkên Apu Diyusa’ panawun bantu, alay nan mitlay mabyay. Nuwa alang’alang ha kanan pawpinili, pinaêpêk nay panawun bantu.”

²¹ “Nu mayin mannungung kayung, ‘Dilag kaytiya Criston impangakun Apu Diyus!’ u ‘Dilag ya istu!’, ah kawu maniwala

²² ta lumtawa’ tubhuna’ Cristo buy tubhuna’ tagapannunghung Apu Diyus. Magpakit hilan hawhimala buy libun makapagtaka taêmén mamilêtêp. Nu maari, pati pawpinilin Apu Diyus magin kana.

²³ Kaya mag’ingat kawu! Impapatanda kuy na kayuy ati kaban ahê pun nangyayari.”

Hay Pagbabalik Apu Jesus ha Mundu (Mateo 24:29-31; Lucas 21:25-28)

²⁴ “Pagkayarin allêwa’ tun matindin kairapan, magmadlêma’ allêw, ahêy na maghawanga’ buyan.

²⁵ Buy mangananabuy bawbêtêwên ibat ha langit. Mangatêgêy libun nanaakit ha langit buy mawala ha kanla kanlan puwistu.

²⁶ Buy maakit lan hakuy nangibat ha lantita’ In’anak Tawuy malatênga’ nakahakay

ha ulap, dilag kangkuy matag’aya’ kapang-yarian buy kahawangan.

²⁷ Ipagtan kuy aw’anghil ku ha laat rugal ha mundu taêmén tipununa’ pawpinili ku.”

Hay Tudu ha Puun Igus (Mateo 24:32-35; Lucas 21:29-33)

²⁸ “Unawaen yuy aral ha puun igus. Nu magkadawênanay hawhangan igus, tanda yuy madani yanay pamitubun tanêm.

²⁹ Habatu mêt nu mangyariya’ libun innununghung kun ati kayu, matandan yuy madani hakuy nan lumatêng.

³⁰ Pakalêng’êñ yuy inununghung ku kayu, matupada’ laata’ ati bayu mangamamatiya’tawtawu ha panawuna’ ati.

³¹ Hay langit buy lutay mayin angganan, nuwa hay libun nunghung kuy alan angganan.”

Alan Tawung Nakakatanda nu Makannun Magbalik hi Apu Jesus (Mateo 24:36-44)

³² “Tungkul ha allêw u urasa’ kangkun pagbabalik, alan nakakatandan ati maski libun anghil ha langit u haku mana’ Anak Apu Diyus. Hay Bapan diliya’ nakakatandan ati.

³³ Kaya mag’ingat kawu buy maghanda ta ah yu tanda nu makanu hakun lumatêng.”

³⁴ “Maari atin iitbuh ha gihay tawung naku ha madayun rugal. Bayu ya nag’alih ha biyag, binyanan nay nan kanya kanyan tarabahuy kanan aw’utuhan ta pinagbiliyan nay guwardiya ha pintuan, ‘Magin handa ka ha kangkun paglatêng.’”

³⁵ “Kaya magin handa kawu ta ah yu tanda nu hakun nagbiyag makanun lumatêng, maarin hapun, ha malalêy yabi, ha hawang hawang, u ha datu.

³⁶ Dat bigla kun lumatêng, malatngan katawun natutuluy.

³⁷ Kaya hay innununghung ku kayu, habatu mëta’ innununghung ku ha laat, ‘Magin handa kawu!’”

14

Hay Palanun Pagpati kan Apu Jesus (Mateo 26:1-5; Lucas 22:1-2; Juan 11:45-53)

¹ Luway allêw tana bayu lumatêng'a Allêw Pag'alaalan Kaligtasan ha Pag'iirap buy Kamatiyan* buy Allêw Tinapaya' Alan Pampaalsa†. Hay libun namamaalan pari buy tawtagapanudun kautuhan, nanangkap hilan pagkakatawun taêmén lihim lan maipadakêp buy maipapati hi Apu Jesus.

² Ambala la, "Andi tamu gaw'ên ha Allêw Pag'alala, lumbuta' magkaguluy tawtawu."

*Binunlukan Pabangu hi Apu Jesus
(Mateo 26:6-13; Juan 12:1-8)*

³ Hin dilag hi Apu Jesus ha Betania, kaban nanangan ya ha biyag Simona' daan mayin matindin hakit ha balat, in-lumatêng'a gihay babayi. Mayin yan pig-tana' mamaalêna' pabangu. Hay pamiantiyan gawa ha batun alabastro. Hay pabangung ati, puru ibat ha katas halamana' nardu. Binahak nay bêng pamiantiyan pabangu bayu imbuñlug nay pabangu ha un Apu Jesus.

⁴ Napuuta' umnuy tawu istu. Ambala la, "Angkaya na sinasayanga' pabangung in?

⁵ Naipaghaliw hanay habayin ha mamhaka' alaga, katumbas gihan tawuna' suwilda. Naiibi hana ha mangairap." Buy kinapuutan lay babayi.

⁶ Nuwa ambalan Apu Jesus, "Paulayan yu ya. Angkaya yu ya ginugulu? Mahampata' atiya' ginawa na kangku.

⁷ Hay libun mangairap panay yun makaawayun buy maari kawun tumulung kanla maski hitalagyin uras. Nuwa haku, ah yu ku panay makaawayun.

⁸ Ginawa nay makaya nan gaw'ên na para kangku. Binunlukan nay nawini kun pabangu taêmén ipauna nay paghahanda ha kangkun pag'êlbêng.

⁹ Pakalêng'ên yuy inunghung ku kayu, haantu man ipangarala' Mahampata' Balita ha buung mundu, ipamalita mëta' ginawa nan ati kangku taêmén ah ya maliwanan."

* **14:1 Allêw Pag'alaalan Kaligtasan ha Pag'iirap buy Kamatiyan:** Balayêñ ha Exo. 12:1-30 nu pakapakun nag'umpisa. † **14:1 Allêw Tinapaya' Alan Pampaalsa:** Ha allêwa' ti, kikinan lay tinapaya' alan pampaalsa dapay ginawan ninunu la hin inlitas hilan Apu Diyus ha pagkaalipêñ la ha Egipcio.

Nakipagkasundu hi Judas ha Kawkapatin Apu Jesus

(Mateo 26:14-16; Lucas 22:3-6)

¹⁰ Hi Judas Iscariote, giha ya ha tawtagahunul Apu Jesus. Naku ya ha libun namamaalan pari takay'êmén makipagkasundun ipakabili hi Apu Jesus.

¹¹ Hin natandan lay pakay Judas, natula hila buy nangaku hilan biyan yan pira. Kaya ibat hin habatu, nag'ihip yay na, nu pakapakun nan ipakabili hi Apu Jesus kanla.

*Hay Hulin Apunan Apu Jesus Awyuna'
Tawtagahunul Na*

*(Mateo 26:17-25; Lucas 22:7-14, 21-23;
Juan 13:21-30)*

¹² Inlumatêng'a unan allêw ha Allêw Tinapaya' Alan Pampaalsa. Atiya' allêw paghahandug tupan kikinan ha Allêw Pag'alaalan Kaligtasan ha Pag'iirap buy Kamatiyan. Kaya tinanung hi Apu Jesus tawtagahunul na, "Haantu yu labay kamin maghandan apunan para ha Allêw Pag'alaalan Kaligtasan?"

¹³⁻¹⁴ Inutuhan nay luwa ha kanan tagahunul, "Maku kawu ha banwan Jerusalem ta baistu mayin manyalubung kayuy gihay liyaki, mipapasan bangan lanêm. Hunulun yu ya ha biyaga' pahukan na, buy sabin yu ha mayin biyag, 'Impapatanung Mistru nu haantun kuwartu yan mangan apunan awyuna' tawtagahunul na ha Allêw Pag'alaalan Kaligtasan.'

¹⁵ Itudu na kayuy gihay mamhaka' kuwartu ha tag'ay, kumplituy nan kagamitan buy nakahanday na. Istu kawun maghandan apunan tamu."

¹⁶ Nag'aliha' luwa nan tagahunul. Buy hin inlumatêng hila ha banwa, naakit lay laata' innunghung Apu Jesus kanla. Buy inhanda la istuy apunan para ha Allêw Pag'alaalan Kaligtasan.

¹⁷ Kinayabinan, inlumatêng hi Apu Jesus awyuna' labinluway tagahunul na.

¹⁸ Kaban nanangan hilay na ha lamisa, ambalan Apu Jesus kanla, "Pakalêng'ên

yuy ati. Giha kayuy kaawêm ku ha panganan, maypakabili kangku."

¹⁹ Hin nalêngê lay habatu, nalungkut hila. Giha'giha hilan nagtanung kana, "Mistru, alwan hakuy habatu, ani?"

²⁰ Ambalan Apu Jesus kanla, "Giha kayu ha labinluway kaawyun kun maysawsaw tinapay ha tasa.

²¹ Ta dilag ha kasulatan, hakuy nanibat ha langita' In'anak Tawuy patin. Nuwa makaingaluy tawung maypakabili kangku. Mangêd pun ban, ah yay na impanganak."

Hay Hulin Apunan Apu Jesus

(Mateo 26:26-30; Lucas 22:14-20; 1 Corinto 11:23-25)

²² Kaban nanangan hila, nangwan tina-pay hi Apu Jesus, nagpasalamat ya kan Apu Diyus buy pinabih'il bih'il nay ati bayu in'ibi na ha libun tawtagahunul na. "Kuwêñ yuy ati ta kanêñ yu, ati ya kangkun nawini."

²³ Pagkayari, nangwa yan inêmén, nagpasalamat kan Apu Diyus, in'ibi na kanla bayu ninêm hilan laat.

²⁴ Ambala na kanla, "Ati ya kangkun daya, ibunlug ku para ha pagtubus kasalanan dêlan tawu. Atiya' mamapêtêg pangakun Apu Diyus ha tawtawu."

²⁵ "Pakalêng'ên yuy ati, ah kuy na mënêm uman alaka' ibat ha katas ubas angga ha lumatêng' paghaharin Apu Diyus. Ha allêw bantu, mënêmakun bayun kalasin ênêmén."

²⁶ Nagkantaan hilan papuri kan Apu Diyus bayu naku hila ha Bung'uy Aw'ulib.

Innunghung Apu Jesus, Ipaglau Yan Pedro

(Mateo 26:31-35; Lucas 22:31-34; Juan 13:36-38)

²⁷ Innunghung Apu Jesus ha tawtagahunul na, "Innunghung Apu Diyus ha kasulatan, 'Patin kuy pastul ta mimiihiyaya' tawtupa.' Matupada' ati ta piibwatan yu kun laat.

²⁸ Nuwa pagkayari kun mabyay uman, mauna ku kayu ha prubinsiyen Galilea."

‡ 14:38 **Hay nakêm yu labay lumaban ha tuksu, nuwa hay nawini maina.** Maarin hay ibig sabin ati, labay ispiritu lan magpuyat buy manalangin, nuwa ahê kayan nawini la.

²⁹ Innunghung Pedro kan Apu Jesus, "Ibwatan kawu man laat, nuwa haku ah katawu ibwatan."

³⁰ Tinumbay hi Apu Jesus kana, "Pakalêng'ên yuy inunghung ku kayu, bayu manalang'aya' manuk luway bisis ha yabin ti, tatluy bisis mu kun ipuglau kilala mu ku."

³¹ Nuwa impagpilitan Pedro, "Ah katawu talaga ipuglau, maski patinaku puna' awyun yu." Habatu mëta' innunghung laat nan kaawyun.

Nanalangin hi Apu Jesus ha Getsemane (Mateo 26:36-46; Lucas 22:39-46)

³² Pagkayari, naku hila ha rugala' Getsemane. Paglatêng la istu, innunghung Apu Jesus kanla, "Mitnu kawu haati kaban manalanginaku."

³³ In'awy whole na hi Pedro, Santiago buy Juan. Nababaala ya ta tinatagam nay na ya mangyari kana.

³⁴ Innunghung na kanla, "Dapayakun mati ha lungkut. Haati kawun dili, ah kawu matuluy."

³⁵ Nagpakadayu yan bagya, ta nagluhud buy nanalangin, "Nu maari hana, ah kuy na danasina' pag'iirapa' lumatêng kangku."

³⁶ Innunghung na, "Bapa, magawa yuy laata' bagay. Nu maari ipakadayu yu kangkuy pag'iirapa' atiya' lumatêng. Nuwa alwan labay kuy mahunul nu alwan labay yu."

³⁷ Pinagbalikan Apu Jesus ya tatluy tagahunul na ta nalatngan nan natutuluy. Innunghung na kan Pedro, "Simon, natutuluy kaw pun? Ah kawu makapagpuyat maski gihay uras dili?"

³⁸ Ta innunghung na kanla, "Magpuyat kawu ta manalangin taêmén ah kawu maguluy tuksu. Hay nakêm yu labay lumaban ha tuksu, nuwa hay nawini maina.‡"

³⁹ Nagpakadayuy namêt hi Apu Jesus ta nanalangin yan uman, dapay ha una nan panalangin.

⁴⁰ Pagkayari, pinagbalikan nan umana' tawtagahunul na. Nalatngan nay namêt

hilan natutuluy ta bêlêw bêlêwên hilan tandah. Hin napukaw hila, ah la tanda nu hita nunghungun la kan Apu Jesus.

⁴¹ Buy nanalangin yan uman. Ha pangatlun pagbalik Apu Jesus, in-nunghung na kanla, "Natutuluy kaw pun buy nagpapahinga? Tamay nay habayin! Lumatênganay urasa' hakuy nangibat ha langita' In'anak Tawuy iibi ha makasalanan.

⁴² Mibwat kitamuy na, halubungun tamu hila! Dilaganay maypakabili kangku."

*Hay Pagdakêp kan Apu Jesus
(Mateo 26:47-56; Lucas 22:47-53; Juan 18:3-12)*

⁴³ Nannununghung pun hi Apu Jesus, biglan inlumatêng hi Judas ya giha ha labinluway tagahunul na. Madla yan awyuna' armadun ispadâ buy pamaluh. Sinugu hilan namamaalan pari buy tawtagapanudun kautuhan buy pawpuun Judio.

⁴⁴ Nam'in palatandaan ha mandakêp kan Apu Jesus hi Judas ya naypakabili kana. Ambala na, "Nu hita daninan ku ta halikan ku, habatuy dakpênu. Gitan yu buy ah yu paulayan makatakah."

⁴⁵ Kaya hin inlumatêng hi Judas, agad yan nagdani kan Apu Jesus. Kinunghung na, "Mistru!", bayu na hinilikana' ati.

⁴⁶ Agad dinakêp hi Apu Jesus tawtawu.

⁴⁷ Nangublut ispaday gihay tagahunul Apu Jesus ta tinabtab nay gihay alipênu puun pari, buy nalaplapa' têk ati.

⁴⁸ Ambalan Apu Jesus ha libun nandakêp kana, "Tulisanaku kaya bay ta nipantan kawun ispadâ buy pamaluh takay'êmên dakpênu ku?

⁴⁹ Allêw allêwakun dilag ha timplu ta nanunudu buy dilag kaw mêt baistu. Angkaya ah yu ku dinakêp? Nuwa kay-langan mangyariya' ati taêmên matupada' innununghung ha kasulatan tungkul kangku."

⁵⁰ Hin habatu mêt, inibwatan yan tawtagahunul na buy nipagtakah hila.

⁵¹ Mayin gihay binata baistu, nanghunul kan Apu Jesus, nakabalabal yan dilin tilan linu. Dinakêp ya mêt tawtawu,

⁵² nuwa ha pagtakah na, nadukpan lay kanan balabal, kaya inlumukhu yan hubad.

Gintan hi Apu Jesus ha Hukuman Hawjudio
(Mateo 26:57-68; Lucas 22:54-55, 63-71; Juan 18:13-14, 19-24)

⁵³ Gintan la hi Apu Jesus ha biyag puun pari. Nititipun baistuy laat namamaalan pari, pawpuun Judio buy tawtagapanudun kautuhan.

⁵⁴ Hinumunul mêt baistu hi Pedro nuwa madayu yan bagya kan Apu Jesus. Nag-pahuk ya ha bakuran puun pari, nikiitnu ya ha gawguwardiya buy nagpakyang ya ha danin apuy.

⁵⁵ Baistu ha luub, hay libun namamaalan pari buy pinakamatag'aya grupun pawpuun Hawjudio nananangkap ibidinsiyan laban kan Apu Jesus taêmên mahatulan yan kamatiyan. Nuwa ala hilan makuwan ibidinsiya.

⁵⁶ Dêlan nagsaksin alwan pêtêg laban kan Apu Jesus nuwa alway naman nagkakagihay innununghung la.

⁵⁷ Mayin umnuy nêdêng buy nagsaksin alwan pêtêg laban kana. Ambala la,

⁵⁸ "Nalêngê yana sinabi na, 'Gibaên kuy timplun atiya' gawan tawu, nuwa ha buun tatluy allêw iêdêng kuy timplun alwan gawan tawu!'

⁵⁹ Nuwa, alwa mêt nagkakagihay innununghung la."

⁶⁰ Nêdêng ha gitnay puun pari, tinanung hi Apu Jesus, "Ala ka kaya ban sabin ha imbibintang la laban kamu?"

⁶¹ Ahê nagtêgê hi Apu Jesus, kaya tinanung yan uman puun pari, "Haka baya' Cristo, anak Apu Diyusa' pinupuri tamu?"

⁶² Tinumbay hi Apu Jesus, "Haku bay, buy hakuy nangibat ha langita' In'anak Tawuy maakit yun nakaitnu ha kanan Makapangyarihan Apu Diyus. Buy paglatêng ku kayti ibat ha langit, maakit yu ku ha ulapa' patabuy."

⁶³ Hin nalêngê atin puun pari, ha puut na, ginihi nay kanan baru buy ambala, "Angkaya tamu pun kaylangana' sawsaksi?

⁶⁴ Nalêngê yuy ah na inggalanga' Apu Diyus ta in'iitbuu nay sarili na kana. Hita

labay yun gaw'ên kana?" Buy hinatulan la hi Apu Jesus, "Dapat yan patin."

⁶⁵ Tinupayan yan umnu baistu. Tinakpan lay mata na buy sinuntuk ya bayu tinanung, "Sabin mu paraw nu hita nanyuntuk kamu?" Pagkayari, kinwa yan gawguwardiya buy pinagbubugbug.

*Impuglaun Pedroy Kilala na hi Apu Jesus
(Mateo 26:69-75; Lucas 22:56-62; Juan 18:15-18, 25-27)*

⁶⁶ Hin dilag pun ha bakuran hi Pedro, dinumana' gihay babaying utuhan puun pari.

⁶⁷ Hin naakit na hi Pedro, nagpapakyang ha danin apuy, nangunêng yan nakabalay kana buy innununghung na, "Awyun ka mêt Apu Jesus ya taga Nazaret, alwa nay?"

⁶⁸ Nuwa impuglaun Pedroy ati, "Ah ku tanday innununghung mu." Pagkayari, nag'alih ya baistu ta naku ya ha luwahan. Hin habatu mêt, nanalang'aya' manuk.

⁶⁹ Naakit yay na mêt istun babaying utuhan, kaya innununghung babayi ha tawtawung dilag istu, "Hay tawung ban in, giha ya mêt ha awyun Apu Jesus."

⁷⁰ Nuwa, impuglaun uman Pedro.

Papainghan, innununghung tawtawu baistu, "Giha ka bay ha kawkaawayun na, ta taga Galilea ka mêt."

⁷¹ Nuwa nagsumpa hi Pedro, "Matiyaku man, ah ku talagan kilalay tawung innununghung yu."

⁷² Hin habatu mêt, nanalang'ay umana' manuk. Buy naihipan Pedroy innununghung kanan Apu Jesus, "Bayu manalang'aya' manuk luway bisis, tatluy bisis mu kun ipaglaun kilala mu ku." Nanghêmêkmék yan tangih.

15

*Gintan hi Apu Jesus kan Pilato
(Mateo 27:1-2, 11-14; Lucas 23:1-5; Juan 18:28-38)*

¹ Kinadatunan, ninununghung agada' libun namamaalan pari, pawpuun Hawjudio, tawtagapanudun kautuhan buy pinakamatag'aya grupun pawpuun Hawjudio, nag'ihip hila nu hita gaw'ên la kan Apu Jesus. Impagapuh la hi Apu Jesus buy gintan kan Gubirnadur Pilato.

² Hin dilagana' hila, tinanung yan Pilato, "Haka kaya baya', talagan Harin Hawjudio?"

Tinumbay hi Apu Jesus, "Hakawuy nay nannununghung."

³ Madlan bintanga' libun namamaalan pari laban kan Apu Jesus.

⁴ Kaya tinanung yan uman Pilato, "Ala ka kaya ban manununghung? Balayên mu, madla hilan imbibintang kamu!"

⁵ Nuwa ahêy namêt nagtêgê hi Apu Jesus. Kaya nagtaka hi Pilato.

*Hinatulan hi Apu Jesus Kamatiyan
(Mateo 27:15-26; Lucas 23:13-25; Juan 18:39-19:16)*

⁶ Tuwing Allêw Pag'alaalan Kaligtasan ha Pag'iirap buy Kamatiyan, nakaugaliyan Pilato, magpalayan gihay bilanggun labay palayaên tawtawu.

⁷ Mayin gihay bilanggu baistu, hay lagyu hi Barabas. Nabilanggu ya ta awyun ya ha nakilaban ha pamahalaan buy nakapati hin panawun bantu.

⁸ Madlan nagdani kan Pilato ta hiniling lay gaw'êna' nakaugaliyan magpalayan bilanggu.

⁹ Kaya tinanung hilan Pilato, "Labay yuy palayaên kuy Harin Hawjudio?"

¹⁰ Innununghung nay ati ta tanda na, ingita' namitulak ha libun namamaalan pari kaya gintan kana hi Apu Jesus.

¹¹ Sinulsulan libun namamaalan pariya' tawtawu, "Hi Barabas ya hilingin yun palayaên, alwan hi Apu Jesus."

¹² Nagtanung uman hi Pilato ha tawtawu, "Hitalagy u hapaêga' gaw'ên ku ha binabawêg yun Harin Hawjudio?"

¹³ Nagbung'u hila, "Ipaku ya ha krus!"

¹⁴ Ambalan Pilato kanla, "Awta? Hitalagy u kaya ba nagawa nan kasalanan?"

Nuwa lalu pun nagbung'uy tawtawu, "Ipaku ya ha krus!"

¹⁵ Labay Pilaton iibiya' kahilingan tawtawu, kaya pinalaya na hi Barabas. Buy impapaluh nay naman hi Apu Jesus bayu in'ibi na ha sawsundalu taêmén ipaku ya ha krus.

*Pinairapan Sawsundalu hi Apu Jesus
(Mateo 27:27-31; Juan 19:2-3)*

16 Gintan sawsundalu hi Apu Jesus ha luub mamhaka' biyag gubirnadur ta tinipun la istuy laat kaawyun lan sundalu.

17 Pinasuutan la hi Apu Jesus tilan kulay ubi bayu nanggawa hilan kurunan diwi buy intugpaw kana.

18 Pagkayari, nagbubung'u hila ta kanwari pinupuri la hi Apu Jesus, "Mabiyaya' Harin Hawjudio!"

19 Buy inuman uman lan pinagpaluh tukuda' u na buy pinagbubulitan ya. Nagluhud hila kana, kanwari sinusumamba kana.

20 Hin nayari lan uyamén hi Apu Jesus, inhubad lay kulay ubin tila bayu impasuta' kanan baru. Pagkayari, gintan la hiya ha labas banwa taêmén ipaku ha krus.

*Impaku hi Apu Jesus ha Krus
(Mateo 27:32-44; Lucas 23:26-43; Juan 19:17-27)*

21 Kaban nanlyalyaku hila nahalubung lay gihay tawung ibat ha bukid. Hiya hi Simon, taga Cirene, bapan Alexander buy Rufus. Impilit lan impabwat kan Simon ya krus Apu Jesus.

22 Gintan la hi Apu Jesus ha binabawêga' Golgota, hay labay nunghungun "Rugal Bungu".

23 Paglatêng istu, binyan la hi Apu Jesus alaka' mayin halung gamuta' binabawêg mira*. Labay lan ipaênêma' ati takay'lêmén ah na matanama' masyarung hakit nu ipaku lay na hiya. Nuwa ah na inênenêma' ati.

24 Impaku la hi Apu Jesus ha krus bayu pinagpalabutan lay bawbaru na taêmén matandan lay dakay balan giha.

25 Ikasiyama datu hin impaku ya ha krus.

26 Mayin karatula ha tag'ay krus. Ati ya nakasulat bintang laban kana, "Hay Harin Hawjudio."

27 Mayin mêt luway tulisana impaku ha krus kadanin Apu Jesus, giha ha kanan na, giha ha kaliwa.

28 [Ha pangyayarin ati, napapêtganayan innunghung ha kasulatan Apu Diyus, "Napabilang ya ha libun makasalanan."]

29 Ininsultu hi Apu Jesus tawtawung dinuduman istu. Napapalampêyêng hila, sabaya' sabin, "Hita hapaêg? Indap ku, gibaêñ muy timplu buy iêdêng mun uman ha luub tatluy allêw?

30 Magtabuy ka ha krus ta iligtas muy sarili mu!"

31 Habatu mête' pan'iinsultun libun mamaalan pari buy tawtagapanudun kau tuhan. Ambala la ha gihat giha, "Inligtas nay kanayun, nuwa alwa nan mailigtasa' sarili na!

32 Balayêñ tamu, nu makatabuy ha krusa' Criston ati, hari kanun Israel! Nu makatabuy ya, maniwala kitamuy na." Maging hay luway nangakapakung awyun na, nang'insultu mêt kana.

*Hay Pagkamatin Apu Jesus
(Mateo 27:45-56; Lucas 23:44-49; Juan 19:28-30)*

33 Hin mag'alas dusiyanan tanghali, nagmadlêma' buun kalut'an ha luub tatluy uras.

34 Hin mag'alas tris hapun, nagbung'un malakas hi Apu Jesus, "Eloi, Eloi, lêma sabachtani?" Hay labay nunghungun Apu Jesus, "Diyus ku, Diyus ku, kaya mu ku pinaulayan?"

35 Hin nalêngêñ nangakaêdêng baistuy innunghung Apu Jesus ya "Eloi", ah la natêbêk. Kaya ambala la, "Lêng'en yu, binabawêg na hi Elias."

36 Inlumukhu agada' gihay tawu, nangwan ispungha, ingkabit ha tampuh bihlakan, ta intiltil ha maasima' alak', bayu impalkap ha bêbêy Apu Jesus takay héphêpén na. Innunghung tawung ati, "Ibwatan tamu ya. Balayêñ tamu nu lumatêng hi Elias, nu itabuy ya ha krus."

37 Nagbung'un malakas hi Apu Jesus buy nabuytuwan yan inawanêñ.

38 Hin habatu mêt, hay tabinga' maka pala' tila ha luub timplu, nagihi ha tag'ay patabuy.

39 Nakaêdêngä' kapitan sundalu ha tapat krus, naakit na nu pakapakun nabuytuwan inawanêñ hi Apu Jesus.

* **15:23 mira:** Mabangu buy mamula mulan yatêk ibat ha busal madiwin puun mira. Dêlan gamita' ati: panggawan pabangu, pampaganda buy gamut. Kayti, inhalu ati ha alak takay'lêmén magin gamut ta ah ya makatanam masyarung hakit.

Innunghung na, "Pêtêg baya', Anak yan Apu Diyus."

⁴⁰ Ha madayun bagya, mayin babaying namamalay ha nangyayari, hi Salome, hi Maria taga Magdala, buy hi Marian indun Jose buy ali nan hi Santiago.

⁴¹ Hay babaying ati, mamikilalaku kana, nanunulung kana hin dilag ya pun ha Galilea. Dilag mêt baistuy babaying naki-laku kana angga ha Jerusalem.

Hay Pamiêlbêng kan Apu Jesus

(Mateo 27:57-61; Lucas 23:50-56; Juan 19:38-42)

⁴² Padlêmanan habatu, uras paghanda ta dumahuy Allêw Pamamahinga.

⁴³ Kaya naglakas luub hi Jose, taga banwan Arimateang lakwun na hi Gubirnadur Pilato ta ipikikuway bangkay Apu Jesus. Hi Jose, giha ha inggagalang ha pinakamatag'aya grupun pawpuun Hawjudio. Ta giha ya ha nangêngêtêng paghaharin Apu Diyus.

⁴⁴ Hin nalêngên Pilaton natiyana hi Apu Jesus, nagtaka ya. Kaya impabawêg nay kapitan sawsundalu, intanung na, "Natiyana hi Apu Jesus?"

⁴⁵ Hin nalêngên Pilato ha kapitana' natiyana hi Apu Jesus, pinaulayan nay na hi Josen kuwêna' bangkay Apu Jesus.

⁴⁶ Nanyaliw mamaalina' tilan linu hi Jose. Bayu, impakuway bangkay Apu Jesus ha krus. Ta imbalut nay ati ha hinaliw nan tilan linu buy in'êlbêng nay ati ha kinalin êlbêngan ha pingit bud. Bayu, intulid nay mamhaka' batu taêmên panakêp ha pintun êlbêngan.

⁴⁷ Naakit hinhatun Maria taga Magdala buy Marian indun Jose, nu haantun in'êlbêng hi Apu Jesus.

16

Nabyay Uman hi Apu Jesus

(Mateo 28:1-8; Lucas 24:1-12; Juan 20:1-10)

¹ Pagkalibah Allêw Pamamahinga, nanyaliw pabangu hilan Maria taga Magdala, Marian indun Santiago, buy hi Salome, ta maku hila ha pinay'êlbêngan Apu Jesus, ipuyuk lay pabangu ha bangkay ná.

² Hin allêw Linggu pagkasikat allêw, nakuy na hila ha pinay'êlbêngan.

³ Kaban nallyalyaku hila, nagtatanungan hila, "Hitalagyus kayay mapiki-nunghungan tamung mamitulid batun pakatakêp ha êlbêngan?"

⁴ Nuwa hin inlumatêng hila istu, naakit lan naitulidana ha pingita' mamhaka' kan-hana' batu.

⁵ Buy nagpahuk hila ha êlbêngan, naakit la istuy gihay binatilyu, nakabarun putin makadang, pakaitnu ha bandan kanan. Nikakalimu hila.

⁶ Nuwa ambalan binatilyu kanla, "Ah kawu malimu! Tanda kun titingkap yu hi Apu Jesus ya taga Nazaret ya impaku ha krus. Ala yay na kayti, nabyay yan uman! Balayêñ yuy pinag'undagan bangkay na."

⁷ Mallyaku kawuy na ta nunghungun yu ha tawtagahunul na, laluy na kan Pedro, maunay na hi Apu Jesus ha Galilea. Baistu yu ya maakit dapay ha innunghung na."

⁸ Nalganga' babayi buy ginalgal kaya naghawang ha êlbêngan buy inlumukhu. Ha subrang limu, ah lay na nainunghung ha hitalagyuman.

⁹ [Hin datun datu pun allêw Linggu, hin nabyay hi Apu Jesus, una yan nagpaakit kan Maria taga Magdala, hiyay babaying sinuklutan pituy anitung pinaalih Apu Jesus.

¹⁰ Inlakun Mariay tawtagahunul Apu Jesus. Nalatêng nan nagluluksa' buy nananangih hila buy imbalita nay nang-yari.

¹¹ Nuwa, ah hila naniwala ha imbalita nan nabyay hi Apu Jesus buy nagpaakit kana.

¹² Pagkayarin habatu, nagpaakit uman hi Apu Jesus ha luwa nan tagahunul palaku ha bukid, nuwa ha iban anyu.

¹³ Kaya nagbalika' luwa ha kaawyun la ha Jerusalem ta innunghung lan nagpaakit kanla hi Apu Jesus. Nuwa ahê mêt nani-walay libun ati.

¹⁴ Hin bandan huli, kaban nanangana labinggaha nan tagahunul, nagpaakit mêt hi Apu Jesus kanla. Pinannunghungan nay libun ati ta ah hila nananampalataya buy mangatigasa' pusu la. Ta alwa hilan

naniniwala ha kuwintun nakaakit kanan
nabyay yan uman.

¹⁵ Ambalan Apu Jesus kanla, “Maku
kawu ha buun kalutaan, ipangaral yuy
Mahampata' Balita tungkul kangku ha laat
tawu.

¹⁶ Hay laata' manampalataya buy mag-
pabawtismu, maligtas ha kaparusaan,
nuwa hay laata' ahê manampalataya,
parusaan.

¹⁷ Buy atiya' palatandaana' maakit ha
tawtawung nananampalataya kangku. Ha
kangkun kapangyarian,* magpaalih hilan
anitu, mannunghung hilan kanayun sali-
tan ahê pun naitudu kanla.

¹⁸ Nu mandamput hilan aw'utan u
makaêñêm hitalagyuman lasun, ah hila
mapahamak. Nu patungan lan gamêt lay
mayin hakit, gumaling hila.”

*Hay Pagdakêy Apu Jesus ha Langit
(Lucas 24:50-53; Gawa 1:9-11)*

¹⁹ Pagkayarin nannungbung Apu Jesus
kanla, indakêy ya ha langit ta nitnu ya ha
kanan Apu Diyus.

²⁰ Nakuy namana' tawtagahunul na ha
iba iban rugal ha kalutaan ta nangaral.
Tinulungan hilan Panginuu manggawan
hawhimala. Haatin, pinapêtgan nay libun
pangangaral Apu Jesus.]

* **16:17 Ha kangkun kapangyarian** Ha Griego, ha lagyu ku.

Hay Sulat Pablo ha libun tiga

Efeso Tiga Efeso

1 Haku hi Pabloy alagad Apu Jesu Cristo ayun ha kaluuban Apu Diyus.

Nanyulataku kayun libun tiga Efeso ya pinilin Apu Diyus buy tapat kan Apu Jesu Cristo.

2 Indadalangin kun mapakayuy kahampatan buy kapayapaana' ibat ha Bap tamun hi Apu Diyus buy ha Panginuun tamun hi Apu Jesu Cristo.

3-4 Puriin tamu hi Apu Diyus ya Bapan Panginuun tamun hi Apu Jesu Cristo. Ta ha pakikigiha tamu kan Apu Jesus, in'ibi na kantamuy laata' pagpapalan ibat ha langit. Bayu na pun likhaêna' mundu, ha pamêmêtan pakikigiha tamu kan Apu Jesu Cristo, pinili nay na kitamu takay magin banal buy alan maakita' malaêt ha pamalyan na. Ta ha pagmamaal na kantamu.

5 hinhatu puni' intalaga nay na kitamu takay magin aw'anak na ha pamêmêtan Apu Jesu Cristo. Ta habayina' labay na buy kaluuban na,

6 taêmên puriin tamu hi Apu Diyus ta ha makapagtaka nang biyayan in'ibi na kantamu ha pamêmêtan minamaal nan Anak.

7-8 Ha pamêmêtan dayan Apu Jesus, tinubus kitamuy na, ya hay labay sabin pinatawadanay kawkasalanan tamu. Alan katbuha' biyayan impagkaluub kantamu Apu Diyus, ta binyanan na kitamu kabiyyahaan buy pagkatêbêk,

9 takay matêbêka' lihima' planu na ya labay nan matupad ha pamêmêtan Apu Jesu Cristo.

10 Atiya' planu na: paglatêng takdang panawun paggihaen nay dilag ha langit buy ha luta, ya magin sakupanan kapangyarian Apu Jesu Cristo.

11 Ginagawan Apu Diyus ya laata' bagay ayun ha planu buy kaluuban na. Buy ayun ha planu na hinhatu pun, pinili na kami takay magin kana ha pamêmêtan pakikigiha kan Apu Jesus.

12 Ginawa nay habatu takay hakamin ni unan nanampalataya kan Apu Jesus magpuri kana.

13 Hakaw man nakigiha kawu kan Apu Jesu Cristo hin nalêngê yuy kapêtêgan, ya hay Mahampata' Balita nu pakapakun kawun miligtas. Ta ha pananampalataya yu kana, in'ibi nay Ispiritu na ya impangaku na bilang tanda ya pag'aari na kawu.

14 Hay Banala' Ispirituy in'ibi na kantamu taêmên magpatunaya' matanggap tamuy ibat ha Apu Diyus ya impangaku na kantamun aw'anak na, anggan ha matanggap tamuy lubusa' kaligtasan. Dahilan kayti puriin ya ta ha kahampatan na!

Hay Panalangin Pablo

15 Kaya ban, hin nabalist'an kuy pananampalataya yu ha Panginuun Jesus buy hay pagmamaal yu ha pawpinilin Apu Diyus,

16 panaya' pasasalamat ku kan Apu Diyus dahilan kayu. Buy panay kitawun impapanalangin.

17 Impipikikwa ku kan Apu Diyus, ya dakilan Bapan Panginuun tamun hi Apu Jesu Cristo, ya biyan na kawun kabiyyahaan buy pagkatêbêka' ibat ha Banala' Ispiritu takay lalu yu ya pun makilala.

18 Impapanalangin ku mêt pa hawangén nay pusu yu buy ihipan takay matêbêk yuy pag'asan inlaan na kantamu, hay maalaga buy kasaganaana' pagpapala ya impangaku na ha libun pinili na.

19-20 Impapanalangin ku mêt kan Apu Diyus ya matandan yuy alan katbuha' kapangyarihan na para kantamu mananampalataya na. Hay kapangyarihana' atiya' ginamit na hin binyay nan uman hi Apu Jesus, buy hin pinaitnu nay na ha kanan na istu ha langit.

21 Kaya dilag ha lalêñ kapangyarihan Apu Jesus ya laata' anitun naghahari, namamaala, aw'anitun namumunu buy mayin kapangyarihan. Hay tungkulin nay ahê mapantayan hitalagyuman, alwan dili ha panawuna' ati, nu alwan ha lumatêng puna' panawun.

22 Impagkatiwalan Apu Diyus kan Apu Jesu Cristoy laata' bagay, buy ginawa yan

pinunun laat ha ikahampat mananam-palatayan miaawyun,

²³ ya hiyan pinakanawinin Apu Jesus. Hay laata' mananampalatayan miaawyun hilay pinakanawinin Apu Jesus ya hiyan kabuuan laat.

2

Binyay Kawu Kaawyun Hi Apu Jesu Cristo

¹ Hin hatu, inturing kawun natin Apu Diyus ta ha ah yu paghunul buy ha libun kasalanan yu.

² Nanabiyay kawun nambuh ha tawtawung makamundu. Buy nagsasakup kawu ha kapangyarihan Satanas, ya harin libun anitu ha mundu ya hiya mēta' anitun manguna ha pusun tawtawu ya ahē hinuhumunul kan Apu Diyus.

³ Hinhatus, nanabiyay kitamun mēt laat katbuh la. Nanabiyay kitamu ha malaēta' kalabayan nawini tamu, buy hinuhunul tamuy mangalaēta' labay nawini tamu buy kaihipan. Ha kalagayan tamun bantu, awyun kitamu mēt hana ha parusan Apu Diyus.

⁴ Nuwa maiingaluuna' Apu Diyus buy talagan dakilay pagmamaal na kantamu,

⁵ ta maski inturing na kitamun nati gawan ha libun kasalanan tamu, binyay na kitamun uman kaawyun Apu Jesus. Buy ha biyayan Apu Diyus, niligtas kitamu.

⁶ Buy binyay kitamun Apu Diyus kaawyun Apu Jesu Cristo ta ha pakikigha tamu kana, takay makaawyun na kitamun maghari ha kaharian na ha langit.

⁷ Ginawa nay habaytu takay ha lumatēngā' panawun, maipakit na ha laata' ah mapantayana' kasaganaan biyaya na ha kahampatan na kantamu ha pamēmēētan Apu Jesu Cristo.

⁸ Ta ha pamēmēētan biyayan Apu Diyus, niligtas kawu hin nanampalataya kawu kan Apu Jesus, alwan ibata' ati ha sarili yu nu alwan kaluuba' atin Apu Diyus.

⁹ Ah kawu miligtas ha pamēmēētan libun mangahampata' gawa yu, takay alan maipagyabanga' hitalagyuman.

¹⁰ Ta inlikha kitamun Apu Diyus. Buy ha pakikigha tamu kan Apu Jesu Cristo,

binyanan na kitamun bayun biyay, takay manggawa kitamun kahampatana' hin-hatu puni' intalagay nan Apu Diyus ya gaw'ēn tamu.

Hay pagkakagiha kan Apu Jesu Cristo

¹¹ Kaya hakawun libun alwan Judio, ihipin yuy kalagayan yu hinhatu. Impanganak kawun alwan Judio buy in-nununghung libun Judio ya ah kawu nangingilala kan Apu Diyus ta ah la kawu katbuha' tuli. Nuwa hay pagkakatuli la, ha nawini dili ya gawan tawu.

¹² Pakaihipin yu mēta' hinhatun ah yu pun kilala hi Apu Jesu Cristo, ah kawu kabilang ha tiga Israel buy ah kawu sakup ha libun kasunduan Apu Diyus ayun ha pangaku na. Nabyay kawu ha mundun atin alan pag'asa buy alan kilalan Diyus.

¹³ Hinhatu madayu kawu kan Apu Diyus, nuwa hapaēg ha pamēmēētan dayan Apu Jesus, naidani kawuy na kana.

¹⁴ Hi Apu Jesu Cristoy pinangibatan kapayapaan tamu ta pinaggiha nay Hawjudio buy hay alwan Hawjudio. Buy ha pamēmēētan pagkapaku na ha krus, in-alih nay kapuutan ha balang giha nambuh pagkagiban padira' mamihiyay ha Hawjudio buy alwan Judio.

¹⁵ Winal'an nan alagay kautuhan, kaawyuna' libun utuh buy libun patakaran ati. Ginawa nay ati takay paggihaēna' Hawjudio buy alwan Judio, ta baistu magkasunduy nay luwa.

¹⁶ Hapaēga' gigihay nawini kitamuy na ha pamēmēētan pagkamati' na ha krus, in-alih nay nay patiyan tamu buy impagka-sundu na kitamu kan Apu Diyus.

¹⁷ Naku hi Apu Jesu Cristo kayti ha mundu takay ipangaral nay Mahampata' Balitan naykasundu kayun alwan Hawjudio ya hin una madayu kawu kan Apu Diyus. Maski kanyan mēta' Hawjudio ya madani kan Apu Diyus, impangaral na mēt kanyana' Mahampata' Balita.

¹⁸ Hapaēg, pariparihu kitamuy nan makadani kan Apu Diyus ha pamēmēētan kagigihay Banala' Ispiritu ta ha ginawan Apu Jesu Cristo para kantamu.

¹⁹ Kaya hakawun alwan Hawjudio, alwa kawuy nan dayuhan u tiga ibang bansa, nu

alwan kabilang kawuy na ha pawpinilin Apu Diyus buy kabilang kawuy na ha pamilyan Apu Diyus.

²⁰ Hakitamun libun mananampalataya, maiitbuh ha gihay biyaga' batu ya hay haligi, hay aw'alagad buy libun tagapannungbung, buy hay maalagan batun pundsasyun hi Apu Jesu Cristo.

²¹ Ha pamêmêtan Apu Jesu Cristo, magkakatugnuy laat kagamitan ha biyaga' batu buy magin gihay banala' timplun Panginuun.

²² Hakawun alwan Hawjudio ta ha pakikigha yu kan Apu Jesu Cristo, naitugnu kawuy na ha libun Judio, ya nambuh kagamitan ha Timplun pinamimiriyen Ispiritun Apu Diyus.

3

Hay Planun Apu Diyus ha Alwan Hawjudio

¹ Ta habatuy ginawan Apu Diyus, hakun hi Pabloy nabilanggu ta ha paglilingkud ku kan Apu Jesu Cristo ha pamêmêtan awun panunudu ku para kayun alwan Hawjudio.

² Siguradun nabalist'an yun impagkatiwala kangkun Apu Diyus ya panunudun Mahampata' Balita kayu.

³ Katbuh ha innunghung ku ha sulata' ati, impatanda kangkun Apu Diyus ya lihim'a planu na.

⁴ Kaban binabasa yuy sulat kun ati, matandan yuy pagkatêbék ku ha lihim'a planun Apu Diyus tungkul kan Apu Jesu Cristo.

⁵ Alwan impatandan Apu Diyus ya planun ati ha tawtawu hinhatu, nuwa hapaêg, ha pamêmêtan Banala' Ispiritu, imparagタル nay ati ha libun alagad na buy libun tagapannungbung na.

⁶ Ati baya' planun Apu Diyus. Ha pamêmêtan Mahampata' Balita tungkul kan Apu Jesu Cristo, hay alwan Hawjudio, tagapagmana mêt pangakun Apu Diyus kaawyuna' Hawjudio, buy nambuh mêtana' hilan gigihay nawini ta ha pakikigha la kan Apu Jesu Cristo.

⁷ Ta ha biyayan Apu Diyus buy ha pamêmêtan kapangyarihan na, nagin tagapangaralakun Mahampata' Balita.

⁸ Maski hakuy pinakamayêpa ha laat mananampalataya, piniliyaku pun Apu Diyus takay ipangaral ku ha alwan Hawjudio ahê mapantayana' biyayan ibat kan Apu Jesu Cristo,

⁹ buy ipatanda ku ha laat nu pakapakun matupada' planun Apu Diyus. Hi Apu Diyusa' naylikhan laata' bagay, hin una inlihim nay planu na,

¹⁰ taêmên ha pamêmêtan mananampalatayan miaawyun, maipatanda ha libun anghila' namumunu buy mayin katungkulon ha langit, hay kabiyyahaan Apu Diyus ya naipangaral ha iba iban paraan.

¹¹ Ati ya planu na hin umpisa pun, buy natupadanay ati ha pamêmêtan Apu Jesu Cristo ya Panginuun tamu.

¹² Ta ha pakikigha kan Apu Jesu Cristo buy ha pananampalataya tamu kana, makadani kitamuy na kan Apu Diyus ya alan limu buy alan alinlangan.

¹³ Kaya hinhiling kun ah kawu hana pang'inaan luub ta ha libun pag'iirapa' dinadanas ku, ta para ha ikahampat yuy ati.

Hay Pagmamaal Apu Jesus

¹⁴ Nu naaalala kuy planun Apu Diyus, maglhudaku ya magpupuri kana.

¹⁵ Hiyay Bapan libun dilag ha langit buy dilag ha luta ya intuturing nan buung pamilya.

¹⁶ Impapanalangin ku kana ya palakasên nay luub yu ha pamêmêtan Ispiritu na, ayun ha alang anggana' kahampatan buy kapangyarihan na,

¹⁷ taêmên mamirmi hi Apu Jesu Cristo ha pawpusu yu ha pamêmêtan pananampalataya yu. Impapanalangin ku mêt'a magin matibay kawu buy matatag ha pagmamaal Apu Diyus

¹⁸ takay matêbék yu buy kanayun mêt'a pinilin Apu Diyus nu antun kamhak, kakadang, katag'ay buy nu pakapakun kalalêy pagmamaal Apu Jesu Cristo kantamu.

¹⁹ Labay kun madanasan yuy alwan mapantayana' pagmamaal na taêmên magin ganap kawuy katangian Apu Diyus.

²⁰ Kaya puriin tamu hi Apu Diyus ya makagawan higit pun ha impipikikwa u

inaasahan tamu ha pamêmêtan kapang-yarihan nan kinukumilus kantamu.

²¹ Puriin tamu hi Apu Diyus makanuman ta ha ginawa na para ha mananampalatayan miaawyun ya dilag kan Apu Jesu Cristo. Amen.

4

Nagkagihay libun mananampalataya kan Apu Jesu Cristo

¹ Kaya bilang gihay bilanggu ta ha paglilingkud ha Panginuun, hinihiling kun mabyay kawun karapatdapat bilang libun binawêg Apu Diyus.

² Magin mahinahun kawu, mapag-pakayêpa, maunawaen buy mapagsinsiya ha pagkukulang balan giha bilang pagpapakit pagmamaal ha balang giha.

³ Pagsikapan yun ahê maaliha' pagkagagiha yu ibat ha Ispiritun Apu Diyus ha pamêmêtan mapayapan pamiaawyin yu.

⁴ Ta gigihay nawini kitamun dili ya mayin gigihay Ispiritun Apu Diyus, buy gigiha mêta' pag'asang in'ibi kantamu hin binawêg kitamun Apu Diyus.

⁵ Gigihay Panginuun tamun hi Apu Jesus, gigihay pananampalataya, buy gigiha mêta' bawtismu.

⁶ Gigiha hi Apu Diyus ya hiyay Bapa tamun laat. Naghahari ya ha laat, kinukumilus ya buy nanimirmi kantamun laat.

⁷ Nuwa maski bahagi' kitamun gigihay nawini, binyanan nay balang giha kantamun kakayaan ayun ha kaluuban Apu Jesus.

⁸ Katbuh ha innununghung ha Kasulatan,

“Hin nagdakêy ya ha langit, gintan nay kanan nangadakêp
buy binyanan nay naman biyayay tawtawu.”*

⁹ Hapaêg, hita kayay kaulugan awun, “Nagdakêy ya ha langit?” Hay labay sabin ati, bayu ya nagdakêy uman ha langit, nagtabuy ya pun kayti ha luta.

¹⁰ Buy hay nagtabuy kayti ha luta, hiya mêta' nagdakêy ha katag'ay tag'ayan langit takay magin lubusa' kapangyarihan na ha laata' bagay.

¹¹ Hay kanayun ginawa nan alagad, hay kanayun ginawa nan tagapannunghung Apu Diyus, buy hay kanayun ginawa nan maypatandan Mahampata' Balita, buy hay kanayuna' naman ginawa nan mangalênggêp libun mananampalataya[†] buy maytudu kanla.

¹² Ginawa nay ati takay ihanday pawpinili na ha paglilingkud, buy takay lumagu buy magin matatag hila bilang nawinin Apu Jesus.

¹³ Ha paraana' ati, maabut tamun laata' pagkakagiha ha pananampalataya buy pagkakilala ha Anak Apu Diyus, buy lumagu kitamun mananampalataya anggan ha magin ganap kitamun katbuh Apu Jesu Cristo.

¹⁴ Ta nu maabut tamuy nay ati, alwa kitamuy nan katbuh anaka' pabayu'bayuy ihip ya naaagkat tawtawu ha kamalaêtan, ya hay hangad la, gitana' tawtawu ha malukê.

¹⁵ Ha halip, mannumunghung kitamun kapêtégan ya mayin pagmamaal takay ha laat bagay magin katbuh kitamun Apu Jesus ya hiyan pinaka' u tamun libun mananampalataya.

¹⁶ Ha pamêmêtan na, pinitutugnu nay laata' bahagin nawini na, ya alan kanayun nu alwan hay libun mananampalataya buy hay balang gihay mitutulung. Buy hay balan hinuhumunul ha impapagawan Apu Jesu Cristo ya mayin pagmamaal, inlulumagu buy tinutumataga' buun nawini.

Hay Bayun Biyay kan Apu Jesu Cristo

¹⁷ Ha lagyun Panginuun, impipilit kun ah kawuy na mamuhay katbuh tawtawung alwan nakakakilala kan Apu Diyus. Ta alan silbiya' inihip la,

¹⁸ buy ah la natêtêbêka' libun kapêtéganâ tungkul kan Apu Diyus. Ta ha ala hilan tanda buy mangatigasa' u la, ala hilan bayun biyay ya in'ibin Apu Diyus.

¹⁹ Alay na hilan kadêdêng'êyan, kaya nagpasakupana' hila ha mangaalaya kalabayan nawini la buy labay lan panay manggawan kadêmêkan.

²⁰ Nuwa hakawu, alwan habatuy natan dan yu tungkul kan Apu Jesu Cristo.

* **4:8** Kawkanta 68:18. † **4:11** U pastor.

²¹ Nalêngê yuy nay tungkul kan Apu Jesus buy natuduwanan kawuy nan kapêtégana' dilag kana.

²² Kaya alihin yuy nay daan yun pamumuhay ta gaw'êna' atin daan yung pagkatawu. Hay pagkatawu yun ati ya naypapahamak kayu ta ha mangalaêta' kalabayana' nanluluku kayu.

²³ Paulayên yun bayuun Apu Diyus ya ihip yu buy ugali yu.

²⁴ Ipakit yun binayu kawuy nan Apu Diyus buy binyan na kawun bayun biyay ya matuynung buy malinis katbuu Apu Diyus.

²⁵ Kaya ah kawuy na magsinungaling. Kapêtégan tanay nunghungan yu ha pawpatêl yu, ta miaawyun kitamun laat ha gigihay nawini.

²⁶ Nu mapuut kawu, ah yu paulayêna' magkasala kawu. Buy ah yu paulayên du mana' allêwa' puut kawu pun ha pawpatêl yu.

²⁷ Ah yu biyan pagkakatawun hi Satanas.

²⁸ Hay magnanakaw, andi yana manakaw, nu alwan magtrabahu yan marangal takay makatulung ya mêt ha nangan-gaylangan.

²⁹ Ah kawu mannumhung malaêt nu alwan hay makahampat dili buy angkup ha kalagayan takay magin pakinabang ha nakakalêngê.

³⁰ Buy ah yu palungkutana' Ispiritun Apu Diyus. Ta hay Ispirituy tatak ya kan Apu Diyus kawu, buy hiyay katibayan kaligtasan yu pangalatêng allêw.

³¹ Alihin yuy hitamana' hakit nakêm, puut, patiyan, pambubulas, panghihira ha kaparihu, pati laata' kalasin mangalaêta' hangarên.

³² Ha halip, magin mabait kawu buy magin maingaluun ha balang giha. Buy magpatawed kawu ha balang giha katbuu pagpapatawed Apu Diyus kayu, ta ha ginawan Apu Jesu Cristo.

5

Mamuhay katbuu tawtawung nahawan-gan

¹ Kaya tubhun yu hi Apu Diyus, ta hakawun laata' minamaal nan aw'anak.

² Mamuhay kawun mayin pagmamaal ha kaparihu yu katbuu pagmamaal kantamun Apu Jesus. In'alay nay sarili na kantamu bilang kalugudluguda' handug kan Apu Diyus.

³ Ta pinili na kawu, ah kawu dapat kalêng'an manggawan malaswa, mangaalay buy sakima' giha man kayu.

⁴ Buy andi dapat malêngê kayuy mangalaswa u alan silbi ya nunghungan u mangalaêta' biru. Nu alwan panay kawun mapagpasalamat kan Apu Diyus.

⁵ Tandaan yu, alan tawun mapaawyin ha kaharian Apu Jesu Cristo buy Apu Diyus ya nakikitakpi, mangaalay ya pamumuhay, u sakim. Ta hay tawun sakim katbuu mêt nanampalataya ha libun diyus-diyusan.

⁶ Ah kawu magpaguluy ha alan silbin pangangatwiran kanayun tungkul ha mangalaêt lan gawaên. Ta ha bawbagaya' ati, puuta' puut hi Apu Diyus ha libun ah hinuhumunul kana.

⁷ Kaya ah kawu makiawyun ha ginagawan tawtawung ati.

⁸ Hinhatu nanabiyay kawu ha kadlêman, nuwa hapaêg, nahawangan kawuy na ta nakigha kawuy na ha Panginuun. Kaya ipakit yu ha pamumuhay yuy nahawan-gan kawuy na.

⁹ Ta nu hay gihay tawuy nahawan-ganana, maakit kanay kahampatan, katuynungan, buy kapêtégan.

¹⁰ Pakatandan yu nu hita kalugudlugud ha Panginuun.

¹¹ Ah kawu makiaawyun ha libun alan silbi ya ginagawan tawtawung dilag ha kadlêman, ha halip, ipatanda yu kanlay kamalaêtan la.

¹² Ta kadêng'êy dêng'êy sabin maski pi-nununghungan diliya' bawbagaya' ginagawa lan lihim.

¹³ Nuwa nu patandan yu hila ha mangalaêta' gawaên la, mahawangan hila buy matandan lan malaêt baya' libun ginagawa la.

¹⁴ Ta hay laat maabut kapêtégan, mahawangananana. Kaya bay innununghung, "Mapukaw ka, hakan natutuluy, mibangun ka ibat ha nawnati buy hawangan kan Apu Jesus."

¹⁵ Kaya mag'ingat kawu nu pakapakun kawun mamuhay. Ah kawu mamuhay katbuhan libun alwan biyaha, nu alwan mamuhay kawun katbuhan bawbiyaha.

¹⁶ Ah Yu sayangêna' panawun Yu. Gamitin yuy ati ha panggawan mahampat, ta dêlay nanggagawan kamalaêtan ha panawuna' ati.

¹⁷ Kaya ah kawu magin muwmulala, nu alwan pakatandan Yu nu hita kaluuban Panginuun ya gaw'ên Yu.

¹⁸ Ah kawu maglahing ta nakakahiday ati ha mahampata' pamumuhy. Ha halip, paulayan yung mapuspus kawun Ispiritun Apu Diyus.

¹⁹ Ha pamiaawy whole, magkantaan kawun libun iba'iban kalasin kanta para kan Apu Diyus. Buun pusu kawun magkanta buy magpuri ha Panginuun.

²⁰ Panay kawun magpasalamat kan Apu Diyus ya Bapa tamu ha laata' bagay bilang mananampalatayan Apu Jesu Cristo.

Aral ha libun Miahawa

²¹ Magpasakup kawu ha balan giha bilang paggalang kan Apu Jesu Cristo.

²² Bawbabayi, magpasakup kawu ha kayung ahawa katbuhan pagpapasakup Yu ha Panginuun.

²³ Ta hay liyaki hiyay pinaka u awun ahawa na, katbuhan Apu Jesus ya pinaka u awun mananampalataya ya hiyan pinakanawini na, buy hiya mêtä' tagapagligtas mananampalatayan miaawy whole.

²⁴ Kaya nu pakapakun nagpapasakupan' mananampalatayan miaawy whole kan Apu Jesus, habatu mêtä' bawbabayi magpasakup mêt hila ha ahawa la ha laata' bagay.

²⁵ Kaliyakyan, maalén yuy ahawa Yu, katbuhan pagmamaal Apu Jesu Cristo ha mananampalatayang miaawy whole. In'alay nay sarili na para ha mananampalatayang miaawy whole

²⁶ taêmén magin banal hila pagkayarin linisin ha pamêmêtan pagbawtismu ha lanêm buy ha nunghung Apu Diyus.

²⁷ Ginawa nay ati takay maiarap nay kanang sarili ha libun mananampalatayan miaawy whole ya banal, alan

kapintasan, buy alan hitamana' bahid dungis.

²⁸ Habatu mêtä' naman, dapat maalén liyaki hay kanang ahawa katbuhan pagmamaal na ha kanang sarili. Ta hay nagmamaal ha kanang ahaway nagmamaal ha sarili na.

²⁹⁻³⁰ Alan tawun nasusuklam ha sarili nan nawini, ha halip, pinapakan nay ati buy inaalénggêp. Habatu mêtä' ginagawan Apu Jesus kantamu ya binabawêga' mananampalatayan miaawy whole ta bahagi' kitamuy nan nawini na.

³¹ Innununghung ha Kasulatan, "Itayak liyaki ya bapa na buy indu na buy makiawy whole ya ha kanang ahawa buy hilan luway magin giha."

³² Malaléy kapêtégana' impahayag Apu Diyus. Impapakit kaytiya ugnayan awun Apu Jesus buy mananampalatayan miaawy whole.

³³ Kaya hakawun libun kaliyakyan, maalén yuy ahawa Yu katbuhan pagmamaal Yu ha sarili Yu. Buy hakawun bawbabayi, igalang yuy kayung ahawa.

6

Aral ha Mangatuwa buy Aw'anak

¹ Hakawun aw'anak, hunulun yuy mangatuwa Yu ta habatuhan dapat gaw'ên bilang libun mananampalataya ha Panginuun.

² "Igalang yuy bapa Yu buy indu."* Atiya' unan utuh ya mayin kaawyuna' pangaku.

³ "Nu igalang yuy mangatuwa Yu magin mahampat buy kumadanga' biyay Yu kayti ha mundu."

⁴ Buy hakawuy namana' mangatuwa, ah kawu manggawan bagaya' ikahakit nakêm aw'anak Yu. Ha halip, pakamhakên Yu hilan mahampat buy tuduwanan Yu hilan aw'arala' ibat ha Panginuun.

Aral ha aw'alipên buy ha aw'amu

⁵ Hakawun aw'alipên, hunulun yuy aw'amu Yu kayti ha luta ya mayin katapatan, paggalang buy pagkalimun dapay hi Apu Jesus ya pinaglilingkuran Yu.

⁶ Gaw'ên yuy atin mayin kusan luub nakabalay man hila u alwa takay matula hila, ta aw'alipên kawun Apu Jesu Cristo ya

* ^{6:2} Exo 20:12; Deu 5:16.

buun pusun nanggagawan kaluuban Apu Diyus.

⁷ Maglingkud kawun buun pusu dapay ha Panginuun ya talagan pinaglilingkuran yu buy alwan dilin hay tawu.

⁸ Alalahânê yuy gantimpalan Panginuun ha balan giha kayu ayun ha ginawa nan kahampatan, alipêñ man u alwa.

⁹ Buy hakawuy namana' aw'amu, pakisamaan yun mahampata' kayung aw'alipêñ. Ah yu hila palimun, ta tanda yuy naman ya hakawu buy hila mayin gigihay amu ha langit, buy ah ya namimili.

Libun Kagamitana' Pandigma ya Kaluub Apu Diyus

¹⁰ Atiya' pagtatapus sulat ku, magpakatatag kawu ha Panginuun ha pamêmêtan dakilan kapangyarihan na.

¹¹ Gamitin yuy laata' kagamitana' pandigma ya in'ibi kayun Apu Diyus takay malabanan yuy libun mangalaêta' gawan Satanas.

¹² Ta hay kalaban tamuy alwan tawtawu nu alwan aw'anitu ha babun luta, pawpinunu, mayin kapangyarihan buy libun tagapamaalan kadlêmana' namamayani' ha mundun ati.

¹³ Kaya gamitin yuy laata' kagamitana' pandigma ya in'ibi kayun Apu Diyus, takay ha urasa' lumatêngâ' kamalaêtan, matatag kawu, buy pagkayari yun makipaglaban, manatili kawun malakas.

¹⁴ Kaya magin handa kawu. Gaw'ên yun sinturuna' kapêtêgan. Isuut yuy pagkamatuynung yu bilang panyanga ha dêbdêb yu.

¹⁵ Isuut yu bilang sapatus ya nakanhandang manudun Mahampata' Balitan nanam'in kapayapaan.

¹⁶ Alwan dilin hayin, gamitin yu mêt bilang panyangay pananampalataya yu takay ah kawu tablan libun panunuksun Satanas ya dapay pana' ya nagliliyab.

¹⁷ Ihambalilu yuy tinanggap yun kaligasan, buy gamitin yu bilang katanay nunghung Apu Diyus ya kaluub Ispiritu na.

¹⁸ Buy manalangin kawu ha laata' uras ha tulung Ispiritun Apu Diyus. Nu manalangin kawu magmakaingalu kawu buy mikikwa kana. Ah kawu magpabaya buy

patuluy kawun manalangin laluy na para ha laata' pinili na.

¹⁹ Ipanalangin yu ku mêt amun mangaralaku, ya biyan nakun Apu Diyus taman pannungnunghung takay maipangaral kun buun tapanga' Mahampata' Balitan inlihim hinhatu.

²⁰ Ta in'utuhakun Apu Diyus takay mangaral awun Mahampata' Balita ya dahilan pagkakakulung ku. Kaya ipanalangin yun maipangaral kun buung tapanga' ati ta atiya' nararapat.

Libun Pangwakasa' Pangungumusta

²¹ Hi Tykicus, ya minamaal tamun patêl buy tapata' lingkud Panginuun, ya maybalita kayun laat tungkul kangku, takay matandan yuy kalagayan ku buy nu hita panggaw'ên ku.

²² Atiya' dahilan angkaya pinalaku ku ya kayu takay matandan yuy tungkul kanyan buy palakasên nay luub yu.

²³ Pawpatêl, dalangin kun mapakayuy kapayapaan, pagmamaal buy pananampaлатayang ibat kan Apu Diyus ya Bapa tamu buy kan Apu Jesu Cristo.

²⁴ Labay kun mamirmi ya kahampatan Apu Jesu Cristo ha laat nagmamaal kanan alang anggan.

FILIPOS

Panimula

Hay Sulata' ati, insulat Pablo ha libun mananampalatayan dilag ha Filipos. Hay Filipos, gihay banwa ha Macedonia ya sakup Roma. Ingkulung hi Pablo ta ha pangangaral nan Mahampata' Balita tungkul ha Panginuun Jesu Cristo. Kaban nakakulung hi Pablo innunuhung na ha sulat nay pasasalamat na ha libun mananampalataya ha Filipos ta ha tulunga' impapagtan la kana. Labay na mēta' matandan lan mamhaka' nagawan tulung awun pagkakakulung na takay kumalata' Mahampata' Balita tungkul kan Apu Jesus. Nag'aalala ya ta mayin libun sinusumalungat ha pêtéga' arala' nakapahukana ha Filipos. Nuwa maakit ha sulat nan atiya' tula na buy katatagan luub ta matataga' pananampalataya na kan Apu Jesu Cristo. Ha pamêméétan sulat nan ati, labay nan palakaséna' luub la takay ah hila mabaala ha kalagayan na buy ha libun pag'iirap buy pag'uusig ha biyay la. Pinannunghungan na hilan magpakayêpa katbuh Apu Jesus buy andi hila magtan ha pagmatag'ay buy ha sarili la dilyn hangarén. Impaakit nan hay biyay ya mayin hila kan Apu Jesu Cristo, in'ibi kanlan Apu Diyus buy tinanggap la ha pamêméétan pananampalataya, alwan ha paghunul la ha libun nakaugaliyan Hawjudio. Ha sulat nan ati, binyanan nan alagay kagalakan, kapanatagan, pagkakagiha, pagpapatuluy ha pananampalataya, buy pamumuhy bilang anak hilan Apu Diyus. Innununghung mêt Pablo kaytiya malalén pagmamaal na ha kawkapatêlana' tiga Filipos.

Hay Sulat Pablo ha Tawtiga Filipos

¹ Haku hi Pablo, kaawyun ku hi Timoteo ya kaparihu kun lingkud Apu Jesu Cristo. Nanyuyulataku kayun pinilin Apu Diyus ya tawtiga Filipos buy kagihan Apu Jesu Cristo, awyuna' libun namumunu kayu buy libun manulung kanla buy ha libun mananampalataya.

² Indadalandin kun mapakayuy kaham-patan buy kapayapaan Bapa tamun hi Apu Diyus buy Panginuun tamun hi Apu Jesu Cristo.

Hay Panalangin Pablo ha Tawtiga Fili-pos

³ Tuwin naihip ku kawu, nagpapasala-mataku kan Apu Diyus ya Panginuun ku.

⁴ Panayakun natutula tuwin impa-panalangin ku kawun laat.

⁵ Ta ibat pun hinhatun nanampalataya kawu angga hapaêg, tinutulungan yu ku êmén makapagpalaganapakun Mahampata' Balita.

⁶ Naniniwalakun ipagpatuluy Apu Diyus hay mahampata' gawêna' sinimul'an na kayu anggan matapus nay ati ha allêwa' magbalik hi Apu Jesu Cristo.

⁷ Pawpatêl ku, taman diliya' atiya' matanam ku kayu ta maala maal ku kawu. Miaawyin kitamun nakadanas kahampatan Apu Diyus hinhatu puna' malayakun naytatanggul buy nagpapa-hayag Mahampata' Balita tungkul kan Apu Jesus, maski hapaêga' nakakulungaku.

⁸ Tandan Apu Diyus ya talagan labay ku kawuy nan makaawyun ta maal katawu katbuh pagmamaal kayun Apu Jesu Cristo.

⁹ Nananalanginaku kan Apu Diyus ya lalu pun lumaléy pagmamaalan yu ha gihat giha ya mayin kabiyahaan buy pagkatébék nu hita mahampat buy malaêt

¹⁰ takay mapili yuy pinakamahampata' gaw'ên. Nu habatu, ha allêw pagbalik Apu Jesu Cristo, maakit nan malinis kawuy na ha pamalayan Apu Diyus buy alay nan kamalaêtan ha biyay yu.

¹¹ Impapanalangin kun tulungan kawun Panginuun Jesu Cristo ya panay kawun mamuhaya' matuynung êmén mapapurian buy maparangalan hi Apu Diyus.

Hay Tulan Pablo hin Maipanggaral Nay Tungkul Kan Apu Jesu Cristo

¹² Pawpatêl ku, labay kun matandan yun hay pagkakulung kuy mamhaka' na-gawa takay kumalata' Mahampata' Balita tungkul kan Apu Jesus.

¹³ Ta ha nangyari, natandan saw-sundalun pakabantay ha palasyu buy

kanayuna' dilag kaytiya ingkulungaku ta nangangaralakun tungkul kan Apu Jesu Cristo.

¹⁴ Buy alwan dilin habatu ta ha pagkakulung ku, madla ha pawpatêl tamu ha Panginuun ya lalu pun nagin matataga' kaluuban buy alan limun nangangaral Nunghung Apu Diyus.

¹⁵ Pêtêga' mayin umnun nangangaral tungkul kan Apu Jesu Cristo ta nainggit hilan dili buy labay lan ipaakita' mabiyaha pun hila kisira kangku. Nuwa mayin mêt nangangarala' talagan mahampata' kaluuban la buy labay lan makatulung ha pagpapalaganap Mahampata' Balita.

¹⁶ Impapangaral la hi Apu Jesu Cristo ta pêtêga' pagmamaal la kangku. Ta tanda lan kaluuban Apu Diyus ya pagkakulung ku takay maitanggul kuy Mahampata' Balita ha tawtawung awyun kun nangakakulung kayti.

¹⁷ Nuwa hay kanayun, alwan mahampata' kaluuban la. Nangangaral hilan Mahampata' Balita ha sarili la dilin kalabayan takay puriin hila. Indap la kaban nakakulungaku kayti, mapahkitan lay kaluuban ku.

¹⁸ Nuwa ala kangkuy hatu. Pêtêg man u alway hangarên la, basta ipangaral lan dili hi Apu Jesu Cristo, natutula kuy na. Buy patuluyakun matula.

¹⁹ Ta tanda kun ha pamêméetan panalangan yu, buy ha tulung Ispiritun nangibat kan Apu Jesu Cristo, makalayaku mêt kayti.

²⁰ Mamhaka' hangarên ku buy pag'asan ah ku mapadêng'ey ha hitaman nu alwan katbuhan hinhatus panayakun magin matatag takay maparangalan ku hi Apu Jesu Cristo ha biyay ku maski ikamati ku pun u alwa.

²¹ Ta para kangku, hay mabiyayi' taêmén maparangalan hi Apu Jesu Cristo, buy hay kamatiyani' mas mahampat ta tanda kun makaawayun ku yay na.

²² Nuwa nu pakadangê pun Apu Diyus ya biyay ku, mahampat mêt ta dêla punakun magawa ha paglilingkud kana. Kaya ah ku tanda nu hita pilin ku.

²³ Nahahatiya' ihip ku ta labay ku hanan matiyana takay makaawayun kuy na hi Apu

Jesu Cristo ta atiya' mas mahampat.

²⁴ Nuwa para ha ikahampat yu, kayangan ku pun mabyay.

²⁵ Kaya siguraduwakun kumadang puna' biyay ku buy makaawayun yu ku takay matulungan ku kawun magin matatag ha pananampalataya kan Apu Jesus buy magin masaya ta ha pananampalataya yu.

²⁶ Buy nu makabalikakuy na kayu, mas lalu yun puriin hi Apu Jesu Cristo ta imbalik na ku kayu.

²⁷ Kaya hapaêg, hitamana' mangyari kantamu, mamuhay kawun ayun ha Mahampata' Balita tungkul kan Apu Jesu Cristo takay'êmén makaawayun yu ku u alwa, mabalit'an kun nagkakagiha kawu buy miaawyuna' naytatanggul pananampalataya yun ayun ha Mahampata' Balita.

²⁸ Ah kawu malimu ha libun nan'uusig kayu. Ta nu ah kawu nalilimu kanla, matandan lan mipamalaêt hila ha alan anggana' kaparusaan Apu Diyus nuwa kawu, iligtas na.

²⁹ Ta alwa kitamu dilin pinagkaluubana' manampalataya kan Apu Jesus nu alwan makadanás mêt pagtitiis alang alang kana.

³⁰ Hay pag'iirapa' nadadanás yu hapaêg katbuhan mêt ha pag'iirapa' naakit yu kangku hinhatus buy angga hapaêg, nabalit'an yun nadadanás ku pun.

2

Hay Pagpapakayêpan Apu Jesu Cristo

¹ Kaya ba pawpatêl ku, nu mayin kawun kasiglaan ta ha pakikigiha yu kan Apu Jesu Cristo, nu mayin kawun kaaliwan ha pagmamaal na, nu mayin kawun pakikigiha ha Ispiritun Apu Diyus, nu mayin kawun malasakit buy ingalu ha gihat giha,

² lubusun yuy nay tula ku: mikakasundu kawu buy magmaalan, buy mikakagiha ha ihip buy layunin.

³ Ah kawu manggawan hitaman ta labay yu dilin itag'ay kawu buy magyabang nu alwan magpakayêpa kawu ha gihat giha buy ituring yun mas mahampata' kanayun kisira kayu.

⁴ Alwan dilin hay ikahampat sarili yuy ihipin yu nu alwan hay ikahampat mêt kanayun.

⁵ Kaylangana' katbuhan kaihipan Apu Jesu Cristoy kaihipan yu.

⁶ Maski nanaakit kanay pagkaDiyus na, Ah na impilita' mamirmin kapantay Apu Diyus

⁷ Nu alwan imbalag nay pagkaDiyus na. Buy hin impanganak ya kayti ha mundu, Naglingkud ya katbuhan alipên.

⁸ Nagpakayêpa ya
Buy naging mahunulun anggan kamatiyan, Magin kamatiyan ha krus.

⁹ Kaya ban binyanan yan Apu Diyus pinakamatag'aya parangal

Buy lagyun alan kapantay

¹⁰ Takay ha lagyu na, hay laata' dilag ha langit, dilag ha luta, buy dilag ha lalén luta,

Magluhud buy magpuri kana.

¹¹ Buy ipahayag lan, "Hi Apu Jesu Cristoy Panginuun."

Ta baistu, maparangalana' Bapa tamun hi Apu Diyus.

Magin Pêtêga' Anak Apu Diyus

¹² Kaya ban minamaal kun pawpatêl, hin miaawyin kitamu pun, panay yun hinuhunula' impapangaral ku kayu. Hapaêga' madayuwakuy na kayu, lalu kaw pun hanan humunula' mayin limu buy paggalang kan Apu Diyus takay malubusa' kaligtasan yu.

¹³ Ta hi Apu Diyus ya nanam'i kayun pag-nanaisa' makahunul kana buy kakayaana' magawa yu nu hita kaluuban na.

¹⁴ Mamuhay kawun alan riklamu buy ribatiyan

¹⁵ takay alan maakita' malaêt kayu buy maakita' mahampata' luub yu ta anak kawun Apu Diyus. Ta maski napapalibutan kawun subran mangalaêta' tawu kayti ha mundu, dapay kawun bêtewêñ ha langita' magin dêkêt la

¹⁶ kaban impapangaral yu kanlay Mahampata' Balita ya nanam'in biyay ya alan anggan. Gaw'en yuy ati taêmén pagbalik

Apu Jesu Cristo kayti ha mundu, maipag-malaki kun ah nasayanga' pagtitiyaga ku.

¹⁷ Buy nu kaylangana' ibunluga' daya ku ha panampalataya yu bilang handug kan Apu Diyus taêmén magin ganapa' panampalataya yu kana, maligaya kuy na buy makitulaku kayu.

¹⁸ Kaya matula kaw mêt buy makitula kangku.

Hilan Timoteo buy hi Epafroditu

¹⁹ Hapaêg, nu ipahintulut Apu Jesu Cristo, palakwun ku bahêñ hi Timoteo ha madalin panawun takay pagbalik na kayti, mapanataga' kaluuban ku nu matandan kuy nay kalagayan yu.

²⁰ Ta maliban kan Timoteo, alay nan kanayuna' katbuhan kun pêtêga' nagmamasakit kayun laat.

²¹ Ta hay kanayun, sarilin labay diliya' iniihip alwan hay labay Apu Jesu Cristo.

²² Nuwa tanda yuy na nu pakapakun napapêtgana' katapatan Timoteo. Tinulungan na ku ha pangangaral Mahampata' Balita katbuhan gihay anaka' tinutumulung ha sarili nan bapa.

²³ Kaya nu matandan kuy na nu hita mangyari kangku kayti ha kulungan, palakwun ku ya bahêñ.

²⁴ Naniniwalakun ha tulung Panginuun, makalatêngaku mêt bahêñ kayu ha madalin panawun.

²⁵ Hapaêg, naihip kun paulinana bahêñ kayuy patêl tamun hi Epafroditu, kaparihu kun naglilingkud kan Apu Diyus buy naytatanggul ha Mahampata' Balita*. Pinalaku yu ya kayti takay gitana' tulung yu buy tulunganaku mêt.

²⁶ Labay nay na talagan makaauli bahêñ ta nag'aalala ya hin nabalist'an nan nakalatêngana' kayun nagkahakit ya.

²⁷ Pêtêg baya' nagkahakit ya buy kayêñ tanan nati. Nuwa kinaingalwan yan Apu Diyus maski haku mêt ta pinagaling ya. Ta nu nati ya, subray lungkuta' matanam ku.

²⁸ Kaya labay ku yay nan paulin talaga bahêñ takay matula kawu nu maakit yu yan uman buy mabaw'ahana' lungkut ku.

* ^{2:25} Naytatanggul ha Mahampata' Balita Ha Griego, kaparihun sundalu.

²⁹ Kaya ha pagbalik na bahêñ, tanggapêñ yu yan lubusa' tula yu bilang patêl ha Panginuun Jesus. Igalang yu mêtâ' tawtawung katbuh na

³⁰ ta ha paglilingkud na kan Apu Jesu Cristo, kayêk tana hiyan nati. Insuung na ha panganiba' biyay na takay'êmén tulunganaku ya gaw'ên yu mêt nu dilag kawu kayti.

3

Hay Pêtêga' Matuynnung

¹ Hapaêg, pawpatêl ku, matula kawu ta ha pakikigha yu ha Panginuun Jesus. Ah ku magsawang umanêñ kayuy impangaral kuy na hinhatau ta atiya' magpatatag kayu nu mayin mangaral kayun alwan pêtêg.

² Mag'ingat kawu ha tawtawung ugalin ayêp, mapanggawan malaêt buy impipilit lan dapat kawun tulin takay miligtas kawu.

³ Nuwa hakitamuy pêtêga' tinuli ha pamalyan Apu Diyus ta nagpupuri kitamu kana ha tulung Ispiritu na buy impagma malaki tamuy ginawan Apu Jesu Cristo. Buy ah kitamu nagtiwalan maligtas kitamu ha pamêmêtan kaugaliyana' hinuhunul tawtau.

⁴ Ta nu habayin diliya pinununghungan, mayinaku mêt maipagmalaki. Kaya nu mayin mannunghunga' maari yan magmalaki ta ha paghunul na ha nakaugaliyan libun Judio, lalu punaku.

⁵ Ta hin walun allêwaku puna' impan ganak, tinuliyakuy na. Pêtêga' Hebreo haku ta Hebreoy mangatuwa ku buy pêtêga' Israelita ku ta ibataku ha lahin Benjamin. Buy nu ha paghunula' naman ha kautuhan Hawudio, talagan hinuhunul kuy ati ta gihakun Pariseo.

⁶ Buy talagan labay kun maparangalan hi Apu Diyus kaya inusig kuy libun nananampalataya kan Apu Jesus ta indap kun matula ya. Buy nu tungkula' naman ha paghunul ha kautuhan, alan main unghung kangku ta hinunul kun laat.

⁷ Habiyana' bawbagaya' intuturing kun maalaga hin una nuwa hapaêg alay nan alaga kangku ta labay kun makilalan lubusan hi Apu Jesu Cristo.

⁸⁻⁹ Buy alwa dilin habayin ta hay laata' bagay alan alaga nu ikumpara ha pagkakilala ku kan Apu Jesu Criston Panginuun ku. Inturing kuy nan alan alagay ati buy madumi hapaêg takay'êmén lubusan kun makilala hi Apu Jesu Criston Panginuun ku buy makagiha ku ya. Alwan ha paghunul ku ha kautuhan kaya inturingakun matuynnung Apu Diyus nu alwan ha pananampalataya ku kan Apu Jesu Cristo.

¹⁰ Hapaêg, labay kun lalu pun makilala hi Apu Jesu Cristo buy madanasana' kapangyarian pagkabiyay nan uman. Labay ku mêt makigiha ha kanan pag'iirap buy magin katbuh kana ha kanan kamatiyan

¹¹ takay'êmén maski matiyaku, mabiyayakun uman.

Magpatuluy Anggan Malatêngä' Angganan

¹² Alwa kun innununghunga' natupad kuy nay laata' habayin. Alwa ku mêt innununghunga' talagan nagin katbuhakuy nan Apu Jesu Cristo. Nuwa sinisikap kun mas magin katbuh na ta habaina' dahilan ha pamawêg na kangku.

¹³⁻¹⁴ Pawpatêl, alwa kun innununghunga' mas nagin katbuh nakuy na nuwa gihay bagaya' ginagawa ku. Ah kuy na iniihipa' bawbagay ha nakaraan, buy sinisikap kun makuway bawbagaya' papalatêng. Katbuh gihay manlulukhu, sinisikap kun malatêngä' angganan takay makwa kuy gantimpala ya binawêgakun Apu Diyus ha langit ha pamêmêtan Apu Jesu Cristo.

¹⁵ Kaya bay habayina' dapat tamun ihipin, hakitamun matatagana ha pananampalataya. Nuwa nu alwan habatuy iniihip yu, ipatêbêk Apu Diyus kayuy tama.

¹⁶ Habatu man, hay maalaga, magpatuluy kitamu ha paghunul ha kapêtêgana' impahayag Apu Diyus.

¹⁷ Pawpatêl, tubhun yu ku buy tubhun yu mêtâ' tawtawung titimbuh kami.

¹⁸ Ta madlan tawtawung nannununghunga' nananampalataya hila kan Apu Jesus nuwa maakit ha malaêt lan pamumuhyaya' sinusumalungat hila ha pangangaral tungkul ha pagkamatin Apu Jesu Cristo ha krus. Panay kuy nan innununghunga'

habatu kayu hin una nuwa hapaêg in-nununghung kun umana' ati kayu kaban nananangihaku.

¹⁹ Alan anggan kaparusaana' kalatgan la, hay diyus lay labay nawini la, buy impagyayabang lay bawbagaya' dapat lan ikadêng'êy. Alay na hilan kanayuna' ini-ihip nu alwan hay bawbagay dili kayti ha mundu.

²⁰ Nuwa hay pêtêga' rugal tamuy istu ha langit. Buy baistu mangibata' Tagapagligtas tamun hi Apu Jesu Cristo ya inéêtêng tamun mayin pagkahabék.

²¹ Ha paglatêng nan uman, bayuun nay nawini tamun maina buy nanati buy gaw'ên nan katbuh ha nawini na hin binyay yan uman Apu Diyus. Gaw'ên nay ati ha pamêmêtan kapangyarian nan nanyayakup ha laata' bagay.

4

Hay Libun Bilin

¹ Kaya bay pawpatêla' minamaal ku buy kinahahabékhan, hakawun nanam'in tula kangku buy gantimpala ku ha paglilingkud, magin tapat kawu ha Panginuun.

² Nakikinunghungaku kayu Eudia buy Sintique ya magkaayus kawuy na ta mipatêl kawu ha Panginuun.

³ Nakikinunghungaku mêt kamun tapat kun kaawayun ha pangangarala' tulungan mun magkaayusa' babayin ti. Ta kaawayun ku mêt hilan naytatanggul Mahampata' Balita tungkul kan Apu Jesus. Kaawayun hilan Clemente buy kanayun puna' kaawayun kun naglilingkud. Hay lagyu lay nakasulat ha librun biyay ya pinanyuyulatan libun lagyun mab'ian biyay ya alan anggan.

⁴ Panay kawun matula ha pakikigiha yu ha Panginuun Jesus. Umanên ku, matula kawu!

⁵ Ipaakit yu ha laata' mahampata' kaluban yu ta madaniyanan lumatênga' Panginuun Jesus.

⁶ Ah kawu mag'alala ha hitamana' bagay nu alwan manalangin kawu kan Apu Diyus buy makikwa kanan mayin pasasalamat.

⁷ Nu habatuy gaw'ên yu, biyan kawun Apu Diyus kapayapaan ha pusu buy ha

ihip yun ah kayan matêbék tawtawu. Buy hay kapayapaana' atiya' mag'ingat kayu takay ah kawu mag'alala ta nakigha kawuy na kan Apu Jesu Cristo.

⁸ Pawpatêl ku, bilang pagtatapus, panay yun ihipina' bawbagaya' mangahampat buy kapuri puri: bawbagaya' pêtêg, kagalang galang, mangatuynung, mangalinis, mangaganda, buy marangal.

⁹ Gaw'ên yuy laata' natandan yu, natanggap, nalêngê, buy naakit yu kangku. Buy mapakayu hi Apu Diyus ya nanam'in kapayapaan.

Nagpasalamat hi Pablo ha Tulung La

¹⁰ Subray tula ku ha Panginuun ta maski matagalanan panawunana' nanlibah, im-paakit yun umana' malasakit yu kangku. Tanda kun ah yu ku naliwan nuwa ala kawun dilin mautuhana' mantan tulung kangku.

¹¹ Alwa kun innununghunga' ati ta nangangaylanganaku ta nagin sanayakuy nan mabyay maski hita puna' kalagayan ku.

¹² Nadanas kuy nay kairapan buy kasaganaan. Tanda kuy nan magin masaya hitamana' mangyari kangku, maski mabhuy u mabitil, masagana u nangangaylangan.

¹³ Buy maski hitamana' kalagayan ku, makaya ku ha tulung Apu Jesu Cristo ya nanam'in lakas kangku.

¹⁴ Habatuman nagpapasalamataku kayu ta tinulungan yu ku ha kairapana' nadanas ku.

¹⁵ Buy tanda yun libun tiga Filipos, hin unan naniwala kawu ha Mahampata' Balita tungkul kan Apu Jesus, hakawun diliya' mananampalatayan nanulung ha libun kaylangan ku hin nag'alihaku ha Macedonia.

¹⁶ Ta maski hin dilagaku ha Tesalonica, umnun bisis kaw mêt namamagtan tulung kangku.

¹⁷ Innununghung kuy ati, alwan labay kun dilin makatanggap uman tulung ibat kayu nu alwan labay kun madagdagan puna' pagpapala yu ta ha pagtulung yu kangku.

¹⁸ Hapaêg, hay tulunga' impagtan yu kangku ha pamêmêtan Epaafrodito, sapatana buy subra pun bay. Buy hay tulung yuy katbuh mabanguy handug kan Apu Diyus ya katanggap tanggap buy nanam'in tula kana.

¹⁹ Buy ibat ha kayamanan nan ah nauubuh, ibin Apu Diyus ya pinaglilingkuran kuy laata' kaylangan yu ta nakigiha kawu kan Apu Jesu Cristo.

²⁰ Puriin tamuy Bapa buy Apu Diyus tamu makanuman. Amen.

Hay Hulin Pangumusta

²¹ Kumusta' kawuy na bahêñ pawpinilin Apu Diyus ya nananampalataya kan Apu Jesu Cristo? Kinukumusta kaw mêt pawpatêl tamun kaawyun ku kayti.

²² Kinukumusta kaw mêt laat mananampalataya kayti laluy nay libun naglilingkud ha palasyun Empiradur.

²³ Mamirmi' kayun laata' kahampatan Panginuuun Jesu Cristo.

Hay Sulat Pablo ha libun mananampalataya ha banwan Colosas

Nanyulat hi Pablo ha libun mananampalataya kan Apu Jesus ha banwan Colosas. Hay Colosas, gihay banwa ha bansen binabawêg Turkey hapaëg. Alwan hi Pablo ya nakun nangaral ha tawtawu istu, nu alwan hi Epafras ya arawuk na, taêmén manampalataya hila kan Apu Jesus.

Hapaëg nabalit'an Pablo ya mayin nangaral tudun alwan pêtêg ha libun mananampalataya ha Colosas. Impapangaral lan kulang pun nu manampalataya ka dili kan Apu Jesus ta mayin pun paniniwalan kaylangan pun hunulun. Kaya nanyulat hi Pablo ha libun mananampalataya ha banwan Colosas taêmén ipaliwanag kanla hay kapêtêgan tungkul kan Apu Jesu Cristo. Innnunghung na, ya hi Apu Jesu Cristo diliya' makapaylitas, ta hiyay pinakamakapangyarihan ha laat buy ala yan katbuh. Hay pagkadiyus Apu Diyus dilag mêt kan Apu Jesus. Kaya innunghung na mêt ya hay namanang kaugaliyan, alway nan dapat hunulun, ta hay nakipaggihay na kan Apu Jesus, ganapa' na.

¹ Haku hi Pablo ya insugun Apu Cristo Jesus ayun ha kaluuban Apu Diyus. Nanyuyulataku kayu kaawyun ku hi Timoteo ya patêl tamu ha pananampalataya.

² Pawpatêl ku, nanyulataku kayun dilag bahên ha Colosas ya pinilin Apu Diyus buy tapat kan Apu Jesu Cristo.

Dalangin kun mapakayuy kahampatan buy kapayapaana' ibat kan Apu Diyus ya Bapa tamu.

Hay panalangin Pablo para ha libun tiga Colosas

³ Ha laata' panalangin yan para kayu, panay kamin nagpapasalamat kan Apu Diyus ya Bapan Panginuun tamun hi Apu Jesu Cristo,

⁴ ta nabalit'an yana pananampalataya yu kan Apu Cristo Jesus buy hay pagmaal yu ha laata' pinilin Apu Diyus.

⁵ Ginawa yuy habatu ta mayin kawun pag'asan iibin Apu Diyus kayuy inhandna ha langit. Nagkamayin kawun pag'asan ati hin nalêngê yuy nay kapêtêgan ya hay Mahampata' Balita tungkul kan Apu Jesu Cristo.

⁶ Hay Mahampata' Balitan ati kinumalat ha laat rugal ha mundu buy madlan biyay ya nabayu katbuh ha nangyari kayu hin nalêngê yu buy natêbêka' kapêtêgan tungkul ha kahampatan Apu Diyus.

⁷ Natandan yuy Mahampata' Balitan ati kan Epafras. Giha yan mapagkatival'an buy minamaala' patêl ha pananampalataya ya kaawyun yan mêt naglilingkud kan Apu Jesu Cristo para ha ikahampat yu.

⁸ Nabalit'an yan kan Epafras ya pagmaal yu ha balang giha ya in'ibin Ispiritun Apu Diyus kayu.

⁹ Kaya ibat hin allêwa' natandan yana tungkul kayu, panay kamin nananalangin para kayu. Impipikwa yan kan Apu Diyus ya biyan na kawun kabiyahaan buy pagkatêbêka' ibat ha Ispiritu na takay lubus yun matandana' kaluuban na.

¹⁰ Ha habatu, mamuhay kawun karapatdapat buy kalugud'lugud ha Panginuun, panay kawun manggawan mahampat buy lalun lumalêy pagkakilala yu kan Apu Diyus.

¹¹ Nananalangin kami mêt kan Apu Diyus ya panay patatagêñ nay pananampalataya yu ha pamêmêtan makapagtakan kapangyarihan na takay tiisin yun mayin tula ya laata' maranasan yu.

¹² Panay kawu mêt magpasalamat kan Apu Diyus ya Bapa, gawan ginawa na kawun karapatdapat takay'êmén manaén yuy inhandna ha langit para ha libun tawung pinili na ya dilag ha kahawangan.

¹³ Inlitas na kitamu ibat ha kadlêman kapangyarihan Satanás ta hapaëg dilag kitamyna ha paghaharin minamaal nan Anak.

¹⁴ Ha pamêmêtan Anak na tinubus na kitamu, hay labay sabin, pinatawadanay libun kasalanan tamu.

Hay mahampata' ginawan Apu Jesu Cristo para kantamu

¹⁵ Hi Apu Jesu Cristo, maakit kana hi Apu Diyus ya ahê nanakit. Bayu pun inlikhay laat, dilagana hi Apu Jesus ya makapang-yarihan ha laat.

¹⁶ Ha pamêmêtan Apu Jesu Cristo, ginawan Apu Diyus ya laata' dilag ha langit buy dilag kayti ha mundu, hay libun nanakit buy ahê nanakit katbuh anghil buy anituy naghahari, mayin katungkul-an, namumunu, buy mayin kapangyarihan. Inlikhay laat ha pamêmêtan Apu Jesu Cristo buy para kana.

¹⁷ Bayu pun inlikhay laat, dilagana hi Apu Jesu Cristo, buy ha pamêmêtan na, panay maayusa' laat.

¹⁸ Hi Apu Jesu Cristoy u hay labay sabin hiyay puun ha libun mananampalatayan miaawyun ya in'iitbuh ha nawini na. Hiyay pinangibatan bayun biyay la ta hiyay unan nabyay ha nangangamati takay hiyay pinakamatag'ay ha laat.

¹⁹ Ta kaluuban Apu Diyus ya lubusan mamirmi' kan Apu Jesu Cristo ya pagka Diyus na.

²⁰ Buy ha pamêmêtan dayan Apu Jesu Cristo hin nipaku ya ha krus, impagkasundun Apu Diyus ha sarili nay laata' inlikha na, ha langit buy ha mundu.

²¹ Hinhatu, madayu kawukan Apu Diyus buy nakapati na kawu, gawan ha malaêta' ihip yu buy ha libun gawa yu.

²² Nuwa hapaêg, ha pamêmêtan pagkamatin nawinin Apu Jesus ha krus, impagkasundu kawun Apu Diyus ha sarili na takay maiarap na kawun banal, malinis, buy alan maakita' malaêt ha pamalayan na.

²³ Nuwa kaylangan yun mamirmin tapat buy matatag ha pananampalataya yu. Buy ah yu paulayên maalih ya pag'asa yu ha libun impangaku ha Mahampata' Balitan nalêngê yu. Hay Mahampata' Balitan ati, impangaralana' ha laata' rugal kayti ha mundu buy haku hi Pablo ya giha ha nanggaral ati.

Hay pag'iirap Pablo para ha libun manampalataya

²⁴ Natutula ku ha libun pag'iirapa' nadadanasan ku para kayu buy ipagpatuluy kuy pag'iirapa' ati katbuh nadanas Apu Jesu Cristo para ha libun mananampalatayan miaawyun ya hiyan nawini na.

²⁵ Intalaga kun Apu Diyus ya magin tagapaglingkud ha libun mananampalatayan miaawyun takay maipangarala' kabuuan nunghung na kayun alwan Hawjudio.

²⁶ Hay kabuuan nunghung na nakalihim hinhatu, ahê pun impatandan Apu Diyus ha libun ninunu tamu hinhatu. Nuwa hapaêg, impatanda nay na kantamun libun pinili na.

²⁷ Labay Apu Diyus ya ipatanda na ha libun pinili na ya dakila buy makapagtakan lihima' planu na kayun alwan Hawjudio. Ati ya lihima' planu na ya mamirmi kayu hi Apu Jesu Cristo. Buy ati baya' mam'in kasiguraduan kantamu ya maranasana' makabahagi ha kahampatan Apu Diyus.

²⁸ Kaya impapangaral yan hi Apu Jesu Cristo ha laat tawu. Pinapaalalahanan yan buy tinutuduwanana' balang giha ha pamêmêtan kabiyyahaana' in'ibi kanyan Apu Diyus. Ha habatu, maiarap yan ya balang giha kan Apu Diyus ya ganapa' kanlan pananampalataya ta ha pakikigha la kan Apu Jesu Cristo.

²⁹ Kaya nagsisipag buy nagtitiyaga kun mangaral Mahampata' Balita ha laat tawu ha pamêmêtan kapangyarihan Apu Jesu Cristo ya mam'in lakas kangku.

2

¹ Labay kun matandan yu nu paka-pakuna' pagiirapa' dinanas ku para kayu, buy ha libun tiga Laodicea, buy ha laata' ahê pun nakakakilala kangkun arapan.

² Ginagawa kuy ati takay palakasêna' luub yun laat buy magkagiha kawu ha pagmamaalan. Ha habatu, lubus yun matandan buy matêbêka' lihima' planun Apu Diyus ya hiya baya' Apu Jesu Cristo.

³ Ta hi Apu Jesu Cristoy pinangingibatan laata' kabiyyahaan buy pagkatanda.

⁴ Innununghung ku kayuy libun ati takay ah kawu mailêtêp hitalagyuman ha pamêmêtan mangahampata' pangangatuwirana' alwan pêtêg.

⁵ Ta maski ala ku bahén kayu, panay kawun dilag ha ihip ku. Buy hin nabalit'an kuy maayusa' pamiaawyun yu bilang mananampalataya buy matataga' pananampalataya yu kan Apu Jesu Cristo, natutula kuy na.

Hi Apu Jesu Cristoy dapat hunulun

⁶ Kaya bay ta tinanggap yu hi Apu Cristo Jesus bilang Panginuun yu, ipagpatuluy yun mamuhay kawu ayun ha kaluúban na.

⁷ Matataga' pananampalataya yu buy nagtitiwala kana kaya ipagpatuluy yuy ati buy lumaguy pagkakilala yu kana. Tumataga' pananampalataya yu kana dapay naipangaral kayu. Buy panay kawun magpasalamat kan Apu Diyus.

⁸ Mag'ingat kawu ha libun nanunudun alan silbi buy maylêtêp takay ah la kawu maagkat. Ta alwan ibat kan Apu Jesu Cristoy arala' ati, nu alwan ibat dili ha daan kaugaliyan buy ha libun paraan ha mundu.

⁹ Kaya ah kawu palêtêp, ta hinhatus naging tawu hi Apu Jesu Cristo, hay buun pagka Diyus, dilagana' kana.

¹⁰ Nagin ganap kawuy na ta ha pakikigha yu kan Apu Jesu Cristo ya hiyan manyakup ha laata' anitun namumunu buy mayin kapangyarihan.

¹¹ Ta ha pakikigha yu kan Apu Jesu Cristo, bilang tuli kawuy na. Hay pagtutulin ati ya alwan ayun ha gawan tawu nu alwan ayun ha Ispiritun Apu Diyus, hay pay'alih mangalaéta' kalabayan nawini yu. Atiya' pagtutulin ibat kan Apu Jesu Cristo.

¹² Ha pamêmêtan pagbawtismu kayu, nambuh kawuy nan in'êlbêng buy nabyay uman katbuh Apu Jesu Cristo, ta naniwala kawu ha kapangyarihan Apu Diyus ya namiyay kana.

¹³ Hinhatus, hakawuy inturing Apu Diyus nati ta ha libun kasalanan yu buy ha paghunul yu ha mangalaéta' kalabayan nawini yu. Nuwa hapaêg, binyay kawuy nan Apu Diyus kaawyun Apu Jesu Cristo. Pinatawad nay laata' kasalanan tamu.

¹⁴ Mayin kitamun pananagutan ta ah tamu nahunula' Kautuhan nuwa inalihanan Apu Jesu Cristoy ati ha pamêmêtan

pagkamati' na ha krus. Kaya ah kitamu maparusaan.

¹⁵ Ha pamêmêtan pagkapakun Apu Jesu Cristo ha krus, tinalun Apu Diyus ya libun anituy maghari buy mayin kapangyarihan. Hay libun anitun ati dinakêp na buy imparada ha kadlan bilang patunaya' nagtagumpay ya.

¹⁶ Kaya andi yu paulayêna' tawtawun manghatul kayu nu hita puwidin maêkan, mainêm, u nu hita dapat gaw'en ha balang pista, ha bayun buyan u ha Allêw Pamacahinga.

¹⁷ Hay libun utuha' ati palatandaan dili ha libun bagay ya palatêng. Nuwa hi Apu Jesu Cristo ya katuparan laata' ati.

¹⁸ Mayin nagpapakayêpa kanwari buy impipilit lay kaylangan mêt sambaêna' libun anghil Apu Diyus. Innununghung lay mayin hilan karapatan ta ha nakit la ha libun hulêplêp la buy impagyayabang lay ati, nuwa alwan pêtêg, ta ibat dili ha sarili lan ihip. Andi kawu maniwala ha innununghung la, takay ahê maalih ya gantimpalan inhandan Apu Diyus para kayu.

¹⁹ Ah hila nakatugnu kan Apu Jesu Cristo ya hiyay u hay labay sabin hiyay puun ha libun mananampalatayan miaawyun. Buy hiyay mamiugnay buy mangalênggêp kantamu bilang nawini na. Ha dapay habatu inlulumagu kitamu ayun ha kaluúban Apu Diyus.

²⁰ Hin nati hi Apu Jesu Cristo, nambuh nati kawu mêt kaawyun na buy pinalaya kawuy na ha libun paraan ha mundu. Angkaya yu pun hinuhunula' in'uutuh lan,

²¹ "Andi dukpana' ati," "Andi tawayana atu," "Andi galawêna' habayin"?

²² Ta hay kapêtêgan, habayina' bawbaga' imbabawal la, tungkul dili ha libun bagay ya nauubuh nu maêkan u maênêm. Kaya andi yu hunuluna' ati ya utuh buy aral ya gawa'gawan dilin tawu.

²³ Hay libun utuha' in, nu balayênu, dapay pêtêga' kabiyahaan ta intutudu lan kaylangan humunul ha kanlan mahigpita' pagsamba, magpakayêpa kanwari, buy pairapana' nawini. Nuwa hay pêtêg, alan silbi ya ati, ta alay naman maitulung ya

mapigilana' kalabayan nawini.

3

¹ Hin binyay uman hi Apu Jesu Cristo nambuh kaw mêtanan binyan bayun biyay, kaya hangarêñ yuy libun bagaya' dilag ha langit, nu haantun nakaitnu hi Apu Jesu Cristo ya mayin karangalan buy kapang-yarihan ha kanan Apu Diyus.

² Hangarêñ yuy libun dilag ha langit, alwan libun bagaya' dilag kayti ha mundu.

³ Ta naituring kawuy nan nati ha daan yun pamumuhyay. Buy mayin kawuy nan bayun biyay kaawyun Apu Diyus ta ha pakikigha yu kan Apu Jesu Cristo ya alwa pun lubusa' naipatanda.

⁴ Hi Apu Jesu Cristoy pinangibatan bayun biyay yu buy nu lumatêng'a panawuna' mahayag ya, mahayag kawu mêt buy parangalan kawun kaawyun na.

Hay daan buy bayun biyay

⁵ Kaya alihin yuy nay hitamana' kalabayan nawini yu katbuñ pamítêpêltêpêl, kaalayan, malaêta' kalabayan, buy sakim, ta nu sakim ka, dapay ka mêtanan nagpuri ha diyusdiyusan.

⁶ Ta hay libun manggawan habatu, parusaan hilan Apu Diyus.

⁷ Hinhatu, habatu mête' ginagawa yu.

⁸ Nuwa hapaêg, alihin yuy nay puut, hakit nakêm, pannununghung malaêt laban ha kaparihu, buy mangaalaya nunghung.

⁹ Andi kawu magsinungaling ha balang giha, ta inalih yuy nay daana' pamumuhyay yu ya mayin malaêta' gawa.

¹⁰ Buy bayuy nay pamumuhyay yu ya panay mêt binabayun Apu Diyus ya naylikha kayu taêmên magin katbuñ yu ya buy lalu yu ya pun makilala.

¹¹ Ha bayun pamumuhyaya' ati, alay nan pinagkaibay Hawjudio ha alwan Hawjudio, hay tuli ha alwan tuli, hay libun dayuhan ha libun alwan mahampata' ugali hinhatu, buy alipêñ ha alwan alipêñ. Ta hi Apu Jesu Criston diliya' laat laat buy dilag yay na kantamun laat.

¹² Kaya ta pinili kawun Apu Diyus buy minaal na, dapat kawun maiingaluun, mahampata' luub, magpakayêpa, mahinahunun, buy matiyaga.

¹³ Mipagpasinsiyaan kawu buy nu mayin kawun hakit nakêm ha hitalagyuman, magpatawaran kawu, ta pinatawad kawu mêt Panginuun.

¹⁴ Higit ha laat, magmaalan kawu takay ganapa' pagkakagiba yu ha balang giha.

¹⁵ Panatiliin yu ha pusu yuy kapaya-paana' ibat kan Apu Jesu Cristo. Ta bilang bahagi kawu ha gigihay nawini na, binawêg kawun Apu Diyus takay mamuhay mapayapa. Buy panay kawu mêt magpasalamat.

¹⁶ Panatiliin yun mahampat ha pusu yuy libun impangaral Apu Jesu Cristo. Patandan buy tuduwanan yuy balang giha ha pamêmêétan kabiyahaana' in'ibin Apu Diyus. Magkantaan kawun ibaibang kalasin kanta ya pang Apu Diyus ya mayin pasasalamat.

¹⁷ Buy nu hitamana' ginagawa yu, ha nunghung man u ha gawa, gaw'ên yuy laata' ati bilang parangal ha lagyun Panginuun Jesus buy magpasalamat kawu kan Apu Diyus ha pamêmêétan na.

Hay mahampata' pakikiawyun ha kaparihu

¹⁸ Hakawun babayi, magpasakup kawu ha ahawa yu ta ati ya dapat yun gaw'ên bilang pakikigha yu ha Panginuun.

¹⁹ Hakawun kalyakiyan, maalêñ yuy ahawa yu buy andi yu hila pakhitian.

²⁰ Hakawun kaanakan, hunulun yuy mangatuwa yu ha laat bagay, ta ati ya kalugud lugud ha Panginuun.

²¹ Hakawun mangatuwa,* andi kawu manggawan hitamana' bagaya' ika-hakit nakêm kaanakan yu takay ah hila pang'inaan nakêm.

²² Hakawun alipêñ, panay yun hunuluna' libun utuh amu yu. Magtarabahu kawun alwan dili ha maakit aw'amu yu takay matula hila kayu. Maski ah la kawu maakit, gaw'ên yun buun pusu ya mayin limu ha Panginuun.

* ^{3:21} Ha literal, bawbapa.

²³ Hitamana' ginagawa yu, gaw'ên yun buun pusu, para ha Panginuun alwan para ha tawu.

²⁴ Ta tanda yu mêtanamana' biyan na kawun impangaku na ha langit bilang gantimpala yu buy hay pêtêga' amu yu, hay Panginuung Jesu Cristo.

²⁵ Hitalagyumana' manggawan malaêt, parusaan ya ayun ha ginawa na, ta alan pinipili hi Apu Diyus.

4

¹ Hakawun amu, pakiawyunan yun mampat buy magin matuynung kawu ha libun alipên yu. Ihipin yu mayin kawu mêt Amu ha langit.

Hay umnun utuh ha libun mananampalataya

² Buun pusu yun ipagpatuluya' panalangan yu kan Apu Diyus buy ingatan yuy ihip yu kaban manalangin kawu buy panay kawun magpasalamat kana.

³ Manalangin kawu kan Apu Diyus ya manggawa yan paraan takay maipahayag yana ahê pun naipahayag tungkul kan Apu Jesu Cristo. Ta hay pangangaral ku tungkul ha planu na ya dahilan pagkakulung ku.

⁴ Manalangin kawu ya maipangaral kun malinawa' ati ta habatuy dapat kun gaw'ên.

⁵ Pakahampatênu yu pakikiawyuna ha libun ahê mananampalataya kan Apu Jesus. Buy kaban dilag kawu kanla, sikapênu yu ipatanda kanlay tungkul kan Apu Jesu Cristo.

⁶ Nu kanunghung yu hila, dapat mahinahuna' nunghung yu takay manlêngê hila kayu. Buy dapat tanda yu nu pakapakuna' mahampata' sagut yu maski hitamana' itanung la.

Libun pangumusta

⁷ Hi Tikiko ya minamaal tamun patêl ha pananampalataya, hiyay maybalita kayu tungkul ha kalagayan ku. Mapagkatiwal'an ya buy kaparihu yana naglilingkud ha Panginuun.

⁸ Pinalaku ku ya kayu takay matandan yuy kalagayan yan buy takay palakasên nay luub yu.

⁹ Ha paglaku na bahêna kayu ha Colosas, kaawyuna hi Onesimo ya minamaal tamun patêl buy mapagkatiwal'an ya kabawu yu. Hilay maybalita kayu tungkul ha laata' nangyayari kayti.

¹⁰ Nagpakan kawuy na ambalan Aristarco ya kaawyuna kun nakakulung. Nagpakan kawu mêtana' kanu ambalan Marcos ya pinsan Bernabe. Imbilin kuy na kayu hinhatu ya nu lumatêng bahêna hi Marcos, tanggapén yu yan mahampat.

¹¹ Nagpakan kawu mêtana ambalan Jesus ya binabawêg Justo. Hi Aristarco, Marcos buy hi Justo, hilan dili ya kaparihu kun Hawjudion kaawyuna kun mangaral kayu tungkul ha paghaharin Apu Diyus. Buy hilay nagpapalakas luub ku.

¹² Nagpakan kawu mêtana' kanu, ambalan kabawu yu hi Epafras ya giha mêtana' naglilingkud kan Apu Cristo Jesus. Panay yan nananalingin kan Apu Diyus buun pusu ya magin matatag buy ganapa' paghunul yu ha kaluuban Apu Diyus.

¹³ Napapêtgan kuy sipaga' ginagawan Epafras para ha ikahampat yu buy ha ikahampat libun dilag ha Laodicea buy Hierapolis.

¹⁴ Nagpakan kawu mêt ambalan Demas buy hi Lucas ya minamaal tamun duktur.

¹⁵ Sabin yu mêtai impapanunghung kuy nagpakananay pawpatêl ha Laodicea, kan Nimfa buy ha libun mananampalatayan miaawyuna ya dilag ha biyag na.

¹⁶ Pagkabasa yu sulata' ati, ipagtanyu mêt ha libun mananampalatayan miaawyuna ya dilag ha Laodicea takay mabasa la mêt. Hay insulat ku kanla, basaên yu mêt.

¹⁷ Pakinunghung yu kan Arquipo ya yariin nay impapagawan Panginuun kana.

¹⁸ Hakuy nay ati hi Pablo ya nanyuyulat ha hulin pagbatu. Ihipin yu dilagaku ha kulungan buy panay kawun manalangin para kangku.

Dalangin kuy mapakayuy kahampatan Apu Diyus.

Tito

Panimula

Hi Tito, alwa yan Judio nuwa nananampalataya ya kan Apu Jesus ta ha panunudun Pablo. Nakaawyun na hi Pablo ha pangangaral tungkul kan Apu Jesus ha Islan Creta. Hin insulat Pabloy sulata' ati kan Tito, maguluy kalagayan libun mananampalataya ha Creta ta ala pun namumunu kanla taêmén maypatêbék ha kapêtégan. Kaya hin nag'alihi hi Pablo ha Creta, pinikinunghungan nan mamirmi' pun istu hi Tito taêmén mamilin libun mangatuwan mamunu ha libun mananampalataya. Buy manudu ya nu hita dapata' maakit ha biyay libun pinili nan mamunu. Imbilin Pablo kana nu pakapakun nan tuduwanana' libun mangatuwan kalyakiyan buy mangatuwan babayi ya manudu mêt ha nakakaanaka' babayi. Tuduwanan na mêtä' nakakaanaka' kalyakiyan, buy libun alipên. Imbilin pun kana ya panay yan manggawan mahampat taêmén magin mahampat yan halimbawa kanla. Dapat panay tamay innununghung na takay alan mainunghunga' malaêt kayti buy mayin yan karapatana' pannunghungana' libun nanyayalungat ha pêtéga' tudu. Ah na dapat paulayêna' dustaên yan hitalagyuman.

Hay Sulat Pablo kan Tito

¹ Haku hi Pablo, lingkud Apu Diyus buy alagad Apu Jesu Cristo. Insuguwakan Apu Diyus taêmén patatagêna' pananampalatayan pawpinili na buy ipatêbék kanlay kapêtégan tungkul ha pamumuha' kalugud lugud kana.

² Hay pananampalataya buy pagkatêbêka' nanam'in pag'asa kantamun makatanggap kitamun biyay ya alan anggan. Hay biyay ya alan anggana' atiya' impangakun Apu Diyus bayu pun likhaêna' mundu, buy nakanumani' ah ya nagsinungaling.

³ Hapaêg ha panawuna' intakda na, naihayagana ha tawtawuy Mahampata' Balita tungkul ha biyay ya alan anggan. In'ibi kangkun Apu Diyus ya Tagapagligtas

tamuy tungkulina' ipangaral kuy ati ayun ha utuh na.

⁴ Nanyulataku kamu maal kun Tito ya pêtêg kun anak ha gigihay pananampalataya. Indadalangin kun mamirmi' kamuy kahampatan buy kapayapaan Bapa tamun hi Apu Diyus buy Tagapagligtas tamun hi Apu Jesu Cristo.

Hay Libun Dapat Gaw'ên Tito ha Creta

⁵ Hin nag'alihaku ha Islan Creta, innunghung ku kamun mamirmi' ka pun bahêna taêmén ayusun muy bawbagaya' ah ku pun naayus buy mamili kan libun mangatuwan mamunu ha libun mananampalataya ha balan rugal katbuh daan kun imbilin kamu.

⁶ Hay pilin mun kalyakiyanamunu, alan manunghunga' malaêt kanla, gigihan diliya' ahawa, mananampalataya kan Apu Diyus ya aw'anak, alwan mangalukêy aw'anak u mangatigasa' u.

⁷ Ta hay libun namumunu, pinagkatival'an hilan Apu Diyus kanan gawaên, kaya dapata' ala talagan maakita' malaêt ha biyay la. Dapat alwa hilan mayabang, mapupuutun, lasinggiru, malupit buy sakim ha pira.

⁸ Nu alwan bukasa' biyag la ha kaparihu, labay labaya' lay kahampatan, biyahang mag'ihip nu hita mahampata' gaw'ên, matuynung, malinisa' pamumuhat buy mapagpigel ha sarili.

⁹ Kaylangana' matataga' pananampalataya la ha pêtéga' arala' natandan la taêmén maitudu lay ati ha kanayun buy maituynung lay nanyayalungat haati.

¹⁰ Ta madlan tawu bahêna ha Cretay alwan naniniwala ha pêtéga' tudun ati, laluy nay grupun impipilita' kaylangana' magpatuliya' libun mananampalataya kan Apu Jesus. Alan kabuluana' innununghung la buy inlêlêtêp lay kanayun.

¹¹ Dapat bênbênan mu hila ta nanggugulu hilan madlan pamilya ha pangangaral lan bawbagaya' alwan dapat itudu taêmén makakuwa dili hilan pira.

¹² Innunghung ban giha ha libun mabiyyaha kanlan tawtiga Cretay, "Sinungalinga' libun tiga Creta, mangatamatad,

mangatakaw buy mangalupit katbuuh mabangisa' ayêp."

¹³ Pêtêga' innunghung na. Kaya talagan pannunghungan mu hila taêmên magin tamay pananampalataya la

¹⁴ buy ah lay na panlêng'êngana' kawkwintun gawa gawan dilin Hawjudio u libun kautuhana' gawa gawan dilin nagpatalibukut ha kapêtêgan.

¹⁵ Ta ha tawtawung malinisa' pag'ihip, malinisanay laat bagay. Nuwa para ha tawung mangalaêt buy alwan nananampalataya ha Panginuun, madumiya' laat bagay. Ta madumiya' kaluuban la buy ihip, ah la tanda nu hita mahampat buy malaêt.

¹⁶ Innununghung lan kilala la hi Apu Diyus nuwa ah nanaakit ha gawa la. Mangalaêt hila, alwa la mêt hinuhunul hi Apu Diyus buy ah la magaway mahampat.

2

Hay Tudu ha Tamang Pamumuhy

¹ Nuwa haka Tito, itudu muy ayun ha pêtêga' aral.

² Hay mangatuwan kaliyakiyan, tuduwanan mu hilan magin mahinahun, kagalang galang buy tandan mag'ihip nu hita mahampata' gaw'ên. Dapat matataga' pananampalataya la, pêtêga' pagmamaal la, buy napagtitisan lay irap.

³ Habatu mêt ha mangatuwan babayi, tuduwanan mu mêt hilan mamuhaya' malinis bilang mananampalatayan Apu Diyus. Andi hila manhidan kaparihu buy andi mêt hila mahilig ha alak nu alwan manudu hilan kahampatan

⁴ taêmên matuduwanan lay libun nakakaanaka' babayi nu pakapakun lan maalêna' aw'ahawa la buy kawkaanakan la.

⁵ Tuduwanan la mêt hilan biyahan mag'ihip nu hita mahampata' gaw'ên, mamuhaya' malinis, maasikasu ha biyag, mabait, buy magpasakup ha ahawa taêmên alan mannungunga' malaêt ha Nunghung Apu Diyus ya intutudu tamu.

⁶ Habatu mête' libun nakakaanaka' kaliyakiyan, tuduwanan mu mêt hilan mabiyahan mag'ihip nu hita mahampata' gaw'ên.

⁷ Buy haka Tito, magin mahampat kan halimbawa ha laata' bagay. Magin tapat ka buy buun pusu kan manudu.

⁸ Dapat tamay intutudu mu kanla buy alan mainunghunga' malaêt kayti takay'êmên mipadêng'êya' libun nanyay-alungat ta ala hilan manungunga' malaêt laban kantamu.

⁹ Hay libun alipên, tuduwanan mu hilan magpasakup ha amu la ha laata' bagay taêmên mam'i hilan tula ha aw'amu la. Andi hila panay nagririklamu kanla.

¹⁰ Buy andi mêt hila manakaw kanla nu alwan ipaakit lan mapagkatiwal'an hila takay'êmên ha laata' ginagawa la, maipaakita' kahampatana' intutudu tamu tungkul kan Apu Diyus ya Tagapagligtas tamu.

¹¹ Ta impaakitanan Apu Diyus ya kahampatan na ha ginawa nan paraan taêmên miligtasa' laat tawu.

¹² Ta ha kahampatan na, intutudu na kantamun ibwatan tamuy libun gaw'êna' alwan nakakatula kan Apu Diyus buy hay mangalaêta' labay nawini tamu. Buy mamuhay kitamu kayti ha mundun mangatuynung, biyahan mag'ihip nu hita mahampata' gaw'ên, buy hinuhumunul ha kaluuban Apu Diyus

¹³ kaban inéêtêng tamuy inaasaana' nakakatulan paglatêng nan uman. Ha allêwa' tu, maakit tamuy kahawangan Apu Jesu Criston dakilan Apu Diyus tamu buy Tagapagligtas.

¹⁴ In'ibi nay biyay na para kantamu takay tubusun kitamun laat ha kamalaêtan buy linisin kitamu ha kasalanan taêmên mapakana kitamu ya nakahandan manggawan mahampat.

¹⁵ Kaya habayina' itudu mu ha libun kapatêlan tamu bahê. Mayin kan karpata' tuduwanan hilan humunul buy pannunghungana' libun nanyayalungat. Buy ah mu paulayêna' baliwalaên hitalagyumana' innunghung mu.

3

Hay Dapata' Pamumuhy Libun Mananampalataya

¹ Ipaalala mu ha libun mananampalatayan pasakup hila buy humunul ha

libun namumunu buy nanunungkuluan. Dapat hilan panay nakahandan manggawan mahampat.

² Andi hila mannunghung malaêt laban ha hitalagyuman buy andi hila magribatian nu alwan dapat magpakabait hila buy magpakyêpa ha laat.

³ Ta maski hakitamu mêt hinhatu, ah tamu pun kilala hi Apu Diyus. Ah kitamu hinuhumunul kana, agad kitamun naguguluy ha kamalaêtan buy naaalépén laata' kalasin malaête' kalayawan buy kalabayen nawini. Panay kitamun nag'ihip malaêt ha gihat giha buy nag'iinggitan. Kinasusuklaman kitamun kanayun buy sususuklam kitamu mêt kanla.

⁴ Nuwa hi Apu Diyus ya Tagapaglitas tamu, impaakit nay kahampatan buy pagmamaal na kantamu

⁵ hin inlitas na kitamu ha kaparusaan ta ha kawkasalan tamu. Inlitas na kitamu alwan dahilan ha mahampata' gawa tamu nu alwan ha ingalu na kantamu buy ha pamêméêtan Ispiritu na ya nanlinis buy nam'i kantamun bayun biyay.

⁶ Buun pusun iniibin Apu Diyus ya Ispiritu na kantamu ha pamêméêtan Apu Jesu Criston Tagapaglitas tamu.

⁷ Ginawan Apu Diyus ya habatu taêmên matanggap tamuy inaasahan tamun biyay ya alan anggan. Buy matanggap tamuy ati ta inturing na kitamun matuynung ta ha lubusa' kahampatan na.

⁸ Pêtêg buy mapagkatiwal'ana' tudun in. Kaya labay kun buun pusu mun ituduy bawbagaya' in ha libun mananampalataya kan Apu Diyus bahêna' taêmên ituun lay kanlan sarili ha panggawan mahampat. Mahampata' libun arala' in buy makatulung ha laat tawu.

⁹ Nuwa iwasan muy nunghungana' alan kabuluuan, ah ka makihaluk ha pag'ukilkil ha nawninunu buy iwasan mu mëta' pakikiribati tungkul ha kautuhan. Ta alan kabuluana' aw'ati buy alwan makatulung kayu.

¹⁰ Nu mayin tawung nanhihida ha pagkakagiha yu, pannunghungan mu ya. Hapaêg, nu luway bisis mu yay nan pinannunghungan nuwa ah ya pun nanlêngê, ah kay na makiawyun kana.

¹¹ Ta tanda muy nan makasalanana' tawung in buy nagdayu yay na ha kapêtêgan. Hay malaête' ginawa nay magpapapêtêga' dapat yay nan parusaan.

Libun Hulin Bilin

¹² Tito, palakwêñ ku bahêna hi Artimas u hi Tiquico. Nu lumatêngana bahêna' hitaman kanla, pilitin mun mikaakit kita ha Necapolis ta iniihip kun baistuwaku pun mamalibah taglay'êp.

¹³ Ha pag'alih lan Zenasa' biyaha ha batas buy Apolos, gaw'ên muy makaya mu taêmên matulungan mu hila. Dapat ah hila magkulang ha kanlan kailanganen ha paglalakbay.

¹⁴ Buy tuduwanan mun magsipag ha paggawan mahampata' pawpatêl tamu ha pananampalataya kan Apu Jesus taêmên makatulung hila ha libun nangangaylangan. Nu habatuy gaw'ên la, magin pakin-abanga' biyay la.

¹⁵ Kinukumusta kan laata' awyun ku kayti buy ikumusta mu ku mêt ha laata' pawpatêl tamun mananampalataya bahêna' nagmamaal kanyan.

Dalangin kun mamirmi' kayun laata' kahampatan Apu Diyus.

FILEMON Hay Sulat Pablo Kan Filemon

Hi Filemon, kilalan mananampalatayan Apu Jesu Cristo. Mayin yan gihay alipén, lagyuy Onesimo. Nagtakaha' ati ha kanan amu. Kaban nakakulung hi Pablo, nakilalan Onesimo hi Apu Jesu Cristo ha pamêméetan na. Kaya naging anak yan Pablo ha pananampalataya kan Apu Jesu Cristo.

Ha panawuna' tu, hay libun alipéni' pag'aari dilin amu la. Kaya nu magtakah hila, mabiyata' parusa kanla ta nu madakép hila, patin hila. Kaya nanyulat hi Pablo kan Filemon takay pakinunghungan nan patawarén nay na hi Onesimo buy tanggapén alwan dilin bilang gihay alipén nu alwan bilang gihay patêl ha Panginuun.

Hay Sulat Pablo kan Filemon

¹ Haku hi Pablo ya nakakulung ta ha panunudu kun tungkul kan Apu Jesu Cristo. Nanyulataku kamu Filemon, kaawyun ku hi Timoteon patêl tamu ha Panginuun. Kumusta' kay na minamaal yana Filemon ya katbuhan yana maglingkud kan Apu Diyus.

² Buy kumusta' mét kan Apia ya patêl tamu ha pananampalataya, kan Arquipo ya katbuhan yana alan limun nanunudu tungkul kan Apu Jesu Cristo buy ha libun mananampalatayan mititipun ha biyag mu.

³ Indadalangin kun mapakayuy kahampatan buy kapayapaan Bapa tamun hi Apu Diyus buy Panginuun Jesu Cristo.

Hay Pagmamaal buy Pananampalatayan Filemon

⁴ Panayakun nagpapasalamat kan Apu Diyus tuwin impapanalangin kita

⁵ ta nabalist'an kun minamaal muy laata' pinilin Apu Diyus buy nananampalataya ka ha Panginuun Jesus.

⁶ Nananalanginaku kan Apu Diyus ya ipagpatuluy muy pakikigiha mu ha balan mananampalataya. Buy nu habatu lubus mun matêbêka' laata' mangahampata'

bagaya' in'ibin Apu Diyus kantamu taêmên maparangalan tawtawu hi Apu Jesu Cristo.

⁷ Minamaal kun patêl, lubusa' tula ku buy sinumiglay kaluuban ku ta minamaal muy libun pinilin Apu Diyus buy pinasigla muy kaluuban la.

Hay Kahilingan Pablo kan Filemon

⁸ Kaya bay bilang alagad Apu Jesu Cristo, malakasa' luub kun may'utuh kamu nu hita dapat mun gaw'én.

⁹ Nuwa ta maal kita, nakikinunghungaku tana kamu. Kaya ban ta mas matuwa ku kamu buy nakakulungaku ta ha panunudu ku tungkul kan Apu Jesu Cristo,

¹⁰ nakikinunghungakun mahampat kamu para kan Onesimo. Inturing ku yan anak ta kaban nakakulungaku kayti, naging bapa na ku ha pananampalataya.

¹¹ Hin hatu, alan naitulung hi Onesimo kamu ta nagtakah ya. Nuwa hapaëg mamhaka' maitulung na kantan luwa.

¹² Pinapabalik kuy na kamu hi Onesimo ya lubus kun minamaal.

¹³ Labay ku hanan kayti ya pun kangku taêmên matulungan na kun dapay hakay nay nanunulung kangku kaban nakakulungaku pun ta ha panunudu kun Mahampata' Balita.

¹⁴ Nuwa ah ku labaya' gaw'êna' habatu ya ala kan pahintulut taêmên kusang luub mu kun tulungan buy alwan sapilitan.

¹⁵ Dat nihiyay ya kamun maëpêka' panawun taêmên ha pagbalik na kamu, makaawyun mu yay na makanuman.

¹⁶ Maski alipén mu yan dili hinhatus, hapaëg giha yay na ha minamaal tamun patêl ha pananampalataya. Maal ku hi Onesimo nuwa mas lalun maal mu ya ta alwa mu yan dilin alipén nu alwan patêl mu yay na ha Panginuun.

¹⁷ Kaya nu intuturing mu kun kaparihu mun maglingkud ha Panginuun, tanggapén mu hi Onesimo katbuhan pagtanggap mu kangku.

¹⁸ Nu nagkasala ya kamu u nagkautang, haku tanay baala kamu.

¹⁹ Haku hi Pabloy mismun nanyulat ati. Haku tanay baala ha hitamana' nautang na kamu. Ah kuy na sabina' utang mu kangkuy nakilala mu hi Apu Jesu Cristo.

²⁰ Patêl ku, ta ha pananampalataya tamu ha Panginuun Jesus, nakikinunghungaku kamun gaw'ên moy kahilingan ku tungkul kan Onesimo. Pasiglaêñ moy luub ku bilang patêl mu kan Apu Jesu Cristo.

²¹ Nanyulataku kamu Filemon ta naninawala kun gaw'ên moy kahilingan ku kamu. Buy tanda kun higit pun kaytiya gaw'ên mu.

²² Nakikinunghungaku mêt kamun ipaghanda mu kun mapagpirmiyan ta

umaasa kun makabalikaku bahêñ ta impapanalangin yu ku.

Hay Huling Pangumusta

²³ Kinukumusta kan Epafras ya kaawyun kun nakakulung ta ha panunudu na tungkul kan Apu Jesu Cristo.

²⁴ Buy kinukumusta ka mêt lan Marcos, Aristarco, Demas, buy Lucas ya kaawyun kun maglingkud kan Apu Diyus.

²⁵ Dalangin kun mapakayuy kaham-patan Panginuun Jesu Cristo.